

समुद्र का वायुवसे । तरंगाकार उल्हासे ।  
 तो समुद्रांशु ऐसा दीसे । सानिवां जेवि ॥ १२ ॥  
 तेवि जडाते जीवविता । देहअहंता उपजविता ।  
 मीं जीउ गमे पांडुसुता । जीवलोकिं ॥ १३ ॥  
 पै जीवचिया बोधा । गोचर हा धांधा ।  
 तो जीवलोकुशब्दा । अभिप्राउ ॥ १४ ॥  
 आमा उपजणें निमणें । हें साच काइ मानणें ।  
 तो जीवलोकु मीं हणें । संसार हान ॥ १५ ॥  
 एवंविधि जीवलोकिं । तू मातें ऐसेयां अवलोकिं ।  
 जैसा चांदु कां उदकिं । उदकातीतु ॥ १६ ॥  
 पै काश्मिरीचा रवा । कुंकुमा वारि पांडवा ।  
 आणिकां गमे लोहिवां । तो तरि नव्हे ॥ १७ ॥  
 तैसें अनादिपणें नोमोडे । माजि अक्रियत्व न खांडे ।  
 पारि कारिता भोक्ता आवडे । ते जाण गा आंत ॥ १८ ॥  
 किंबहुना आत्मा चोखटु । होउनि प्रकृतिासिं एकवटु ।  
 बांधे प्रकृतिधर्माचा पाटु । आपणपेयां ॥ १९ ॥  
 पै मनादि साहीं इंद्रियें । श्रोत्रादि प्रकृतिकार्यें ।  
 तिर्ये माझीं हणौनि होए । व्यापारिं रूढ ॥ २० ॥  
 जैसें स्वप्निं परिव्राजें । आपणपेयां कुटुंब होइजे ।  
 मग तेयाचेनि धांविजे । मोहें सैरा ॥ २१ ॥  
 तैसें आपुलिया विस्मृती । आत्मा आपण चि प्रकृती ।  
 सरिस्सा गमौनि पुढुतीं । तिसिं चि भजे ॥ २२ ॥  
 मनाचां रथि बलघे । श्रवणाचेनि द्वारें निगे ।  
 मग शब्दाचेया रिगे । राना माजि ॥ २३ ॥  
 तो प्रकृतिचा वागौरा । करी त्वचेचिया मोहरा ।  
 आणि स्पर्शचेया घोरा । वना जाए ॥ २४ ॥

कोण्हि एकं अवसरि । निगौनि नेत्रांचां द्वारि ।  
रूपाचां डोंगारि । हिंडतु असे ॥ २५ ॥  
कां रसनेचिया वाटा । निगौनि गा सूभटा ।  
रसाचा दारकुटा । भरौनि ठाके ॥ २६ ॥  
नातरि एणें चि घ्राणें । हा मदंशु करी निगवणें ।  
मग गंधार्चिं दारुणें । आडवें लंघी ॥ २७ ॥  
ऐसें देहेंद्रियनायकें । धरुनु मन जावलिके ।  
भोगिजति शब्दादिकें । विखाभरणें ॥ २८ ॥

शरीरं यदवाप्नोति यच्चाप्युत्क्रामतीश्वरः ॥

गृहीत्वैतानि संयाति वायु र्गन्धानिवाशयात् ॥ ८ ॥

परि करिता भोक्ता ऐसें । हें जीवाचें तें चि दीसे ।  
जें शरीरिं पैसें । एकाधिए ॥ २९ ॥  
जैसा आथिला आणि विलासिया । तें चि उल्लेखें ए धनंजया ।  
जें राज्यसेव्या ठाया । वस्तिंसि ए ॥ ३० ॥  
तैसा अहंकर्तृत्वाचा वाडु । विषयेंद्रियांचा धुमाडु ।  
हा जाणिजे तें निवाडु । जें देहो पावे ॥ ३१ ॥  
अथवा शरीरातें संडी । तन्हीं चित्तेंद्रियांची तांडी ।  
आपणपेया सर्वें काढि । घेउनि जाए ॥ ३२ ॥  
जैसा अपमानिला अतिथि । ने सुकृताची संपत्ति ।  
कां साएखेडेयाची गति । सूत्रतंतु ॥ ३३ ॥  
नाना मालवतेनि तपनें । नेइजति लोकांचि दर्शनें ।  
हें असो द्रुति पवनें । नेइजे जैसी ॥ ३४ ॥

श्रोत्रं चक्षुः स्पर्शनं च रसनं घ्राणमेव च ॥

अधिष्ठाय मनश्चायं विषयाननुसेवते ॥ ९ ॥

तेर्वि मनःश्रेष्ठां एयां । इन्द्रियातें धनंजया ।  
देहराजु ने देहा । पासौनु घाला ॥ ३५ ॥

मग एथ अथवा स्वर्गि । जेथ देह अपंगी ।  
 तेथ तैसि चि पुडुती पागी । मनादिक ॥ ३६ ॥  
 जैसा माल्हुवलेयां दिवा । प्रमेसि जाए पांडवा ।  
 मग उजलिजे तेथ तेव्हां । तैसा चि फांके ॥ ३७ ॥  
 परि ऐसिया इया राहाटी । अविवेकियाचिये दीठी ।  
 एतुलें हें किरीटी । गमे चि गा ॥ ३८ ॥  
 जें आत्मा देहा आला । आणि विखो एणें चि भोगिला ।  
 अथवा देहौनु गेला । हें साच चि नां ॥ ३९ ॥  
 यन्हवि एणें जाणें । करणें हान भोगणें ।  
 हें प्रकृतिचें तेणें । मानियलें ॥ ४० ॥  
 परि देहाचें मोटकें उभें । चेतना तेथ उपलभे ।  
 तिये चलवलेचेनि मोहें । आला ह्मणति ॥ ४१ ॥

उत्क्रामंतं स्थितं वापि भुंजानं वा गुणान्वितं ॥  
 विमूढा नानुपश्यन्ति पश्यन्ति ज्ञानचक्षुषा ॥ १० ॥

तैसीं चि तिया संगति । इंद्रियें आपुलालां अर्थि ।  
 वर्तति तेया नांव सुभद्रापति । भोगणें जेया ॥ ४२ ॥  
 पाठि भोगक्षई आपैसैं । देह गेलेयां तें न दीसे ।  
 एथ तव गेला ऐसैं । बोभाति गा ॥ ४३ ॥  
 पैं रंखु डोलतु देखावा । तरि वारा वाजतु मानावा ।  
 रंखु नसे तेथ पांडवा । नाहिं चि काइ ॥ ४४ ॥  
 कां आरिसा संमोहर ठेविजे । आणि आपणपें तेथ देखिजे ।  
 तरि तेव्हां चि जाला मानिजे । काइ आदि नाहिं ॥ ४५ ॥  
 कां तो परौता केला आरिसा । लोपु जाला तेया आभासा ।  
 तरि आपणपें नाहिं ऐसा । निश्चो करावा ॥ ४६ ॥  
 सादु तरि आकाशाचा । परि कपालि पीटे मेवांचा ।  
 कां चांदि वेगु अभ्राचा । आरोपिजे ॥ ४७ ॥

तैसें होइजे जाइजे देहें । ते आत्मसत्ते अविक्रिये ।  
 निष्टंकिति मोहें । आंधले ते गा ॥ ४८ ॥  
 एथ आत्मा आत्मेयाचे ठाई । देखिजे देहाचा धर्म देहि ।  
 ऐसें देखणे ते पाहि । आन आहाति ॥ ४९ ॥  
 ज्ञानें कां जेयाचे ढोले । देखौनि नऱ्हांति देहिचे खोले ।  
 सूर्यरश्मि आणियालें । प्रीर्षि जैसैं ॥ ३९० ॥  
 तैसें विवेकाचेनि पैसैं । जेयाची स्फूर्ति स्वरूपि बैसे ।  
 ते ज्ञानिये देखति ऐसें । आत्मेयातें ॥ ५१ ॥  
 जैसैं तारांगण भरलें । गगनसमुद्रिं बिबलें ।  
 परि हें तूटौनि नाहि पडिलें । ऐसें निवडे ॥ ५२ ॥  
 गगन गगन चि आहे । हें आभासतसे तें वायें ।  
 तैसा आत्मा देखति देहें । गंवसिला हिं ॥ ५३ ॥  
 खलालांचेयां लगबगि । फेडौनि खलालांचेयां भागि ।  
 देखिजे चंद्रिका ते उगी । चंद्रि जेविं ॥ ५४ ॥  
 कां थिळर सोखे जैसैं । सूर्यो जैसा तैसा असे ।  
 देह होता जाता तैसें । देखति मातें ॥ ५५ ॥  
 घटमठ घडले । ते चि पाठिं मोडले ।  
 परि आकाश तें संचलें । असत चि असे ॥ ५६ ॥  
 तैसीं अखंडे आत्मसत्ते । अज्ञानदृष्टिकल्पितें ।  
 इयें देहें चि होतें जातें । जाणति फुडें ॥ ५७ ॥

यतंतो योगिनश्चैनं पश्यंत्यात्मन्यवस्थिते ॥

यतंतोप्यकृतात्मानो नैनं पश्यंत्यचेतसः ॥ ११ ॥

चैतन्य चढे ना उहटे । चेष्टवी ना चेष्टे ।  
 ऐसेनि आत्मज्ञानें चोखटें । जाणति ते ॥ ५८ ॥  
 आणि ज्ञान हिं आपैतें होइल । प्रज्ञा परिमाणु हिं उगीणा घेइल ।  
 सकळ शास्त्रां एइल । सर्वस्व हातां ॥ ५९ ॥



परि ते व्युत्पत्ति ऐसी । विरक्ति न रिगे मानसी ।  
 तरि सर्वात्मका मजसि । नोहे भेटि ॥ ३६० ॥  
 पै तोंड भरो कां विचारा । आणि अंतःकरण विषयांसि थारा ।  
 तरि नातुडे धनुर्द्धरा । त्रिशुद्धि मीं ॥ ६१ ॥  
 हांगा उ०सणातियांचां ग्रंथि । काइ तूटति संसारगुंति ।  
 किं परिवसिलियां पोथि । वाचिली होए ॥ ६२ ॥  
 नाना बांधौनियां डोले । प्राणिं लाविजति मुक्ताफलें ।  
 तरि तेयांचें काइ केलें । मोलमान ॥ ६३ ॥  
 तैसा चित्तिं अहंते ठाउ० । आणि जीभे सकलशास्त्रांचा सराउ० ।  
 ऐसेनि कोडी एकी जन्म जाउ० । परिं न पविजे मातें ॥ ६४ ॥  
 जो एकु मीं कां समस्ति । व्यापकु असे भूतजाति ।  
 आइकें तिये व्यक्ती । रूप करं ॥ ६५ ॥

यदादित्यगतं तेजो जगद्भासयतेखिलं ॥

यच्चंद्रमसि यच्चाग्नौ तत्तेजो विद्धि मामकं ॥ १२ ॥

तरि सूर्या सकट आघवी । हे विश्वरचना जे दावी ।  
 ते दीप्ति माझी जाणावी । आद्यन्ति हे ॥ ६६ ॥  
 जल सोखुनु गेलेयां सविता । उल्हासु पुरवितसे माघौता ।  
 ते चांदिं पांडुसुता । ज्योत्स्ना माझी ॥ ६७ ॥  
 आणि दहन पचन सिद्धि । करितसे जे निरवधि ।  
 ते हुताशि तेजोवृद्धि । माझी चि गा ॥ ६८ ॥

गामाविश्य च भूतानि धारयाम्यहमोजसा ॥

पुष्णामि चोषधीः सर्वाः सोमो भूत्वा रसात्मकः ॥ १३ ॥

मी रिगाला असे भूतलिं । हणौनि समुद्रमहाजलिं ।  
 ई पांसूची ढेंपुली । वीरे चि नां ॥ ६९ ॥  
 आणि भूतें हिं चराचरें । हे धरीतसे अपारें ।  
 तें मीं चि धरिं धरें । रिगौनियां ॥ ७० ॥

गगनि मीं पांडुसुता । चंद्राचेन मीसें अमृता ।  
 भरला जालां चालता । सरोवर ॥ ७१ ॥  
 तेथौनि फांकति रश्मिकर । ते पाट पेलौनि अपार ।  
 सर्वोषधींचे आगर । भरीतुसें मीं ॥ ७२ ॥  
 ऐसेनि सस्यादि सकला । करीं धान्यजाति रसाला ।  
 दें अन्नद्वारा जिह्वाला । भूतजातां ॥ ७३ ॥

अहं वैश्वानरो भूत्वा प्राणिनां देहमाश्रितः ॥

प्राणापानसमायुक्तः पचाम्यन्नं चतुर्विधं ॥ १४ ॥

आणि निफजविलेयां अन्न । तरि तैसें कैचें पां दीपन ।  
 जेणें जिरौनि समाधान । भोगिति जीव ॥ ७४ ॥  
 हणौनि प्राणिजाताचां घटि । करुनि कंदा वरि आगिळी ।  
 दीसि जठरि किरीटी । मीं चि जालां ॥ ७५ ॥  
 प्राणापानाचां जोडभातीं । फुंकफुंकौनियां अहोराती ।  
 आटितसे नेणों केती । उदरा माजि ॥ ७६ ॥  
 शुष्कें अथवा स्निग्धें । सुपक्वें कां विदग्धें ।  
 परि मीं चि गा चतुर्विधें । अन्नें पर्चीं ॥ ७७ ॥  
 एवं मीं चि आघवें जन । जना मीं चि जीवन ।  
 जीवना मुख्य साधन । वन्हि मीं चि ॥ ७८ ॥  
 आतां ऐसेया वरि काइ । सांघों व्यासिची नवाई ।  
 एथ दूजें नाहिं चि घेइ । सर्वत्र मीं ॥ ७९ ॥  
 तरि कैसेन पां वेखें । सदा सुखियें मानुषें ।  
 एक आक्रांत दुःखें । भूतजात ॥ ८० ॥  
 जैसें सगलिए पाटणी । एके चि दीपें दिवेलावणी ।  
 जालियां का नेदखणीं । उरलीं एके ॥ ८१ ॥  
 ऐसी हान उखिविखि । करितु आहासि मानसिकी ।  
 तरि ते हिं परियस नीकी । शंका फेइ ॥ ८२ ॥

पै आघवा चि मीं असें । एथ नाहिं किं अनारिसें ।  
 परि प्राण्यांचां ठांडं उल्हसे । बुद्धि ऐसी ॥ ८३ ॥  
 जैसें एका चि आकाशध्वनि । वाद्यविशेषि अनामी ।  
 वाजावें पडे भिन्नि । नादांतरि ॥ ८४ ॥  
 कां लोकचेष्टि वेगलाला । जो हा एकु चि भानु उदैला ।  
 तो अनाना परि गेला । उपेगासि ॥ ८५ ॥  
 नाना बीजधर्मा अनुरूप । झाडिं उभविळें आप ।  
 तैसें परिणमळें रूप । माझे जीवां ॥ ८६ ॥  
 आगा नेणा आणि चउरा । पुढां निलेयाचा दूसरा ।  
 नेणा सर्पत्वे जाला एरा । सुखा लागि ॥ ८७ ॥  
 हें असो स्वातिचें उदक । शुक्ति मोतिएं विआलीं विख ।  
 तैसें सज्ञानासि मीं सुख । दुःख तें अज्ञानासि ॥ ८८ ॥  
 सर्वस्यचाहं हृदि सन्निविष्टो मत्तः स्मृतिर्ज्ञानमपोहनं च ॥  
 वेदैश्च सर्वैरहमेव वेद्यो वेदांतकृद्वेदविदेव चाहं ॥ १५ ॥  
 पार्था सर्वांचां हृदयदेशि । अमुका हे स्फूर्ति ऐसी ।  
 जे स्फुरत अहिर्निशि । ते वस्तु गा मीं ॥ ८९ ॥  
 परि संतां सर्वे वसतां । योगज्ञानि पैसतां ।  
 गुरुचरण उपासितां । वैराग्येसि ॥ ९० ॥  
 एणें चि सत्कर्म । अशेष हिं अज्ञान विरमे ।  
 जेयाचें अहं विश्रमे । आत्मरूपि ॥ ९१ ॥  
 तें आपें आपु देखौनि देखि । मियां आत्मेन सदा सुखी ।  
 एथ मीं वांचौनि अवलोकि । आन हेतु असे ॥ ९२ ॥  
 आगा सूर्योदयो जालेयां । सूर्यो सूर्ये चि पाहावा धनंजया ।  
 तेवि मातें मीं जाणावेया । मीं चि हेतु ॥ ९३ ॥  
 ना शरीरप्रियातें सेवितां । संसारगौरव आइकतां ।  
 देहिं जेयाची अहंता । बुडौनि ठेली ॥ ९४ ॥

ते स्वर्गसंसारा लागि । धांवता कर्माचेयां मार्गि ।  
 दुःखाचां सेलमार्गि । भागीन होंति ॥ ९५ ॥  
 परि हें इं होणें अज्ञानां । मज चि तव तेया अर्जुना ।  
 जैसी जागृती चि हेतु स्वप्ना । निद्रिता होए ॥ ९६ ॥  
 पै अभें दिवसु हारतला । तो हिं तेणें चि जाणों आला ।  
 तेविं मीं नेणौनि विखो देखिला । मज चि तव भूति ॥ ९७ ॥  
 एवं नींदे कां जागणेया । प्रबोधु हेतु धनंजया ।  
 तेविं ज्ञानाज्ञानां जीवाचेया । मीं चि मूल ॥ ९८ ॥  
 हणौनु जैसा असें तैसेया । मातें नेणौनि धनंजया ।  
 वेदु जाणों गेला तवं तेया । जालिया शाखा ॥ ९९ ॥  
 तन्हि तिन्हीं शाखाभेदिं । मीं चि जाणिजे त्रिशुद्धि ।  
 जैसा पूर्वापरां नदीं । समुद्रु चि ठी ॥ १०० ॥  
 आणि महासिद्धांतापासिं । श्रुती हारपती शब्देसिं ।  
 जैसिया सगंधा आकार्शिं । वातलहरिया ॥ १ ॥  
 तैसें समग्र हिं श्रुतिजात । ठाके लाजिलें ऐसें निवांत ।  
 तें मीं चि करीं यथावत । प्रकटौनियां ॥ २ ॥  
 पाठिं श्रुतिसहित अशेख । जग हारपे जेथ निशेख ।  
 तें निजज्ञान हिं चोख । जाणता मीं ॥ ३ ॥  
 जैसें निदलेयां जागिजे । तेन्हलिं स्वप्निचें किर नाहिं दूर्जे ।  
 परि एकत्व हिं देखों पाविजे । आपुलें चि ॥ ४ ॥  
 तैसें आपुलें अद्वयपण । मीं जाणतु असें दूजेन विण ।  
 तेया हिं बोधा कारण । जाणता मीं चि ॥ ५ ॥  
 तरि आगि लागलेया कापुरा । काजली ना वैश्वानरा ।  
 उरणें नाहिं वीरा । जिया परी ॥ ६ ॥  
 तेविं समूल अविद्या खाए । तें ज्ञान हिं जें बुडौनि जाए ।  
 तें जें नाहिं किर नोहे । आणि असे हिं नां ॥ ७ ॥

पै विश्व घेउनि गेला मार्गेंसि । तेया चोरातें कव्हण गिबंसी ।  
 जे कोणही एकी दशा ऐसी । शुद्धा ते मीं ॥ ८ ॥  
 ऐसी जडाजडें व्यासि । रूप करितां कैवल्यपती ।  
 ठी केली निरुपहिती । आपुलां रूपि ॥ ९ ॥  
 तो आघवा चि बोधु सहसा । अर्जुनि उमटला कैसा ।  
 व्योमिचा चंद्रोदयो जैसा । क्षीरार्णवि ॥ १० ॥  
 कां प्रतिभीती चोखटे । समोरिला चित्र उमटे ।  
 तैसा अर्जुने आणि वैकुण्ठें । नांदतुसे बोधु ॥ ११ ॥  
 तनिह बापु वस्तुस्वभाउ । फांवे तवं तवं गोडिये थाउ ।  
 ह्मणौनि अनुभविचां राउ । अर्जुनु ह्मणे ॥ १२ ॥  
 जी व्यापकपण बोलतां । निरुपाधिक जें अनंता ।  
 स्वरूप प्रसंगता । बोलिले देउ ॥ १३ ॥  
 तें एकु वेलु अवंगवाणें । कीजो कां मज सांघणें ।  
 एथ द्वारकानाथु ह्मणे । भलें केलें ॥ १४ ॥  
 पै आह्मासि हें कोडें । अखंड बोलों आवडे ।  
 परि काइ किजे न जोडे । पूसतें तैसें ॥ १५ ॥  
 आजि मनोरथासि फल । जोडलासि तूं केवल ।  
 जें तोंड भरुनि निखल । आलासि पूसों ॥ १६ ॥  
 जें अद्वैता वरि भोगिजे । तिये अनुभविचें तूं विरजें ।  
 पूसौनि मज माझें । देतासि सुख ॥ १७ ॥  
 जैसा आरिसा आलेयां जवलां । दीसे आपणपेयां आपुला डोळा ।  
 तैसा संवादियां तूं निर्मला । शिरोमणि ॥ १८ ॥  
 तुवां नेणौनि पुसावें । मग आहिं परिसौनि बैसावें ।  
 तो पाडु एथ न मिरवे । सोइरेया ॥ १९ ॥  
 ऐसें ह्मणौनि आलंगिलें । कृपादृष्टी अवलोकिलें ।  
 मग मावौतें आदरिलें । बोल्यें अर्जुनेसि ॥ २० ॥

दों होंटि एक बोलणें । दोहिं चरणि एक चालणें ।  
 तैसैं प्रसणें सांघणें । तूखें माझें ॥ २१ ॥  
 एवं आक्षि तुक्षि वो एथें । देखावे एकार्थाथें ।  
 सांघतें प्रसतें तैथें । दोन्हीं एक ॥ २२ ॥  
 ऐसा भूलला मोहें । देउ आलंगिला न्हाए ठायें ।  
 मग बिहाला हणें नोहे । आवडी अजुनेसि ॥ २३ ॥  
 जालें इक्षुरसाचें डाल । तन्हि लवण देणें किडाल ।  
 जें संवादसुषाचें रसाल । नासैल थितें ॥ २४ ॥  
 आदिं चि आह्मां यया काहिं । नरनारायणां सीनें नाहिं ।  
 परि आतां जिरों माझां ठाई । वेगु माझा ॥ २५ ॥  
 इया बुद्धी सहसा । श्रीकृष्ण हणें वीरेशां ।  
 पै गा तो तुवां कैसा । प्रणु केला ॥ २६ ॥  
 जो अर्जुनु कृष्णि विरत होता । तो परतौनियां माघौता ।  
 प्रश्नावलिची कथा । आइकों धांवला ॥ २७ ॥  
 एथ सगद्रदें बोलें । अर्जुनें जी हणितलें ।  
 निरुपाधिक आपुलें । स्वरूप सांघां ॥ २८ ॥  
 एया बोला तो शांङ्गि । तें चि सांघावेया लागि ।  
 उपाधि दोहिं भागिं । निरूपितु असे ॥ २९ ॥  
 प्रसलेयां निरुपहित । उपाधि कां सांघे प्रस्तुत ।  
 हें कोण्हां हिं एथ । गमे जरि ॥ ४३० ॥  
 तरि ताकाचे अंश फेडणें । यया चि नावं लोणीं काढणें ।  
 चोखाचिये शुद्धि तोडणें । कीड चि जेविं ॥ ३१ ॥  
 बाबुलि सारावी हातें । परि पाणीं असे आइतें ।  
 अभ्र गेलेयां गगन तें । सिद्ध चि किं ॥ ३२ ॥  
 वरिल्ल कोडेयाचा गुंडाला । संजुनु केलेयां वेगला ।  
 कणु घेंतां विरंगुला । असे काहिं ॥ ३३ ॥

तैसा उपाधि उपहिता । सेबटु जेथ विचारिता ।  
 तें कोण्हां हिं न पूसतां । निरुपाधिक ॥ ३४ ॥  
 जैसैं न संघणें वरि । बाला पतिसि रूप करी ।  
 बोलु निमालेपणें विवरी । अचर्च्यातें ॥ ३५ ॥  
 पां सांघणेया जोगें नव्हे । तेथिचें सांघणें ऐसें आहे ।  
 ह्मणौनि उपाधि लक्ष्मीनाहें । बोलिजे आदिं ॥ ३६ ॥  
 पाडिवेयाची चंद्ररेखा । निरुता दाववेया शाखा ।  
 दाविजे तेवि औपाधिका । बोली इया ॥ ३७ ॥  
 मग ह्मणे गा सव्यसाची । पै इयें संसारपाटणिची ।  
 वस्ति सवियां दांची । दुपुरुखीं ॥ ३८ ॥

इविमौ पुरुषौ लोके क्षरश्चाक्षर एव च ॥

क्षरः सर्वाणि भूतानि कूटस्थोक्षर उच्यते ॥ १६ ॥

जैसिं आघवां चि गगनिं । नांदतें दिवोराती बोनी ।  
 तैसे संसारराजधानिं । दोन्ही चि हे ॥ ३९ ॥  
 आणीकु हिं तीजा पुरुखु आहे । परि एयां दोहिंचें नावं न साहे ।  
 जो उदैला गावेंसि खाए । दोन्हीतें ययां ॥ ४० ॥  
 परि ते तवं गोठि असौ । आदिं दोनी चि हे परियसों ।  
 जे संसारप्राप्तु वसों । आले असति ॥ ४१ ॥  
 एकु आंधला वेडा पंगु । एकु सर्वांगि पुरता चांगु ।  
 पारि ग्रामगुणें संगु । घडला दोघां ॥ ४२ ॥  
 तेयां माजि एका नावं क्षरु । एरातें ह्मणिजे अक्षरु ।  
 इहिं दोहिं चि पारि संसारु । कोंदला असे ॥ ४३ ॥  
 आतां क्षरु तो कवणु । अक्षरु किलक्षणु ।  
 हा अभिप्राउ संपूर्ण । विवंचूं गा ॥ ४४ ॥  
 तरि महदहंकारा । लागौनि धनुर्द्धरा ।  
 तृणातिचा पांगोरा । वेन्ही पै गा ॥ ४५ ॥

जें काहिं साने थोर । चालतें अथवा थिर ।  
 किबहुना गोचर । मनबुद्धिसि ॥ ४६ ॥  
 जेतुलें पांचभौतिक घडतें । जें जें नावरूपा सांपडतें ।  
 गुणत्रयाचां पडतें । कामठां जें ॥ ४७ ॥  
 भूताकृतिचें नाणें । घडत भांगारें जेणें ।  
 कालासि जुं खेलणें । जिहिं कवडा ॥ ४८ ॥  
 जाणणेनि चि विपरीतें । जें जें काहिं जाणजतें ।  
 तें प्रतिक्षणिं निमतें । होउनियां ॥ ४९ ॥  
 आगा काढौनि आंतिचे दांग । उभवी स्तिष्टिचे आंग ।  
 हें असो बहू जग । जेया नावं ॥ ४५० ॥  
 पै अष्टधा भिन्न ऐसें । जें दाविलें प्रकृतिमीसें ।  
 जें क्षेत्रद्वारें सतिसें । भागिं केलें ॥ ५१ ॥  
 हें मागिलें सांघों केती । आगा आतां चि जें प्रस्तुतिं ।  
 रुखाकाररूपकरीती । निरूपिलें ॥ ५२ ॥  
 तें आघवें चि साकारें । कल्पौनि आपणापेयां पुरें ।  
 जालें असे तदनुसारें । चैतन्य चि ॥ ५३ ॥  
 जैसा कुहां आपण चि बिंबे । सींहु प्रतिबिंब पांतां खोभे ।  
 खोभला समारंभे । घली तेथ ॥ ५४ ॥  
 कां सलिलिं असत चि असे । व्योमा वारि व्योम बिंबे जैसें ।  
 अद्वैत होउनि तैसें । द्वैतें घेपें ॥ ५५ ॥  
 अर्जुना गा यया परी । साकारु कल्पौनि पुरी ।  
 आत्मा विस्मृतिची करी । नीद तेथ ॥ ५६ ॥  
 पै स्वप्निं सेजारु देखिजे । मग पड्डणें जैसें कीजे ।  
 तैसें पूरि शयन जाणिजे । आत्मेयासि ॥ ५७ ॥  
 पाठिं तिये नीदेचेनि भरें । मिं सुखी दुःखी झणतु घोरें ।  
 अहंमत्वाविचेन घोरें । अस्वप्नाए सादु ॥ ५८ ॥



हा जनकु हे माता । हा मी गौरु हीनु पुरता ।  
 पुत्र वित्त कांता । माझी हे नां ॥ ५९ ॥  
 ऐसेया वेंघौनि स्वप्ना । धांवतु भवस्वर्गाचिया राना ।  
 तैया चैतन्या नावं अर्जुना । क्षरु पुरुखु गा ॥ ४६० ॥  
 आतां क्षेत्रबु नावें एणें । जेयातें बोलणें ।  
 जगि जीउ हणणें । जिये दशेतें ॥ ६१ ॥  
 जो आपुलेन विसरें । सर्व भूतत्वे अनुकरे ।  
 तो आत्मा बोलिजे क्षरें । पुरुखु नावें ॥ ६२ ॥  
 जो यस्तुस्थिती पुरता । हणौनि आली पुरुषता ।  
 वरि देहपुरी निदैजता । पुरुषु नावें ॥ ६३ ॥  
 आणि क्षरपणाचा नाथिला । आलु यया ऐसेनि आला ।  
 तिये उपाधी आतला । हणौनियां ॥ ६४ ॥  
 जैसी खलालिचेया उदका । सरिसी उदले चंद्रिका ।  
 तैसा विकारां औपाधिकां । ऐसा चि गमे ॥ ६५ ॥  
 कां खलाल मोटका सोसे । आणि चंद्रिका तैसी चि भंशे ।  
 तैसा उपाधिनाशि न दीसे । औपाधिकु फुरे ॥ ६६ ॥  
 ऐसें उपाधिचेनि पाडें । क्षणिकत्व यया जोडे ।  
 तेणें खोंकरपणें घडे । क्षरु नावं ॥ ६७ ॥  
 एवं जीवचैतन्य आघवें । हें क्षरु पुरुखु जाणावें ।  
 आतां रूप करुं बरवें । अक्षरासि ॥ ६८ ॥  
 तरि अक्षरु जो दूसरा । पुरुषु पै धनंजया ।  
 तो मध्यस्थु गा गिरिवरा । मेरु जैसा ॥ ६९ ॥  
 जें तो पृथ्विपातालस्वर्ग । इहि न भेदे तिहि भागि ।  
 तैसा ज्ञानाज्ञानांगि । पडे ना जो ॥ ७० ॥  
 नां यथार्थज्ञानें एक होणें । ना अन्वार्थत्वे दूजें घेणें ।  
 ऐसें देहि निखल जें नेणणें । तें तें चि रूप ॥ ७१ ॥

पांसुता निःशेष जाए । नां घटभांडादिकिं होए ।  
 तेया मृत्पिंडा ऐसैं आहे । मध्यस्थु जो ॥ ७२ ॥  
 पै आटौनि गेल्यां सागर । मग तरंग ना नीर ।  
 तया ऐसिया अनाकार । जे कां दशा ॥ ७३ ॥  
 पार्था जागणें तरि लुडे । परि स्वप्नाचें कांहि न मांडे ।  
 तैसीये नीदे सांकडें । निहालिजे ॥ ७४ ॥  
 विश्व आघवें मावळें । आणि आत्मबोधु नुजळे ।  
 तिये अज्ञानदशे केवळे । अक्षर नावं ॥ ७५ ॥  
 सर्वां कलिं संडिलें जैसैं । चांदपण उरलें अवसे ।  
 रूप जाणें तैसैं असे । अक्षराचें ॥ ७६ ॥  
 पै सर्वोपाधिविनासैं । हे जीवदशा जेथ पैसे ।  
 फलपाकिं तैसैं । झाड बाजिं ॥ ७७ ॥  
 तैसैं उपाधिसिं उपहित । थोकौनि ठाके जेथ ।  
 तेयातें अव्यक्त । बोलति गा ॥ ७८ ॥  
 जेयासि गा बीजभाउ । वेदान्ति केला ऐसा आहो ।  
 तो तेया पुरुषा ठाउ । अक्षराचा ॥ ७९ ॥  
 जेथौनि अन्यथा ज्ञान । फांकौनि जागृति स्वप्न ।  
 नानाबुद्धिचें रान । रिगालें असे ॥ ८० ॥  
 जीवत्व जेथौनि किरीटी । विश्व उठवित चि उठी ।  
 ते उभयबुद्धिची मीठी । अक्षर पुरुष ॥ ८१ ॥  
 एरु क्षर पुरुष कां जनि । जिहिं खेले जागृतिस्वप्नि ॥  
 तिया अवस्था जिया दोन्हि । वियाला गा ॥ ८२ ॥  
 पै अज्ञान घनसुषुप्ति ॥ ऐसैसी जे ख्याति ।  
 इया उणिवे प्राप्ति । ब्रह्माची जे ॥ ८३ ॥  
 साच चि पुढुतीं वीरा । जरि मैयंता स्वप्नजागरा ।  
 तरि ब्रह्मभाउ साचोकारा । ह्मणों यंता ॥ ८४ ॥

परि प्रकृतिपुरुषे दोन्हि । अत्रे जाळि जिये गगनि ।  
 क्षेत्रक्षेत्रज्ञ स्वप्नि । देखिलीं जिये ॥ ८५ ॥  
 हे असो अधोशाखा । यया संसाररूपा रुखा ।  
 मूल ते पुरुखा । अक्षराचे ॥ ८६ ॥  
 हा पुरुष कां ह्मणिजे । जें पूर्णपणें चि निजें ।  
 पै मायापुरि पडुडिजे । तेणें हिं बोळें ॥ ८७ ॥  
 आणि विकारांची जे वारी । ते विपरीतज्ञानाची परी ।  
 नेणिजे तिये माझारि । ते सुषुप्ति हा ॥ ८८ ॥  
 ह्मणौनियां आपैसैं । क्षरणें यया नसे ।  
 आणि कहीं चि हा न नसे । ज्ञाना उणें ॥ ८९ ॥  
 यया लागि हा अक्षर । ऐसा वेदांति डोर ।  
 केला देशि थोर । सिद्धांतांचां ॥ ९० ॥  
 ऐसैं जीवकार्यकारणें । जेया मायासंगु चि लक्षणें ।  
 अक्षर पुरुष जाणें । चैतन्य ते ॥ ९१ ॥  
 आतां अन्यथाज्ञानि । दोनी अवस्था जिया जनि ।  
 तिया हारपति घनि । अज्ञानतत्वि ॥ ९२ ॥  
 ते अज्ञान ज्ञानि बुडालेयां । ज्ञानें कीर्त्तिमुखत्व केलेयां ।  
 जैसा वन्हि काष्ट जालौनियां । स्वयें जळें ॥ ९३ ॥  
 तैसें अज्ञान ज्ञानें नेळें । आपण वस्तु होउनु ठेळें ।  
 ऐसैं जाणणेन विण उरळें । जाणतें जें ॥ ९४ ॥

उत्तमः पुरुषस्त्वन्यः परमात्मेत्युदाहृतः ॥

यो लोकत्रयमाविश्य बिभर्त्यन्यमीश्वरः ॥ १७ ॥

आगा तो उत्तमु पुरुषु । जो तृतीयु कां निष्कर्षु ।  
 दोहीं इं हुनु आणिकु । आदिलां जो ॥ ९५ ॥  
 सुषुप्ती आणि स्वप्ना । पासौनु बहू अर्जुना ।  
 जाणणें जैसैं आना । बोधाचें चि ॥ ९६ ॥

कां रश्मि हान मृगजला । पासौनि अर्कमंडला ।  
 अफाटु तैसा वेगला । उत्तमु गा ॥ ९७ ॥  
 नातरि काष्टिचा काष्टाहूनि । अनारिसा जैसा वन्हि ।  
 तैसा क्षराक्षरा पासौनि । आनु चि तो ॥ ९८ ॥  
 पैं प्रसौनि आपुलिया मर्यादा । एक करीतु नदीनदां ।  
 उठिला कल्पातिचा उदावादा । एकार्णवाचा ॥ ९९ ॥  
 तैसैं स्वप्न ना सुषुप्ति । जागराची गोठि चि नाथि ।  
 जैसी गलिली दिवोराती । प्रलयतेजें ॥ ५०० ॥  
 मग आपण ना दुजें । असे नसे हें नेणिजे ।  
 अनुभौ निर्बुजें । बुडाला जेथ ॥ १ ॥  
 ऐसैसैं आथि काहिं । तें तो उत्तमु पुरुष पाहिं ।  
 जें परमात्मा इहिं । बोलिजे नामीं ॥ २ ॥  
 तें हिं एथ न मिसलतां । बोलिलें जीवत्वे पांडुसुता ।  
 जैसी बुडणेयाची वार्ता । थडिए किजे ॥ ३ ॥  
 तैसैं विवेकाचिये कांठि । उभें केलेयां किरीटी ।  
 पारावाराचिया गोठि । करणें वेदां ॥ ४ ॥

यस्मात्क्षरमतीतोहमक्षरादपि चोत्तमः ॥

अतोश्मि लोके वेदे च प्रथितः पुरुषोत्तमः ॥ १८ ॥

ह्यणौनि पुरुष क्षराक्षर । दोन्हि देखौनि अनावर ।  
 ययातें ह्यणति पर- । आत्मरूप ॥ ५ ॥  
 अर्जुना ऐसिये परी । परमात्माशब्द वन्हि ।  
 सूचिजे गा अवधारिं । पुरुषोत्तमु ॥ ६ ॥  
 यन्हविं नबोलणेन बोलणें । जेथिचें सर्व नेणिवां जाणणें ।  
 काहिं चि नहोउनि होणें । जें वस्तु गा ॥ ७ ॥  
 सोहं तें हिं अस्तवळें । जेथ सांघणें चि मूकावळें ।  
 दृष्ट्वांसि विराळें । दृश्य जेथ ॥ ८ ॥

आतां बिबा आणिं प्रतिबिबा । माजि कैची ही सणों नैए प्रभा ।  
 जन्हि कैसेन हिं लाभा । जाए चि ना ॥ ९ ॥  
 कां घ्राणा आणि फुला दोहिं । वृत्ति असे माझारिळां ठाई ।  
 न दीसे तन्हि नाहिं । बोळों नैए ॥ ५१० ॥  
 तैसें द्रष्टा दृश्य हें जाए । मग कोणु ह्मणे काइ आहे ।  
 हें अनुभवे चि पाहे । रूप जेया ॥ ११ ॥  
 जो प्रकाश्ये विण प्रकाशु । जो ईशितव्ये विण ईशु ।  
 आपणेन चि अवकाशु । वसवितु असे ॥ १२ ॥  
 जो नादे आइकिजता नादु । स्वादे चाखविजता स्वादु ।  
 जो भोगिजतु असे आनंदु । आनंदे चि ॥ १३ ॥  
 सुखासि सुख जोडलें । जें तेज तेजासि सांपडलें ।  
 भून्य हिं बुडलें । शून्य जिये ॥ १४ ॥  
 तो पूर्णतेचा पारिणामु । पुरुषु गा सर्वोत्तमु ।  
 विश्रांतिचा विश्रामु । विराला जेथ ॥ १५ ॥  
 जो आकाशा हि वारि उरता । प्रासातें हिं प्रसुनि पुरता ।  
 जो बहुतें पाडें बहुता । पासौनि बहू ॥ १६ ॥  
 पै नेणतेया प्रती । रूपेणार्ची प्रतीती ।  
 रूपें नोहौनि शुक्ति । दावी जेविं ॥ १७ ॥  
 कां नाना अलंकारदसे । सोनें न लपतां आलें असे ।  
 विश्व नोहौनि तैसें । विश्व जो धरी ॥ १८ ॥  
 हें असो जल तरंगा । नाहिं सिनानेपण जेविं गा ।  
 तेविं सत्ताप्रकाशु जगा । आपण चि जो ॥ १९ ॥  
 आपुलेयां संकोचविकासा । आपण चि रूप वीरेशा ।  
 हा जलिं चांदु हान जैसा । समूठ गा ॥ ५२० ॥  
 तैसा विश्वपणें काहिं होए । नां विश्वलोपिं के हि जाए ।  
 जैसा रस्तीदिहो नेहे । द्विधा रवि ॥ २१ ॥

तैसा काहिं चि कोणही कडे । काइसेन हि वेचि न पडे ।

जेयाचें सांकडें । जेयासि चि ॥ २२ ॥

जो आपणपें चि आपणेयां । प्रकाशितुसे धनंजया ।

काइ बहु बोलों जेया । नाहिं दूर्जे ॥ २३ ॥

तो गा मीं निरुपाधिकु । क्षराक्षरोत्तमु एकु ।

हणौनु हणो वेदलोकु । पुरुषोत्तमु ॥ २४ ॥

यो मामेवमसंमूढो जानाति पुरुषोत्तमं ॥

स सर्वविद्भजति मां सर्वभावेन भारत ॥ १९ ॥

परि असो ऐसेया । मज पुरुषोत्तमातें धनंजया ।

जाणे जो पाहालेयां । ज्ञानमित्रें ॥ २५ ॥

चेइलेयां आपुलें ज्ञान । जैसें नाहिं चि होए स्वप्न ।

तैसें फुरतें जेया त्रिभुवन । वाउं जालें ॥ २६ ॥

कां हातिं घेतली माला । फीटे सर्पाभासाचा कांटाला ।

तैसें माझेन बोधें टवाला । नांगवे जो ॥ २७ ॥

लेणें सोनें चि जो जाणे । तो लेणेपण तें वाउं हणो ।

तेविं जाणौनि जेणें । वालिला भेदु ॥ २८ ॥

मग सर्वत्र सच्चिदानंदु । मीं चि एकु स्वतःसिद्धु ।

जो आपणेनसिं भेदु । नेणौनि जाणे ॥ २९ ॥

तैसें चि सर्व जाणितलें । हें इं हणणें थेकुलें ।

जें तेया सर्व उरलें । द्वैत नाहिं ॥ ५३० ॥

हणौनि माझेया भजना । उचित तो चि अर्जुना ।

गगन जैसें आलंगना । गगनाचेया ॥ ३१ ॥

क्षीरसागरा परगुणें । किजे क्षीरसागरपणें ।

कां अमृत चि होउनि मिलणें । अमृतिं जेविं ॥ ३२ ॥

साडपन्हरां मिसलावें । तारी पन्हरें चि जेविं होआवें ।

तेविं मीं जालेयां संभवे । भक्ति माझी ॥ ३३ ॥

हांगा सिंधुसि आनी होंति । सरि गंगा कैसेन फिरे माघौती ।  
 ह्मणौनि मी नोहतां भक्ति । अन्वयो आहे ॥ ३४ ॥  
 ऐसेया लागि सर्धि प्रकारि । जैसा कल्लोल अनन्य सागारि ।  
 तैसा मातें अवधारी । भजिनला तो ॥ ३५ ॥  
 सूर्या आणि प्रभे । एकवंकै जेणें लोभें ।  
 तो पाहु मानुं लाभे । भजना तेया ॥ ३६ ॥  
 एवं कथिलेयादारभ्य । जें हें सर्वशास्त्रैकलभ्य ।  
 उपनिषदां सोरभ्य । दशदलांचें ॥ ३७ ॥  
 हें जें ब्रह्माचेनि नवनीतें । व्यासुप्रज्ञेचेनि हातें ।  
 मथुनि काढिलें आइतें । सार आझि ॥ ३८ ॥

इति गुह्यतमं शास्त्रमिदमुक्तं मयानघ ॥

एतद्बुद्ध्वा बुद्धिमान्स्यात्कृतकृत्यश्च भारत ॥ २० ॥

जे ज्ञानामृताची जाह्णवी । जे आनंदचंद्रिची सतरावी ।  
 विचारक्षीराणविची नवी । लक्ष्मी जे हे ॥ ३९ ॥  
 ह्मणौनि आपुलेनि पदें वर्णे । अर्थाचेनि जीवें प्राणें ।  
 मीं बांचौनि होउं नेणें । आन काहिं ॥ ५४० ॥  
 क्षराक्षरत्वे संमोहर जालें । तें पुरुषत्वे वालिलें ।  
 मग मज सर्वस्व दीधलें । पुरुषोत्तमिं ॥ ४१ ॥  
 ह्मणौनि जागिं गीता । मियां आत्मेन पतिव्रता ।  
 जे हे प्रस्तुतिं आतां । तुवां आकर्णिली ॥ ४२ ॥  
 साच चि बोलाचें नोहे शास्त्र । पै संसार जीणतें हें शस्त्र ।  
 आत्मा अवतरवितें मंत्र । अक्षरें इयें ॥ ४३ ॥  
 पारि तुज पुढां सांधितलें । तें अर्जुना ऐसें जालें ।  
 गोप्य धन काढिलें । माझे आजि ॥ ४४ ॥  
 मज चैतन्यशंभुचां माथां । जो निक्षेपु होता पार्था ।  
 तेया गौतमु जालासि आस्था । निधि तुं गा ॥ ४५ ॥

चोखटिवां आपुलिया । पुढिला उगाणा घेयावेया ।  
 तेया दर्पणाची परी धनंजया । केली आक्षां ॥ ४६ ॥  
 कां भरलें चंद्रतारांगार्णि । नभ सिंधु आपणेयां आणी ।  
 तैसा गीतेसिं मीं अंतःकराणि । सूदलां तुवां ॥ ४७ ॥  
 जें त्रिविधमलकटां । संडिलासि सूभटा ।  
 ह्मणौनि गीतेसिं मज वसैठा । जालासि गा ॥ ४८ ॥  
 परि हें काइ बोलों गीता । जे हे माझी उन्मेखलता ।  
 जाणे तो समस्तां । मोहां मूके ॥ ४९ ॥  
 सेविळी अमृतसरिता । रोगु दवडुनि पांडुसुता ।  
 अमरपण उचिता । देउनि घली ॥ ५० ॥  
 तैसी गीता हे जाणितलियां । काइ विस्मो मोहो जावेया ।  
 परि आत्मज्ञानें आपणपेयां । मीलजे एथ ॥ ५१ ॥  
 जेया आत्मज्ञानाचां ठांड । कर्म आपुलेया जीविता पाई ।  
 होउनियां उतराई । लया जाए ॥ ५२ ॥  
 हारपलें दाउनि जैसा । मागु सरे वीरविलासा ।  
 ज्ञानें कलसु वलवे तैसा । कर्मप्रासादा ॥ ५३ ॥  
 ह्मणौनि ज्ञानियां पुरुखां । कृप करुं सरलें देखां ।  
 ऐसा अनाथाचा सखा । बोलिला तो ॥ ५४ ॥  
 तें श्रीकृष्णवदनामृत । पार्थु भरुनि असे ॐसंडत ।  
 तव व्यासकृपा एत । संजयासि ॥ ५५ ॥  
 तो धृतराष्ट्र राया । सूत असे पान करावेया ।  
 ह्मणौनि जीवितांतु तेया । नव्हे चि भारी ॥ ५६ ॥  
 यन्हविं गीताश्रवणअवसरिं । आवडों लागतां अनधिकारी ।  
 पारि सेखिं ते चि उजिरी । पांति लाभली ॥ ५७ ॥  
 जेधवां द्राक्षिं दूध घातलें । तेधवां वायां गेलें गमलें ।  
 परि फलपार्किं दूणावलें । देखिलें जेविं ॥ ५८ ॥



तैसि हरिषक्किचीं आखरें । संजयें सांवितळि आदरें ।  
 तिहि अंधु तो अवसरें । सुखिया जाला ॥ ५९ ॥  
 तें चि मन्हाटेनि विन्यासें । मियां उन्मेखें ठसेंठोमसें ।  
 जाणों नेणों तैसें । निरोपिलें ॥ ५६० ॥  
 सेवतिए अरसिकां हिं । आंग पांतां विशेषु नाहिं ।  
 परि सौरभ्य नेलें तिहिं । भ्रमरिं जाणिजे ॥ ६१ ॥  
 तैसें घड तें प्रमेय घेइजे । न्यून तें तें मज देइजे ।  
 जें नेणणें हें साहाजें । रूप किं बाला ॥ ६२ ॥  
 परि नेणतें जन्हि होए । तन्हि देखौनि बापु किं माए  
 हरिखु कें हिं न माए । चोज करिति ॥ ६३ ॥  
 तैसें संत माहिएर माझें । तुझि मीनलेयां मीं लाडैजे ।  
 तें चि ग्रंथाचेनि व्याजें । जाणिजो जी ॥ ६४ ॥  
 आतां विश्वात्मकु माझा । स्वामी श्रीनिवृत्तिराजा ।  
 तो अवधारु वाक्यपूजा । ज्ञानदे० हणो ॥ ६५ ॥

इति श्रीमद्भगवद्गीतासूपनिषत्सु ब्रह्मविद्यायां योगशास्त्रे

श्रीकृष्णार्जुनसंवादे पुरुषोत्तमयोगो

नाम पंचदशोऽध्यायः ।

॥ श्रीकृष्णार्पणमस्तु ॥



# ज्ञानेश्वरी

## अध्याय सोळावा

श्रीकृष्णाय नमः ॥

मावलवितु विश्वाभासु । उवल उदैजेला चंडांशु ।  
अद्वयाअब्जिनीविकाशु । वंदूं आतां ॥ १ ॥  
जो अविशे राती रुसौनियां । गिली ज्ञानअज्ञानाचिया चांदणियां ।  
जो सुदीनु करी ज्ञानियां । स्वबोधाचा ॥ २ ॥  
जेणें विवळतिये सवले । लाहूनि आत्मज्ञानाचे डोले ।  
सांडीति देहअहंतेचें आर्विसालें । जीवपक्षी ॥ ३ ॥  
लिंगदेहकमलाचां । पोर्तिं वेचतेया चिद्गमराचां ।  
बंदिं मोक्षु जेयाचां । उदैला होये ॥ ४ ॥  
शब्दाचिया अशंकडी । भेदनदिचां दोहीं थडीं ।  
अरडांतें विरहवेडी । बुद्धि बोधीं ॥ ५ ॥  
तें याचकाचें मिथुन । समरस्याचें समाधान ।  
भोगवि जो चिद्गगन । भवनदिवा ॥ ६ ॥  
जेणें पहालेनि पाहाटे । भेदाची चोखेल फीटे ।  
रीगति आत्मानुभववाटे । पंथिक योगी ॥ ७ ॥  
जेयाचेंनि विवेककिरणसंगें । उन्मेखसूर्यकांत—स्फुर्लिंगें ।  
दीपले जालीति दांगें । संसाराचीं ॥ ८ ॥

जेयाचा रश्मिपुंजु निबरु । होंतां स्वस्वरूपउबारीं स्थीरु ।  
 ये महासिद्धिचा पूरु । मृगजलाचा ॥ ९ ॥  
 जो प्रत्यग्बोधाचेया मार्थेया । सोहंतेचां मध्यान्हीं आलेयां ।  
 लपे आत्मभ्रांतिछाया । आपणपां चि ॥ १० ॥  
 तेव्हलिं विश्वस्वप्ने सहितें । कोण अन्यधामतिनिदेतें ।  
 सांभालिं नुरे चि जेथें । मायाराति ॥ ११ ॥  
 ह्यणौनि अद्वयबोधपाटणीं । महानंदाचिया दाटणीं ।  
 मग सुखानुभौ तिहिं घेणीं । मंदवों लागे ॥ १२ ॥  
 किंबहुना ऐसैसैं । मुक्तातें कैवल्यसुदिसैं ।  
 सदा लालिजे कां प्रकाशें । जेयाचेनि ॥ १३ ॥  
 जो निजधामव्योमिचा राउ ॥ उदैला चि उदैजतखेउ ॥  
 फेडी पूर्वादिदिशांचा ठावो । उदोअस्तूंचा ॥ १४ ॥  
 न दिसणें दीसणेनसिं मावलवी । दोहों झांकलें सैध पघलवी ।  
 काइ बोलें आघवी । उखा चि ते आनी ॥ १५ ॥  
 तो अहोरात्राचा पैलकडु । कोणें देखावा ज्ञानमार्तुडु ।  
 प्रकास्यें विण सुरवाडु । प्रकाशाचा ॥ १६ ॥  
 तेया चित्सूर्या श्रीनिवृत्ती । आतां नमो चि ह्यणें पुडुतीं ।  
 जो बाधकां येइजताहे स्तुती । बोलाचिया ॥ १७ ॥  
 वेदांचें मान पाउनियां । स्तुती तरि एइजे चांगावेया ।  
 जरि स्तव्यबुद्धिसिं लया । जायिजे कां ॥ १८ ॥  
 जो सर्व नेणिषां जाणिजे । मौनाचिया मिठिया वर्णिजे ।  
 काहिं चि नोहुनि आणिजे । आपणेयां जो ॥ १९ ॥  
 जेया तुझेया उद्देशा साठि । पश्यंती मध्यमापोटीं ।  
 सूनू परेसीं हीं पाठीं । वैखरी विरे ॥ २० ॥  
 तेया तूतें मीं सेवकपणें । लेवनिं बोलिकेयां स्तोत्रांचें लेणें ।  
 हें उपसाहावें हीं ह्यणतां उणें । अद्वयानंदा ॥ २१ ॥

### अध्याय १६ वां

परि रंकें अमृतसागर । देखिलेयां पडे उचिताचा विसर ।  
 मग करुं धांवें पाहुणेरु । शाकांचा तेया ॥ २२ ॥  
 तेथ शाकु किरु बहुतु हगवा । तेयाचा हर्षवेगू चि तो बेयाबा ।  
 उजळ दिव्यतेजा हाथैवा । ते भक्ति पावी ॥ २३ ॥  
 बाला उचित जाणणें होये । तरि बालपण चि कें आहे ।  
 परि साच चि एरि माए । हणौनि तोषे ॥ २४ ॥  
 हां गा गावरसेया भरलें । पाणी पाये देंत वरि आलें ।  
 तें गंगा काडू देखिलें । आनी दीठी ॥ २५ ॥  
 जी चांगु कैसा अपकार । किं तो मानूनि प्रियउपकार ।  
 तोषे चि ना सारंगधर । वृत्तनेसि ॥ २६ ॥  
 कां आंधरेनि खतैलें अंबर । जालेयां दिवसनाथा समोर ।  
 तेणें तें परतें सर । हणितलें कायी ॥ २७ ॥  
 तेवि भेदबुद्धिचिये तुलें । घालूनि सूर्यश्लेषाचें कांटालें ।  
 तूकिलासि तें अल्लें । पुरें करीं जी ॥ २८ ॥  
 जिहीं ध्यानाचां डोलां पाहिलासि । वेदादिवाचा वानिलासि ।  
 जें उपसाहिलें तेयांसि । तें आह्मां करीं ॥ २९ ॥  
 परि आजि मीं तूझा गुणी । लांचवलां अपराधु न गणीं ।  
 भलेतें करीं आधधणी । नूठिं कदा ॥ ३० ॥  
 मियां गीता येणें नावें । तूझें यश हें अमृत सुहावें ।  
 वानुं लाधलेति तें दूणेनि थावें । दैवलदैव ॥ ३१ ॥  
 माक्षिया सत्यवाचा तप । केलें बहुत कल्प ।  
 तेया फलाचें हें महाद्वीप । पातली प्रभू ॥ ३२ ॥  
 पुण्यें पोसिलिं असाधारणें । तियें तुझे गुण वानणें ।  
 देउनि मज उरिणें । जालिं आजि ॥ ३३ ॥  
 जी जीविताचां आढवीं । आंतुडलेयां मरणगावीं ।  
 ते अवदशा चि आघवी । फीटली हे ॥ ३४ ॥

## भाषार्थदीपिका

जे गीतापणें नावणिगी । जे अविद्या जीणौनि दादुगी ।  
 ते कीर्ति तूझी आम्हां जोगी । वानावेया जाली ॥ ३५ ॥  
 पै निर्धनां घरीं वानवसें । महालक्ष्मी एउनि बैसे ।  
 तेया ही वरतें निर्द्धन ऐसें । झणों ए कायि ॥ ३६ ॥  
 अंधकाराचेया ठाया । दैवें सूर्यो आलेयां ।  
 तें आंधारु चि जगा येया । प्रकाशु नोहे ॥ ३७ ॥  
 जेया देवाची पाहातां थोरी । विश्व परमाणु हिं दशा न धरी ।  
 तो भक्ताचेया सरोभरी । नव्हे चि कायि ॥ ३८ ॥  
 तैसें मीं गीता वाखाणीं । ये खपुष्पाची किर तुरंबणी ।  
 परि समर्थे तुवां सिरियाणीं । फेडिली ते ॥ ३९ ॥  
 झणौनि तूझेनि प्रसादें । मी गीता पद्यें अगाधें ।  
 निरोपीन जी विशदें । ज्ञानदेउ झणे ॥ ४० ॥  
 तरि अध्यायिं पन्हरावां । श्रीकृष्णें तेया पांडवा ।  
 शास्त्रसिद्धांतु आघवा । उगाणिला ॥ ४१ ॥  
 जें वृक्षरूप परिभाषा । केलें उपाधिरूप अशेषा ।  
 सदैवें जैसें दोषां । आंगलीनां ॥ ४२ ॥  
 आणि कूटस्थु जो अक्षर । दाविला पुरुषाकार ।  
 तेणें उपहिता ही आकार । चैतन्या केला ॥ ४३ ॥  
 पाठि उत्तमु पुरुषु । शब्दाचें करुनि मीष ।  
 दाविलें चोख । आत्मतत्त्वी ॥ ४४ ॥  
 आत्मविषयीं आंतुवट । साधन गा आंगदट ।  
 ज्ञान होये हें इं स्पष्ट । चावललां ॥ ४५ ॥  
 झणौनि ये अध्याइं । निरूप्य नुरे चि काहीं ।  
 आतां गुरुशिष्यां दोहीं । स्नेहो लाहाणों ॥ ४६ ॥  
 एवं ये विशि किर । तेयातें बुझाविलें अपार ।  
 परि मुमुक्ष इतर । साकांक्ष जाले ॥ ४७ ॥

जे मज पुरुषोत्तमा । ज्ञाने भेटे सुवर्मा ।  
 तो सर्वज्ञ ते चि सीमा । भक्तिची ही ॥ ४८ ॥  
 ऐसें जें त्रैलोक्यनायकें । बोलिलें अध्यायांत श्लोकें ।  
 तेथ ज्ञान चि बहू येकें । तोषें वानिलें ॥ ४९ ॥  
 भरुनु प्रपंचा घोटु । कीजे देखतां चि देखतेया द्रष्टु ।  
 आनंदसाम्राज्यां पाटु । बांधिजे जीवा ॥ ५० ॥  
 एवढेया लाभाचा उपावो । आनु नाहिं चि क्षणे देऊ ।  
 सम्यग्ज्ञाना हो राऊ । उपाया पुढुतीं ॥ ५१ ॥  
 ऐसे आत्मजिज्ञास जे होतें । तोखलेनि चित्तें ।  
 आदरें तेया ज्ञानातें । बोत्रालिलें जीवें ॥ ५२ ॥  
 आतां आवडि जेथ पडे । तेयाची अवसरी पुढें पुढें ।  
 रिगो लागे हें घडे । प्रेम ऐसें ॥ ५३ ॥  
 क्षणौनि जिज्ञासुचां पैकीं । ज्ञानीं प्रीति होये नां जब नीती ।  
 तव योगक्षेमु ज्ञानविधिं । स्फुरला चि ॥ ५४ ॥  
 क्षणौनि तें चि सम्यग्ज्ञान । कैसेनि होये स्वाधीन ।  
 जालेयां वाडजतन । केवि निफजे ॥ ५५ ॥  
 कां उपजों चि जेणें न लाहे । जें उत्पन्न हीं अण्हाटा सुये ।  
 तें ज्ञान काडू वोखटें आहे । हें जाणावें ॥ ५६ ॥  
 मग जाणों तेयाचें वीरुं । तेया ही वाटवाहाणी विचारुं ।  
 ज्ञाना हित तें चि करुं । सर्वभावे ॥ ५७ ॥  
 ऐसा जिज्ञासु तुझीं समस्तीं । भावो जो धरिला असे चित्तीं ।  
 तो पुरवावेया लक्ष्मीपती । बोलिजेल ॥ ५८ ॥  
 ज्ञानासि पुनर्जन्म जोडे । आपुली विश्रान्ति ही वारि वाढे ।  
 जिया संपत्ती तें पवाडे । सांवेळ देवी ॥ ५९ ॥  
 साहाजें इष्टानिष्टकरणीं । दोषी चि या कवतिकिणी ।  
 हे नवमाध्यायी उद्याणीं । केली होती ॥ ६० ॥

## भाषार्थदीपिका

### श्रीभगवानुवाच ॥

अभयं सत्त्वसंशुद्धिर्ज्ञानयोगव्यवस्थितिः॥  
दानं दमश्च यज्ञश्च स्वाध्यायस्तप आर्जवम् ॥ १ ॥

तेथ साउमा घेआवा उवावो । तवं मांडला आनु प्रस्ता३० ।  
तरि त्या प्रसर्गे देवो । निरोपितसे ॥ ६१ ॥  
तेया निरोपणाचेनि नावें । अध्यायपद सोलावें ।  
लावणीं पाहातां जाणावें । मागिला वरि ॥ ६२ ॥  
तरि हें असो प्रस्तुतीं । ज्ञानाचां हिताहितीं ।  
समर्था या संपत्ती । दोन्हीं गा ॥ ६३ ॥  
जे जे मुमुक्षां मार्ग बोलावी । मोहोरात्रिची धर्मदिबी ।  
ते आदि तवं दैवी । संपत्ति आइक ॥ ६४ ॥  
एथ एकु एकातें पोखी । ऐसे बहुत पदार्थ एकिं ।  
संपजति ते लोकीं । संपत्ति ह्यणिपे ॥ ६५ ॥  
दैव-मुखसंभवी । येथ दैवगुण-येकोपजीवी ।  
जाली ह्यणौनि जाण दैवी । संपत्ति हे ॥ ६६ ॥  
आतां तेया चि दैवगुणां । माझि धूरेचा बैसणां ।  
बैसे तो आकर्णा । अभय ऐसे ॥ ६७ ॥  
तरि न घळुनि महापुरीं । नेघपे बुडणेयांची सियारी ।  
रोगु न गणिजे धारिं । पथ्याचिया ॥ ६८ ॥  
तैसा कर्माकर्माचेया मोहरा । उठूं नेंदूनि अहंकारा ।  
संसाराचा दरारा । सांडणें कां ॥ ६९ ॥  
अथवा अव्ययभावनेचेनि पैसैं । दूजें मानुनु आत्मा ऐसैं ।  
भववार्त्ता देशें दिसैं । दवडणें जें ॥ ७० ॥  
पाणी बुडळूं ये मीठातें । तवं मीठ चि पाणी आते ।  
तेवि आपण जालेनि द्वैतें । नासे भय ॥ ७१ ॥

## अध्याय १६ वा

आगा अभय येणें नावें । बोलिजे तें हें जाणावें ।  
 सम्यग्ज्ञानाचें आवणें । भावणें हें ॥ ७२ ॥  
 आतां सत्वशुद्धि हाणिजे । ते पै ऐसी जाणिजे ।  
 तरि जले ना विज्ञे । बन्दि जैसा ॥ ७३ ॥  
 कां पाडिवां वाढि न मगे । अवंसा तूटि सांडूनि मागे ।  
 माक्षि हरिणु चंद्र आंगें । जैसा राहे ॥ ७४ ॥  
 ना तरि वार्षिया सांडिली । ग्रीष्में नाहिं मांडिली ।  
 ते नदी जैसी निवडली । निजरूपें ॥ ७५ ॥  
 तैसी संकल्पविकल्पाची बोढी । सांडूनि रजतमाची कावडी ।  
 भोगीणि निजधामाची आवडि । बुद्धि उरे ॥ ७६ ॥  
 इंद्रियवर्गे दाखविलेयां । विरुद्धा अथवा भलेया ।  
 विस्मो कार्हि कैलेयां । नुठी चित्तीं ॥ ७७ ॥  
 गावां गेलेयां वल्लभु । पतिव्रतेचा विरहक्षोभु ।  
 भलेतैसा हानिलाभु । न मनी जेवि ॥ ७८ ॥  
 तेवि स्वरूप रुचलेपणें । बुद्धि जे ऐसें होणें ।  
 ते सत्वशुद्धि हाणे । कंसहंता ॥ ७९ ॥  
 आतां आत्मलाभविधि । ज्ञानयोगा माक्षि येकीं ।  
 जे आपुलिया टाकी । हांवे भरे ॥ ८० ॥  
 तेथ सगलिये चित्तवृत्ती । त्यागु करणें या रीती ।  
 निष्कामीं कां पूर्णाहुति । हुताशीं जैसी ॥ ८१ ॥  
 कां सकुलिनें आपुली । आत्मजा कुलिची दीधली ।  
 हे असो लक्ष्मी राहिली । मुकुंदि जेवि ॥ ८२ ॥  
 तैसे नविकलेपणें । संयमाग्नीचा वृत्तिकां होणें ।  
 तो तीजा गुण हाणे । कृष्णनाथु ॥ ८३ ॥  
 आतां देह वाचा चित्तें । यथासंपन्नं वित्तें ।  
 परि जाळेयां आर्चातें । न वंचणें जें कां ॥ ८४ ॥



फूलीं फलीं छाया । मूलीं पत्रीं हीं धनंजया ।  
 वाटेचा न बंचे आलेयां । रुंखु जैसा ॥ ८५ ॥  
 तैसें मानौनि धन वेन्हीं । विद्यमानें आपुलां अवसरीं ।  
 श्रांताचेया मनोहारी । उपेगा जाए ॥ ८६ ॥  
 तेया नावें जाण दान । जें मोक्षनिधानिचें अंजन ।  
 हें असो आइक चिन्ह । दमाचें जें ॥ ८७ ॥  
 तरि विषयां इंद्रियांचे मिलगीं । जो उदैजत सुये विमुटणी ।  
 तोडिजे खडुपाणी । पारकेयां ॥ ८८ ॥  
 तैसा त्रिषयजाताचा वारा । वाजों नेंदीं इंद्रियां द्वारां ।  
 यमैं बांधौनि प्रत्याहारा । वोपिजति ॥ ८९ ॥  
 आंतुला चित्ताचें आंग वेन्हीं । प्रवृत्ति पलौनि माघारी ।  
 आगि सुइजे दाहें द्वारीं । वैराग्याची ॥ ९० ॥  
 श्वासोश्वासा होउनि बहुवसें । कळूदि व्रतें खरपुसें ।  
 उसांतितां रातिदिवसें । नाराणुक जें ॥ ९१ ॥  
 पै दमु ऐसें ह्मणिपे । तो हा जाण स्वरूपे ।  
 यज्ञार्थु ही संक्षेपे । सांगों आतां ॥ ९२ ॥  
 तरि ब्राह्मण करूनि धूरे । स्त्रियादिक पैली मेरे ।  
 माझारि अधिकारें । आपुलालेनि ॥ ९३ ॥  
 जेया जें सर्वोत्तम । भजनीय देवताधाम ।  
 ते तेणें यथागम— । विधी यजिजे ॥ ९४ ॥  
 जैसे द्विजु षट्कर्म करी । शूद्र तेयातें नमस्कारी ।  
 किं दोषां सरोभरी । निरुजे यागु ॥ ९५ ॥  
 तैसें अधिकारपर्यालोचें । हें यज्ञकरणें सर्वाचें ।  
 विषयरुल आशेचें । नेघपे माजि ॥ ९६ ॥  
 आणि मी करिता हा भावो । नेंदिजे देहाचेनि द्वारें जाओ ।  
 ना वेदावेसि तरि ठावो । होइजे स्वयं ॥ ९७ ॥

## अध्याय १६ वा

अर्जुना एवंसंज्ञ । सर्वत्र जाण यज्ञ ।  
 कैवल्यमार्गिचा अभियज्ञ । सांघति हा ॥ ९८ ॥  
 आतां चेंडुवें भुई हाणिजे । हें नोहे तो हाता आणजे ।  
 कां सेतीं बीं विखुरिजे । परि पीकीं लक्ष ॥ ९९ ॥  
 ना तरि ठेविलें देखावेया । आदरु कीजे दीवेया ।  
 कां शाखा फळावेया । सिंपिजे मूल ॥ १०० ॥  
 हें असो बहू आरिसा । आपणपेयां दिसावेया जैसा ।  
 पुडुतीं पुडुतीं बहुवसा । प्रीती पाहिजे ॥ १ ॥  
 तैसा प्रतिपाद्यु जो ईश्वर । तो होआवेया लागि गोचर ।  
 श्रुतींचा निरंतर । अभ्यासु करणें ॥ २ ॥  
 तेवि द्विजांसि ब्रह्मसूत्र । येरां स्तोत्र कां नाममंत्र ।  
 आवर्त्तवणें पवित्र । पावेया तत्व ॥ ३ ॥  
 पार्था गा स्वाध्यायो । बोलिजे तो हा हणें देवो ।  
 तपशद्धा अभिप्रावो । आइक सांघों ॥ ४ ॥  
 ज्ञानें सर्वस्व जाणे । परि रक्षणें मरणा येणें ।  
 कां फलौनि शुष्कां होणें । ओषधींचे ॥ ५ ॥  
 नाना धूपाचा अग्निप्रवेशु । कनका तूका तूकाचा नाडु ।  
 पितृपक्षु पोखतां भ्रंशु । चंद्रा जैसा ॥ ६ ॥  
 तैसे सर्वधर्माचेया प्रसरा । लागि प्राणें हीं या शरीस ।  
 आटणी करणें जें वीरा । तें चि तप ॥ ७ ॥  
 अथवा अनारिसें । तपाचें रूप असे ।  
 तरि सूदली दूधीं हसैं । चांचु जैसी ॥ ८ ॥  
 तैसे देहजीवाचिये मिलणीं । जो उदैजत सुवे पाणीं ।  
 तो विवेकु अंतष्करणों । जागविजे ॥ ९ ॥  
 पांतां आत्मेया कडे । परबुद्धिचा पैतु सांकडे ।  
 सनिद्रा स्वप्न बुडे । जागणां जैसें ॥ १० ॥

तैसां आत्मपर्यालोचु । प्रवर्त्ते तो साचु ।  
 तपाचा निर्वचु । धनुर्द्धरा ॥ ११ ॥  
 आतां बालाचां हि चित्ति स्तन्य । जैसे नाना दृष्टिचां चैतन्य ।  
 तैसे प्राणिमात्री सौजन्य । आर्जव तें ॥ १२ ॥  
 अहिंसा सत्यमक्रोधस्त्यागः शान्तिरपेक्षुनम् ॥  
 दया भूतेष्वलोलुप्त्वं मार्हवं न्हीरचापलम् ॥ २ ॥  
 आणि जगाचेया सुखा चि दोसें । शरीरें वाचा मानसें ।  
 राहाटणें तें अहिंसे । रूप जाण ॥ १३ ॥  
 आतां चोख होउनि मौवाळ । जैसे जातिचें मुकुळ ।  
 कां तेज परि शीतळ । शशांकाचें ॥ १४ ॥  
 शके दाविलें चि रोगु फेडूं । आणि जीभे तरि नव्हे कडू ।  
 तें बोषध नाहिं पाडु । उपमां केवि ॥ १५ ॥  
 तन्हीं मौपणें बुबुलें । झगटितां हीं परि नाडले ।  
 यन्हविं फोडी कराळें । पाणी जैसें ॥ १६ ॥  
 तैसें तोडावेया संदंह । तीख जैसें काल लोह ।  
 स्वाव्यत्वे तरि माधुर्य । पाहिं घाली ॥ १७ ॥  
 आधिकों ठांतां कवतिकें । कानातें करी मूकें ।  
 ना साचारैवें मीखें । ब्रह्मा हीं भेदी ॥ १८ ॥  
 किंबहुना प्रियपणें । कोणहातें हिं झांकउं नेणे ।  
 यथार्थु तन्हीं खुपणें । नाहिं कव्हणां ॥ १९ ॥  
 यन्हविं गोरी किर गायन गोड । परि साचाचां पाखाळीं कीड ।  
 आगिचें करणें उघड । परि जलो तें साच ॥ २० ॥  
 कां जीभे लगतां मडुर । अर्थे विभांडी जिन्हार ।  
 ते वाचा नव्हंति सुंदर । लावां चि कां तिया ॥ २१ ॥  
 परि अहिंति कोपौनि सोफ । लालनीं मौ जैसें पुष्प ।  
 तिथे मातेचें स्वरूप । जैसें होये ॥ २२ ॥

### अध्याय १६ वा

जैसे श्रवणसुख चतुर । परिणामौनि साधार ।  
 बोलणें अविचार । सत्य येयें ॥ २३ ॥  
 आतां लाविलेयां हिं पाणी । जैसा पाखाणु नेवे आणी ।  
 कां मथिलेयां हिं लोणी । कांजी नेंदी ॥ २४ ॥  
 त्वचा पाये चीरी । आलेयां हिं फडे न करी ।  
 सेवते हीयारी । नोहंति कुलें ॥ २५ ॥  
 नाना रंभेचेनि हिं रूपें । शुक्ति नुठिजे चि कंदर्पें ।  
 कां भस्मीं वन्हि नाटोपे । घृते हिं जेवि ॥ २६ ॥  
 तेवि कुमार क्रोधु भरे । तैसेयां मंत्रांचि बीजाक्षरें ।  
 तियें निमित्यें हीं अपारें । मीनलेयां ॥ २७ ॥  
 परि धाता ही पायां पडतां । नूठी गतायु पांडुसुता ।  
 तैसा नुपजे उपजवितां । क्रोधोर्मि तो ॥ २८ ॥  
 अक्रोधत्व ऐसें । नावं तिये दशे ।  
 ऐसें श्रीनिवासें । ह्यणितलें तेथ ॥ २९ ॥  
 आतां मृत्तिकात्यागें घटु । तंतुत्यागें पटु ।  
 ल्यजिजे जेवि वटु । बीजत्यागें ॥ ३० ॥  
 कां ल्यज्जुनि भीतिमात्र । ल्यजिजे आघवें चित्र ।  
 निजत्यागें विचित्र । स्वप्नजाल तें ॥ ३१ ॥  
 नामा जलत्यागें तरंग । वरिषात्यागें मेघ ।  
 ल्यजिजति जेवि भोग । दानत्यागें ॥ ३२ ॥  
 तेवि बुद्धिमंतीं देहीं । अहंता सांडौनि पाहीं ।  
 सांडिजे अशेष ही । संसारजात ॥ ३३ ॥  
 तेया नावं त्यागु । ह्यणे तो यज्ञांगु ।  
 हें मानुनि सुभगु । पार्थु पूसे ॥ ३४ ॥  
 आतां शांतिचें जी लिंग । व्यक्त मज सांघ ।  
 देवो ह्यणति चांग । अवधान दे ॥ ३५ ॥

तरि गीलेनि ज्ञेयार्ते । ज्ञान ज्ञाता चि माघौते ।  
 हारपे ते निरुते । शांति पै गा ॥ ३६ ॥  
 जैसा प्रलयांबुचा उभडु । बुडल्लनि विश्वाचा पवाडु ।  
 हें आपणपां निवाडु । आपणपां चि ॥ ३७ ॥  
 मग उगउं वोघ सिंधू । हा नुरे व्यवहारभेदु ।  
 परि जलवाच्यबोधु । तो ही कैचा ॥ ३८ ॥  
 तैसी ज्ञेया देतां मीठी । ज्ञातृत्व पडे पुटीं ।  
 मग उरे ते चि किरीटी । शांति पुडुतीं ॥ ३९ ॥  
 आतां कदर्थत व्याधी । बलीकरणेयांचिया आधी ।  
 आपु पर न शोधी । सदैवु जैसा ॥ १४० ॥  
 कां चिखलीं रुपली गाए । धड भाखड न पाहे ।  
 जो तियोचिया ग्लानीं होये । कालाबुला ॥ ४१ ॥  
 नाना बुडतेयार्ते सकरुणु । न पुसे उत्तमहीनु ।  
 काढी राखे प्राणु । हें चि जाणे ॥ ४२ ॥  
 पै माहेवणी निदैवें । उघडी केली विपायें ।  
 ते सलज्जु न पाहे । न पांघुरवितां ॥ ४३ ॥  
 तैसैं अज्ञानप्रमदादिकिं । कां प्राक्तनीं हीं सदोषीं ।  
 निंदित्वाचा साविखिं । देखिलें जें ॥ ४४ ॥  
 तेया अंगिक आपुलें । देउनियां भलें ।  
 बिसरविजति सलें । सलतीं तियें ॥ ४५ ॥  
 आगा पुढिलाचा दोखु । करुनि आपुलिया दीठी चोखु ।  
 मग घेपे अवलोकु । तेया वरि ॥ ४६ ॥  
 जैसा पुजुनि देउ पाहिजे । पेरुनि सेता जाइजे ।  
 तोखौनि आशिर्वादु घइजे । अतिथिचा ॥ ४७ ॥  
 तैसैं आपुलेनि गुणें । पुढिलाचें उणें ।  
 फेडूनियां पाहाणें । तेया कडे ॥ ४८ ॥

वांचूनि न विधिजे वर्मी । नांतुडविजे कर्मी ।  
 न बोलाविजे नामी । सदोषि तिहिं ॥ ४९ ॥  
 वरि कोणें येकें उपायें । पडिलें उभें होये ।  
 तें चि कीजे घाये । न घलावें वर्मी ॥ १५० ॥  
 पै उत्तमाचिया साठीं । पावलेयां तें किरीटी ।  
 देतां जाइ दीठी । दोषु न घेपे ॥ ५१ ॥  
 आगा अपैशून्याचें लक्षण । अर्जुना हें फुडें जाण ।  
 मोक्षा यंतें सोखासन । मुख्य हें गा ॥ ५२ ॥  
 आतां तेया शशी । अर्जुना जाण आपैसी ।  
 निवडितां न कडसी । सानेंथोरें ॥ ५३ ॥  
 तैसें दुःखिताचें सीणणें । हिरतां सकणवणें ।  
 उत्तमाधम नेणें । विवंचूं गा ॥ ५४ ॥  
 पै सर्व जीवना सारिखें । वस्तु आंगें वर उपखे ।  
 परि जातें जीवित राखे । तृणाचें हिं ॥ ५५ ॥  
 तैसें पुढिलाचेनि तापें । कलवळैलिये कृपे ।  
 दीधळें हिं आपणपें । थोडें चि गमे ॥ ५६ ॥  
 निम्न भरलेयां उणें । तें पाणी ढळें चि नेणे ।  
 तेवि अनतोखौनि जाणे । सामोरे यां ॥ ५७ ॥  
 पै पाइ कांटा निहटे । तव व्यथा जीविं उमटे ।  
 तैसा पोले संकष्टें । पुढिलाचेनि ॥ ५८ ॥  
 कां पावो सीतल लाहे । किं तें डोलेयां चि लागि होये ।  
 तैसा परसुखें जाये । सुखावतु ॥ ५९ ॥  
 किंबहुना आर्त्ता चि लागि । पाणीं आराइलें असे जगीं ।  
 तैसें दुःखिताचां भागीं । जीणें जेयाचें ॥ १६० ॥  
 तो पुरुषु वीरराया । मूर्त्त जाण दया ।  
 मीं उदैजत तेया । रिणियां कीजे ॥ ६१ ॥

आतां सूर्यासि जीवें । अनुसरलीं राजिवें ।  
 परि तो लें न सिवे । सौरभ्य जैसें ॥ ६२ ॥  
 कां वसंताच्या वाहाणी । आलेयां वना अक्षौणी ।  
 न करीतु घेणी । निगाला तो ॥ ६३ ॥  
 हें असो महासिद्धिसि । लक्ष्मी आलेयां पासि ।  
 परि महाविष्णु जैसी । गणी चि ना ॥ ६४ ॥  
 तैसें इहिक कां स्वर्गिचे । भोग पाइक आलेयां इच्छेचे ।  
 परि भोगावें हें न रुचे । मना माजि ॥ ६५ ॥  
 बहुवे काइ कवतिकि । जीउ नोहे विषयविषि ।  
 अलौक्य सदा ठाउकी । जाण ते हे ॥ ६६ ॥  
 आतां जैसें कां मौवाल । जलचरांसि जल ।  
 कां पक्षांसि अंतराल । मोकलें हें ॥ ६७ ॥  
 नातरि बालका दोसें । मातेचें स्नेह जैसें ।  
 कां वसंतिचा स्पर्श । मारुतु मौ ॥ ६८ ॥  
 डोलेयां प्रियाचिये भेटी । पीलेयां कूर्माची दीठी ।  
 तैसी भूतमात्रि राहाटी । मौवाल ते ॥ ६९ ॥  
 स्परिसें अतिमृदु । मुखिं घातलेयां स्वादु ।  
 घ्राणासि सुगंधु । उजळु आंगें ॥ १७० ॥  
 तो आवडे तव घेतां । विरुद्ध जरि नव्हंता ।  
 तरि उपमे येता । कापुरु किर ॥ ७१ ॥  
 परि महाभूतें पोटीं वाहे । आणि परमाणू साजि माए ।  
 तेया विश्वानुसार होये । गगना ऐसा ॥ ७२ ॥  
 कायि सांघों ऐसें जीणें । जें जगाचें चि जीवें प्राणें ।  
 तेया नावं हणें । माईव मी ॥ ७३ ॥  
 आतां पराजयें राजा । जैसा कदर्थिजे लाजा ।  
 कां मानिया निस्तेजा । निकृष्ट तव ॥ ७४ ॥

नाना चांडाल स्त्रीमदिरोसि । आलेयां संन्यास्या पासि ।  
 मग लाज जैसी । उत्तमां तेया ॥ ७५ ॥  
 क्षत्रिया पलौनि जीणें । तें कोण साहे लाजीरवाणें ।  
 कां वैधव्यें वेळु नेणे । महासती जैसी ॥ ७६ ॥  
 रूपसा उदैलें कुष्ठ । संभाविता कूटिचें बोद ।  
 तेया लाजा प्राणसंकट । होये जैसे ॥ ७७ ॥  
 तैसें आउठहातेपणें । हें शव होउनि जीणें ।  
 उपजों उपजों मरणें । नावां नावां ॥ ७८ ॥  
 तिये गर्भमेदमूसे । रक्तमूत्ररसे ।  
 वोतिवां होउनि तैसें । लाजणें जें ॥ ७९ ॥  
 बहू असो देहपणें । नावां रूपासि येणें ।  
 नाहिं लाजीरवाणें । या ही हुनु ॥ १८० ॥  
 ऐसीया इया अवकला । घेपे शरीराचा कांटाला ।  
 ते लाज पै गा निर्मला । निसुगै एरि ॥ ८१ ॥  
 आतां सूत्रतंतु तूटलेयां । चढ चि ठाके साइखेडेया ।  
 कां प्राणु गेलेया कर्मइंद्रियां । खुंटे गति ॥ ८२ ॥  
 किं मावळलेयां दिनकरु । सरे किरणाचा पसरु ।  
 तैसा मनोजयें प्रचारु । बुद्धिइंद्रियां ॥ ८३ ॥  
 एवं मनपवननियमें । होंति दाही इंद्रियें अक्षमें ।  
 तें अचापल्यधर्मे । येणें जाणें ॥ ८४ ॥

तेजः क्षमा धृतिः शौचमद्रोहो नातिमानिता ॥

भवंति संपदं दैवीमभिजातस्य भारत ॥ ३ ॥

वोखटें मरणाऐसें । तें हिं आलें अग्निप्रवेशें ।  
 परि प्राणेश्वरा दोसें । न गणी सती ॥ ८५ ॥  
 तैसी आत्मनाथाचिया आधी । लालनि विषयविषाचा बांधि ।  
 धाबों आवडे पाणधी । शून्याचिया ॥ ८६ ॥



न टके निषेधु आड । न पडे विधिची भीड ।  
 नुपजे जिवि कोड । महासिद्धिचें ॥ ८७ ॥  
 ऐसें ईश्वरा कुडे निज । धांवें आपैसेया साहाज ।  
 तेया नावं गा तेज । आध्यात्मिक तें ॥ ८८ ॥  
 आतां सर्वें साहांतिया गरिमा । गर्वा नैये चि ते क्षमा ।  
 जैसें देह वाहूनि रोमा । वाहणें नेणे ॥ ८९ ॥  
 आणि मातलेयां इंद्रियांचे वेग । कां प्राचीने खवलले रोग ।  
 अथवा योगवियोग । प्रियाअप्रियाचे ॥ ९० ॥  
 यां आववेयांचा चि थोर । एकें वेलें आलेयां पूर ।  
 अगस्ति होउनि कां धीर । उभा ठाके ॥ ९१ ॥  
 आकासीं धूमाची रेखा । उठिली बहुवा आगलिका ।  
 ते गीली जेवि झुलुका । वारेयाचिया ॥ ९२ ॥  
 तैसें अधिभूतां आधिदैवां । अध्यात्मकीं उपद्रवां ।  
 पातलेयां ते पांडवा । पीउनि घाली ॥ ९३ ॥  
 आतां निर्वाळुनि कनकें । भरिला गंगापीयूखें ।  
 तेया कलशाचें सारिखें । शौचासि गा ॥ ९४ ॥  
 जें आंगि निष्कामु आचार । जीवि विवेकु साचार ।  
 सबाह्य जाण आकार । शुचित्वाचा ॥ ९५ ॥  
 जैसें चित्तक्षोभाचां अवसरीं । उचळुनि धैर्या चांगावें करी ।  
 धृति ह्मणिपे अवधारीं । तेयातें गा ॥ ९६ ॥  
 फेडीति पापें ताप । पोसीति क्षितीचे पादप ।  
 समुद्रा जाये आप । गांगेय जैसें ॥ ९७ ॥  
 जगार्चें आंध्य फेडितु । श्रियेचि राउलें उघडितु ।  
 निगे जैसा भास्वतु । प्रदक्षिणे ॥ ९८ ॥  
 तैसि बांधलि सोडितां । बुडालीं कडितां ।  
 सांकडी फेडितां । आर्त्ताचिया ॥ ९९ ॥

## अध्याय १६ वां

किंबहुना दिवसें राती । पुढिलाचें चि सुख उजती ।  
 आणितआणितां स्वार्थी । प्रवेसिजे ॥ २०० ॥  
 वांचौनि आपुलेया काजा लागि । प्राणिजताचां हितभागी ।  
 संकल्पाची ही आडवंगी । न करणें जें ॥ १ ॥  
 पै अद्रोहत्व ऐसिया गोठी । आइकसि जिया किरीटी ।  
 तें सांधितलें हें दीठी । पाहों ए तैसें ॥ २ ॥  
 आणि गंगा शंभूचां माथां । संकोचली जेवि पार्थी ।  
 तेवि मान्यपदें सर्वथा । लाजणें जें ॥ ३ ॥  
 हें पुढतपुढतीं । अमानित्व जाण सुमती ।  
 मार्गां सांधितलेंसे केती । तें चि बोलों ॥ ४ ॥  
 एवं यें हिं सविसें । ब्रह्मगुणि हे वसतसे ।  
 मोक्षचक्रवर्त्तिचें तैसें । अग्राहार ॥ ५ ॥  
 नाना हे संपत्ति दैवी । या गुणतीर्थीची नवी ।  
 निर्विषसागरिची दैवी । गंगा आली ॥ ६ ॥  
 किं गुणकुसुमाची माला । हे धेउनि मुगुतीबाला ।  
 वैराग्यभाग्या गला । गिवसीतसे ॥ ७ ॥  
 किं सविसें गुणज्योतीं । इहीं उजळनि हे आरती ।  
 गीता आत्मेयां निजपती । नीराजना आली ॥ ८ ॥  
 उगलिती निर्मलें । गुणमय मुक्ताफलें ।  
 दैवी सुप्ति कले । गीतार्णविची ॥ ९ ॥  
 काइ बहू वानूं ऐसी । अभिव्यक्त ये पैसेंसीं ।  
 केली दैवी गणराशी । शांतिरूप ॥ २१० ॥

दंभो दर्पोऽभिमानश्च क्रोधः पाह्यमेव च ॥

अज्ञानं चाभिजातस्य पार्थ संपदमासुरीम् ॥ ४ ॥

आतां दुःखाची अतूट वेळी । देखां काललोहाची भाळी ।  
 तन्हीं निजावधानीं घाली । आसुरी ते ॥ ११ ॥

पै त्याज्य त्याजावेया लागी । जाणावें जन्हीं अनुपयोगी ।  
 ह्मणोनि आइक तें चांगीं । ओत्रशक्ती ॥ १२ ॥  
 तरि नरकव्यथा थोरी । आणावेया दोखीं अचोरीं ।  
 मेलु केला ते आसुरी । संपत्ति हे ॥ १३ ॥  
 विषवर्गु एकवटु । तेया नाव जैसा बासटु ।  
 आसुर संपत्ति हा खोटु । दोखांचा तैसा ॥ १४ ॥  
 तरि तेयां चि आसुरां । दोखां माजि जेयां वीरा ।  
 वाडपणाचा गारा । तो दंभु ऐसा ॥ १५ ॥  
 जैसी आपुली जननी । नम्र दाविलेयां जनीं ।  
 तरि तीर्थ परि पतनीं । कारण होए ॥ १६ ॥  
 कां विद्या गुरूपदिष्टा । बोबाडलेयां चौहटां ।  
 तरि इष्टदा चि अनिष्टा । हेतु होंति ॥ १७ ॥  
 पै आंगें दाटली पुरी । जे तारी पैल तीरीं ।  
 ते नाव चि बांधल्यां सिरीं । बुडली जैसी ॥ १८ ॥  
 कारण जें जीविता । तें वानिलें जरि सेवितां ।  
 तरि अन्न चि पांडुसुता । होये विष ॥ १९ ॥  
 तैसा दृष्टाअदृष्टाचा सखा । धर्मु जाला फोकरिजे देखां ।  
 तरि तारिता तो चि दोखां । लागि होये ॥ २० ॥  
 ह्मणौनि वाचेचां चौबारां । घातलेयां धर्माचा पसारा  
 धर्मु अधर्मु होये तो वीरा । दंभु जाण ॥ २१ ॥  
 आतां मूर्खांचिमे जीमे । आखरांचे आबुखे शुभे ।  
 आणि तो ब्रह्मसभे । न रिझे जैसा ॥ २२ ॥  
 कां मांदुरी लोकाचां घोडां । गजपति महिमे थोडा ।  
 कां कांठिये वरिला सरडा । व्योम नीच ॥ २३ ॥  
 तृणांचेनि इंधनें । आगि धांवे गगनें ।  
 थिलरबलें मीनें । न गणिजे सिंधु ॥ २४ ॥

तैसा माजे छिया धने । विद्या स्तुति बहूमाने ।  
 एकी दीचेनि पराभे । अल्पकु जैसा ॥ २५ ॥  
 घमछायेचिया जोडी । निदैबुं घर मोडी ।  
 मृगांभ देखौनि फोडी । पाणियड मूर्ख ॥ २६ ॥  
 किंबहुना ऐसैसे । माजणे जे संपत्तिमीसे ।  
 तो दर्पु गा अनारिसे । न बोलें घेई ॥ २७ ॥  
 आणि जगा वेदी विश्वासु । जगा पूज्य ईशु ।  
 जगीं एकु तेजसु । सूर्यो हा ॥ २८ ॥  
 जगस्पृहे आस्पद । एक सार्वभौमपद ।  
 न मरणे निर्विवाद । जगा पढिये ॥ २९ ॥  
 हणौनि जरि उत्साहे । यातें वानू जाये ।  
 किं आइकौनि मत्सरु वाहे । एयां लागि ॥ ३० ॥  
 हणो ईश्वरातें खाए । तेया वेदा कायि विष सुए ।  
 गोखा माजि त्राये । भंगितसे ॥ ३१ ॥  
 पतंगा नावडे वाति । खद्योता भानुची खंति ।  
 टिटिभे अपांपती । वैरी केला ॥ ३२ ॥  
 तैसा अहंमानाचेनि मोहे । ईश्वराचें हि नाव न साहे ।  
 वेदांतें हि हणो मज हे । सवति जाली ॥ ३३ ॥  
 ऐसा मानितेचा गंडु । तो अभिमानु जाणें कुडु ।  
 रौरवाचा रूडु । मार्गु हा ॥ ३४ ॥  
 आणि पुढिलाचें सुख । देखणेयांचें होये मीख ।  
 चढे क्रोधाग्निचें विष । मनोवृत्ती ॥ ३५ ॥  
 सितलाचिये भेटी । तातलां तेलिं आणि उठी ।  
 चंद्र देखौनि पोटी । जले कोल्हा जैसा ॥ ३६ ॥  
 विश्वाचें आयुष्य सगलें । सूर्य उदैला देखौनि सगले ।  
 पापियां फूटति डोले । डुडुलांचे ॥ ३७ ॥

जगाची सुखपाहाट । चोरां मरणांहुनु कष्ट ।  
 दूधार्चे कालकूट । होये व्यालां ॥ ३८ ॥  
 अगार्चे समुद्रजलें । पीतां अधिकु जलें ।  
 षडवानल न मिले । शांति कहीं ॥ ३९ ॥  
 तैसा विद्याविनोदविभवे । देखे पुढिलाची दैवे ।  
 तवं तवं रोखु दुणावे । क्रोधु तो जाण ॥ २४० ॥  
 आणि मनसर्पाची सृष्टी । डोले नाराजांची सूटी ।  
 बोले ते वृष्टि । इंगलांची ॥ ४१ ॥  
 येर जें क्रियाजात । तें तिखेयाचें करवत ।  
 ऐसें सबाह्य घसासित । तेयाचें गा ॥ ४२ ॥  
 तो मनुष्य अधमु जाण । पारुष्य अवतरण ।  
 आतां आईकें खुण । अज्ञानाची ॥ ४३ ॥  
 तरि शीतोष्णस्पर्शा । निवाडु नेणे पाखाणु जैसा ।  
 कां रात्रि आणि दिवसा । जात्यंधु तो ॥ ४४ ॥  
 आणि उठिला आरोगणे । जैसा खाद्याखाद्य नेणे ।  
 कां परिसु पाडु न हणने । सोनेयां लोहाचा ॥ ४५ ॥  
 नातरि नानारसी । रिघौनि दवीं जैसी ।  
 अभिज्ञ मीठासि । नव्हे चि तिये ॥ ४६ ॥  
 कां बारा जैसा पारखी । नव्हे चि गा मार्गामार्गविशेषी ।  
 तैसें कृत्याकृत्यविवर्की । अधमपण जें ॥ ४७ ॥  
 हें चोख हें मैल । ऐसें नेणौनि बाल ।  
 देखिलें तें केवल । मुखीं चि घाली ॥ ४८ ॥  
 तैसें पापपुण्याचें खिचटें । करुनि खातां बुद्धिचेष्टे ।  
 कडू मडुर न वटे । ऐसी जे दशा ॥ ४९ ॥  
 तिये नावं अज्ञान । या बोला नाहिं आन ।  
 एवं साई दोषांचें चिन्ह । सांगितलें ॥ २५० ॥

इहिं साईं दोषांगि । हे आसुरी संपत्ति दादुगी ।  
 जैसें थोर विष भूवंगी । आंग साने ॥ ५१ ॥  
 कां तीघां वन्हि पांती । पांतां धाकुटी चि मीति ।  
 परि विश्वाची ही आहुती । करुं न पुरे ॥ ५२ ॥  
 धात्रेया ही गेलेयां शरण । त्रिदोषिं न चुके मरण ।  
 तेया तिहींची हे दूण । लागली आहे ॥ ५३ ॥  
 जें साहिं दोषिं संपूर्णी । जाली इहिं चि उभारणी ।  
 ह्मणौनि आसुरी उणी । संपदा नोहे ॥ ५४ ॥  
 क्रूरग्रहांची जैसी । मांदी मिले येक्री राशी ।  
 कां येति निंदका पासि । अशेषे पापे ॥ ५५ ॥  
 मरुणारुवाचें आंग । पडिघांति आघवे रोग ।  
 कां कुमुद्वर्त्ति दुर्योग । एकवटति ॥ ५६ ॥  
 कां आयुष्य जांतिये वेले । सेलिए सातवेउली मिले ।  
 तैसे साईं दोष सगले । जोडति तेथे ॥ ५७ ॥  
 आंतुडलेया चोरा । सीणला सुइजे पुरां ।  
 तैसें दोषिं इहिं नरां । कीजे तेयां ॥ ५८ ॥  
 जेया मोक्षमार्गा कडे । यावेया आबुरवा पडे ।  
 न निगे ह्मणौनि बुडे । सवसारिं जो ॥ ५९ ॥  
 अधमा योनिचा पाउटी । उत्तरतु जो किरीटी ।  
 स्थावरां हिं तळवटीं । बैसणें घे ॥ ६० ॥  
 हें असो तेयाचां ठांड । मिलौनि साईं दोषिं इहीं ।  
 आसुरी संपत्ति पाहीं । वाटवीजे ॥ ६१ ॥

दैवी संपत्तिमोक्षाय निबंधायासुरी मता ॥

मा शुचः संपदं दैवीमभिजातोऽसि पांडव ॥ ५ ॥

ऐसिया दोन्हीं । संपत्ती प्रसिद्धा जनि ।

सांघितलिया चिन्हीं । वेगलालां ॥ ६२ ॥

यां दोहिं माजि पहिली । देवी जे हणितली ।  
 ते मोक्षसुखा पाहाली । उखा जाण ॥ ६३ ॥  
 एरि जे दुसरी । संपत्ति कां आसुरी ।  
 लोममोहाची खरी । सांखल जीवां ॥ ६४ ॥  
 परि हें आइकौनि ज्ञनें । कदरसी हो मनें ।  
 कायि रात्रि चांदिणें । धाकु धरिजे ॥ ६५ ॥  
 हे आसुरी संपत्ति तेया । बंधा लागि धनंजया ।  
 जो साहिं दोषां ययां । आश्रो होए ॥ ६६ ॥  
 तूं तवं पांडवा । सांधितलेयां दैवां ।  
 गुणाचा वोलावा । जन्मलासि ॥ ६७ ॥  
 हणौनि पार्था तुवां । दैवसंपत्तिस्वामियां ।  
 होउनि यावें उवाया । कैवल्याचा ॥ ६८ ॥

ह्री भूतसर्गौ लोकेस्मिन् दैवआसुर एव च ॥

दैवो विस्तरशः प्रोक्त आसुरं पार्थ मे शृणु ॥ ६ ॥

आणि दैवां आसुरां । संपत्तिवंतां नरां ।  
 अनादिसिद्ध उजरा । राहाटिचा आहे ॥ ६९ ॥  
 जैसैं रात्रिचां अवसरीं । व्योम व्यापिजे निशाचरीं ।  
 दिसां सुव्यापारीं । मनुष्यादिकिं ॥ ७० ॥  
 तैसिया आपुलिया राहाटी । वर्तति दोन्हीं सृष्टी ।  
 दैवी आणि किरीटी । आसुरी एथ ॥ ७१ ॥  
 तेविं चि विस्तारुनि दैवी । ज्ञानकथनादिप्रस्ताविं ।  
 मागिलें प्रथें बरवी । सांधितली ॥ ७२ ॥  
 आतां आसुरी सृष्टी । तेथिची उपलउं गोठी ।  
 अवधानाची दीठी । दे पां नीकी ॥ ७३ ॥

प्रवृत्तिं च निवृत्तिं च जना न विदुरासुरा ॥

न शौचं नापि वाचरो न सत्यं तेषु विद्यते ॥ ७ ॥

तरि वार्ये विण नाहु । दूजेन विण शहु ।  
 कां अपुण्य मकरंदु । न लभे जैसा ॥ ७४ ॥  
 तैसी प्रकृति हे आसुर । येकली नव्हे गोचर ।  
 जवं येकार्धे शरीर । लाहे ना ॥ ७५ ॥  
 मग आविष्कारला लाकुडें । पावकु जैसा जोडे ।  
 तैसी प्राणिदेहीं सांपडे । आटोपली हे ॥ ७६ ॥  
 तेधवां वाढि जे उंसा । ते चि आंतुला रसा ।  
 देहाकारु होये तैसा । प्राण्यांचा ॥ ७७ ॥  
 आतां तेयां चि प्राण्यां । रूप करुं धनंजया ।  
 घडिलें जें जें आसुरिया । दोष रिद्धी ॥ ७८ ॥  
 तरि पुण्या लागि प्रवृत्ति । पापा लागि निवृत्ति ।  
 या जाणण्यांची राति । तेयांचां मनीं ॥ ७९ ॥  
 निगण्यां आणि प्रवेशा । चित्त नेंदितु आविसा ।  
 कोशकारु जैसा । जाचिनला ॥ ८० ॥  
 कां दीधलें माघौतें येइल । किं न ये हें पुढिल ।  
 न पांतां दे भांडवल । मूर्खु चोरा ॥ ८१ ॥  
 तैसिया प्रवृत्तिनिवृत्ति दोन्हीं । नेणिजति आसुरीं जनीं ।  
 आणि शौच तें स्वप्नीं । नेदखति ते ॥ ८२ ॥  
 कालिमा सांडील कोलिसा । वर चोखि होईल वायसा ।  
 राक्षसु ही मांसा । विटों सके ॥ ८३ ॥  
 परि आसुरा प्राण्यां । शूचि नाहिं धनंजया ।  
 पवित्रत्व जेवि भांडेया । मयाचआ ॥ ८४ ॥  
 आणि वाढवितां विधिचीं आश । कां पाहांतां वडिलांची वास ।  
 आचरिजे हे भास । नेणति ते ॥ ८५ ॥  
 जैसें चरणें सेलियेचें । कां धावणें वारेयाचें ।  
 जळणें आगिचें । भले तेउतें ॥ ८६ ॥



तैसें पुढां सूनि शरीर । आचरति ते आसुर ।  
 सल्लेसि कीर बैर । सदा चि तेयां ॥ ८७ ॥  
 नांगिया आपुलिया । विंचू करी गुतकुलिया ।  
 तरि साच बोलिया । बोलति ते ॥ ८८ ॥  
 अपानाचेनि तोंडें । जरि सुगंधा येणें घडे ।  
 तरि सत्य तेयां जोडे । आसुरांतें ॥ ८९ ॥

असत्यमप्रतिष्ठंते जगदाहुरनीश्वरम् ॥

अपरस्परसंभूतं किमन्यत्कामहैतुकम् ॥ ८ ॥

ऐसें ते न करितां काहिं । आंगिं चि वोखटें पाहिं ।  
 आतां बोलती ते नवाई । सांघिजेल ॥ २९० ॥  
 यन्हविं कन्हैयाचा खांदु चांग । मग येर काइ आंग ।  
 परिस जो प्रसंग । प्राप्ती कीं ॥ ९१ ॥  
 उधविचें तोंड । उगलीत धूमाचे उभड ।  
 हें जाणिजे तन्हीं उघड । सांघों ते बोल ॥ ९२ ॥  
 तरि विश्व हा अनादि ठावो । एथ नियंता ईश्वर राउ ॥  
 चाउडिये न्यायान्याउ ॥ निवडी वेदु ॥ ९३ ॥  
 वेदें अन्यायीं पडे । तें निरयभोगें दंडे ।  
 सन्यायी तो सुरवाडे । स्वर्गीं जिये ॥ ९४ ॥  
 ऐसी विश्ववेवस्था । अनादि जे पार्था ।  
 ते ह्मणति तें वृथा । आघवें हें ॥ ९५ ॥  
 यज्ञमूढ मुसिले यागीं । देवपिसे प्रतिमे लागि ।  
 नागविले भगवे योगी । समाधिभ्रमें ॥ ९६ ॥  
 एथ आपुलेनि बलें । भोगिजे जें वेगलें ।  
 हें वांचौनि नीकें आगलें । शून्य आहे ॥ ९७ ॥  
 ना असक्तपणें अंगिकें । वेगल वेंटाली न टके ।  
 ऐसा गादिजे दुःखें । तें चि पाप ॥ ९८ ॥

प्राण धेति संपन्नाचे । ते पाप जरि साचें ।  
 तरि सर्वस्व तेयाचें । हें पुण्यफल किं ॥ ९९ ॥  
 बली अबलातें खाये । हें चि बाधितें होये ।  
 तरि मासेया कां नोहे । निसंतान ॥ ३०० ॥  
 कुलें शोधूनि दोन्हि । कुमारें चि सुलग्रीं ।  
 मेलविलीं प्रजासाधनीं । हेतु जरि ॥ १ ॥  
 तरि पशुपक्षादि जाती । तेयां मीति नाहिं संतती ।  
 तेयां कोणीं प्रतिपत्ती । विवाह केले ॥ २ ॥  
 चोरियेचें धन आलें । तें कोणासि विष जालें ।  
 वालभाचिये रती जालें । कोढी कोण ॥ ३ ॥  
 ह्यणौनि देवो गोसांविं । तो धर्माधर्म भोगवी ।  
 आणि परत्राचां गाविं । करि तो भोगी ॥ ४ ॥  
 तरि परत्र ना देवो । न दिसति ह्यणौनि वायो ।  
 आणि करितां निमे ठावो । मा भोगी कोणु ॥ ५ ॥  
 येथ उर्वसिया इंद्र सुखी । जैसा कां स्वर्गलोकीं ।  
 तैसा क्रिमि नरकीं । लोलतु श्लाघ्यें ॥ ६ ॥  
 ह्यणौनि नरकु स्वर्गु । नोहे पुण्यपापभागु ।  
 जें दों ठांई भोगु । कामा चि तव ॥ ७ ॥  
 या कारणें कामें । स्त्रीपुरुषयुग्में ।  
 मिलति तेथ जन्मे । आघवें जग ॥ ८ ॥  
 आणि निजें अभिलाखें । स्वार्था लागलें हें पोखे ।  
 पाठिं परस्परद्वेषें । कामु चि नाशी ॥ ९ ॥  
 एवं कामु बांचूनि काहीं । जगा मूल चि आन नाहिं ।  
 ऐसें बोलति ते पाहीं । आसुर गा ॥ ३१० ॥  
 आतां असो हें कीडाळ । बोलिं न करुं पघळ ।  
 सांघतां चि सपोळ । होतसे वाचा ॥ ३१ ॥

आणि ईश्वराचिया खंती । नसुदिया करिति चांधी ।  
 हें इ नाहिं चित्ती । हा चि निश्चयो ॥ १२ ॥  
 किंबहुना उघड । आंगि भरुनि पाखांड ।  
 नास्तिपणाचें हाड । रोविलें जीमे ॥ १३ ॥  
 तेधवां स्वर्गा लागि आदर । कां नरकाचा अडदर ।  
 ये वासनेचा अंकुर । जलौनि गेला ॥ १४ ॥

एतां दृष्टिमवष्टभ्य नष्टात्मानोल्पबुद्धयः ॥

प्रभवंत्युग्रकर्माणः क्षयाय जगतोहिताः ॥ ९ ॥

मग केवल ये खोडां । अमेध्योदकाचा बुडडा ।  
 विषइं चि सुहाडा । बुडाले गा ॥ १५ ॥  
 जें आटावे जलचर । तें डोहिं मिलति ढिवर ।  
 कां पडावें शरीर । तें रोगां उदयो ॥ १६ ॥  
 उदैलें केतुचें जैसें । विश्वा अनिष्टा चि दोसें ।  
 ते जन्मति ते तैसे । लोकां आटु ॥ १७ ॥  
 विरूढलेयां अशुभ । फूटति ते चि कोंभ ।  
 पापाचे कीर्तिस्तंभ । चालते ते ॥ १८ ॥  
 आणि मागां पुढां जालणें । वांचूनि आगि आन मेणे ।  
 तैसें विरुं चि करणें । आथि तेयां ॥ १९ ॥  
 परि तें चि गा करणें । आदरीति संभ्रमें जेणें ।  
 तो आइक पार्था ह्मणे । श्रीनिवासु ॥ ३२० ॥  
 तरि जाल पाणियें न भरे । इंधनीं आगि न पुरे ।  
 तेया दुर्भर चि धूरे । मुख जालें ॥ २१ ॥

काममाश्रित्य दुष्पूरं दंभमानमदान्विताः ॥

मोहाद्गृहीत्वासद्ग्राहान्प्रवर्त्तते शुचिमतः ॥ १० ॥

तैं या कामाचा उल्लावा । जीविं धरुनि पांडवा ।  
 दंभमानाचा मेलवा । मेलवीति ॥ २२ ॥

### अध्याय १६ वा

मातलेया कुंजरा । आगली जाली मदिरा ।  
 तैसा मदाचा तवं जरा । चढत आंगीं ॥ २३ ॥  
 आणि आग्रया तो चि ठाऊ । वरि मौढ्य ऐसा सावाऊ ।  
 मग काइ वानूं निर्वाहो । निश्चयांचा ॥ २४ ॥  
 जिहिं परोपतापु घडे । परावा जीउ रगडे ।  
 तिहिं कर्मि होउनि गाढे । जन्मव्रती ॥ २५ ॥  
 आपुलें केलें फोकरिति । जगातें धिकरिति ।  
 दाहें दिशीं पसरिति । स्पृहाजाल ॥ २६ ॥  
 ऐसेनि गा आटोपें । थोरिये आणिति पापें ।  
 धर्मधेनुं खुरपें । सूटलें जैसें ॥ २७ ॥

चिंतामपरिमेयां च प्रलयांतामुपाश्रिताः ॥

कामोपभोगपरमा एतावदिति निश्चिताः ॥ ११ ॥

इया एकी आइती । तेयाचिया कर्मप्रवृत्ती ।  
 आणि जीणेयां परौती । वाहाति चिंता ॥ २८ ॥  
 पाताल होंनि निम्न । जिये उंचिये सानें गगन ।  
 जें पाहांतां त्रिभुवन । अणु हीं नोहे ॥ २९ ॥  
 ते योगपटाची मवणी । जीविं अनियम चितवणी ।  
 जें सांडूं नेणे मरणीं । बलुभा जैसी ॥ ३० ॥  
 तैसी चिंता अपार । वाढवीति निरंतर ।  
 दीठि सूनि असार । विषयादिक ॥ ३१ ॥  
 स्त्रिया गाइलें आइकावें । स्त्रीरूप डोलां देखावें ।  
 सर्वइंद्रियें हिं आश्लेषावें । स्त्रियातें चि ॥ ३२ ॥  
 कुरबंडी कीजे अमृते । ऐसें सुख स्त्रिये परौतें ।  
 नाहिं चि हणौनि चित्तें । निश्चित जालें ॥ ३३ ॥  
 मग तेया चि स्त्रीभोगा । लागि पातालस्वर्गा ।  
 धावति दिग्विभागा । परौतें हीं ॥ ३४ ॥

आशापाशशतैर्बद्धाः कामक्रोधपरायणाः ॥

इहंते कामभोगार्थमन्यायेनार्थसंचयान् ॥ १२ ॥

एकु कवलु बहुतीं मासां । तोडुनु नेयिजे जैसा ।  
 तैसैं चि कीजे विषयाशा । तेयासि चि गा ॥ ३५ ॥  
 वांछित तवं न पवति । मा रोकडी चि आशसंतति ।  
 वाढौ वाढों होंति । कोशकीट ॥ ३६ ॥  
 आणि पसरला अभिलाखु । अपूर्ण तो चि होये देखु ।  
 एवं कामक्रोधांचा अधिकु । पुरुषार्थु नाही ॥ ३७ ॥  
 दिहा खोलणें रात्री जागोवा । ठाणांतरिया जैसा पांडवा ।  
 अहोरात्रि विसांवां । भेटे चि ना ॥ ३८ ॥  
 तैसैं उंचौनि लोटिलें कामें । नेहटित क्रोधाचिये द्रुमे ।  
 तेथ रागद्वेष प्रेमें । न माति केहीं ॥ ३९ ॥  
 तेवि चि जीविचेया हांवां । विषयवासनांचा मेळावा ।  
 केला परि तो भोगावा । अर्थे किं ना ॥ ४० ॥  
 ह्मणौनि भोगावेया जोगा । पूर्त्ता अर्थु पै गा ।  
 आणावेया जगा । झोंबति सैरा ॥ ४१ ॥  
 एकांतें सावधां मारीति । एकांचीं सर्वस्वें हरीति ।  
 एकां लागि उभारिति । अपाययंत्रें ॥ ४२ ॥  
 पाशिकें पोतीं वागुरा । सूणे ससाणे काठी सोंचारा ।  
 घेउनि निगति डोंगरा । पारधी जैसे ॥ ४३ ॥  
 तें पोसावेया हें पोटा । मारुनि प्राण्यांचे संघाट ।  
 आणिति ऐसैं निकृष्ट । तें हिं करिति ॥ ४४ ॥  
 परप्राणघातें । मेलवीति वित्तें ।  
 मिललेयां चित्तें । तोखणें कैसैं ॥ ४५ ॥

इदमद्य मया लब्धमिमं प्राप्स्ये मनोरथम् ॥

इदमस्तीदमपि मे भविष्यति पुनर्द्धनं ॥ १३ ॥

हण्णे आजि मियां । संपत्ति बहुतां एकाचिया ।  
 आपुलिया होंतिया केलिया । धन्यु ना मीं ॥ ४६ ॥  
 ऐसा श्लाघों जवं जाये । तवं मन आणिका हिं वाहे ।  
 सर्वे चि हण्णे पाहे । बहू चि आणू ॥ ४७ ॥  
 हें जेतुलें असे जोडलें । तेयाचेनि भांडवलें ।  
 लाभा घेईन उरलें । चराचर ॥ ४८ ॥  
 ऐसेनि धनें विश्वाचेयां । मीं चि होईन स्वामियां ।  
 मग दीठि पडे तेयां । उरों नेंदी ॥ ४९ ॥

असौ मया हतः शत्रुर्हनिष्ये चापरानपि ।

ईश्वरोहमहं भोगी सिद्धोहम् बलवान्मुखी ॥ १४ ॥

हे मारिले ते थोडे । आणिक ही साधीन गाढे ।  
 मग नांदैन पवाडें । एकला चि ॥ ३५० ॥  
 माझीं होंति कामारीं । तियें वांचौनि येरें मारीं ।  
 किंबहुना चराचरीं । ईश्वर मीं ॥ ५१ ॥  
 मीं भोगभूमीचा राऊ । आजि सर्व सुखांसि ठाऊ ।  
 हणौनि इंद्र वावो । मातें पाउनि ॥ ५२ ॥  
 मीं मनें वाचा देहें । करि तें कें नोहे ।  
 मज वांचूनि आहे । आनु आज्ञासिद्ध ॥ ५३ ॥  
 तवं चि बलिया कालु । न दिसें जवं मीं अतुलु ।  
 सुखाचा किर निखलु । राशी चि मीं ॥ ५४ ॥

आढ्योभिजनवानस्मि कोन्योस्ति सदृशो मया ॥

यक्ष्ये दास्यामि मोदिष्य इत्यज्ञानविमोहिताः ॥ १५ ॥

कुबेर आथिला होए । परि तो नेणे चि माझी सोये ।  
 संपत्ति मासीं नोहे । श्रीनिवासु ॥ ५५ ॥  
 माझेया कुलाचा उजालु । कां ज्ञातिगोत्राचा मेलु ।  
 पाहांतां ऋक्षा हिं अळु । उणा चि दीसे ॥ ५६ ॥

ह्यणौनि मिरवति नावें । नाहिं मजसिं सरि पावे ।  
 वार्या ईश्वरादिकें सावें । तैसें कोणहीं ॥ ५७ ॥  
 आतां लोपळा अभिचार । तेया करीन जीर्णोद्धार ।  
 प्रतिष्ठीन मरमार । याग वरि ॥ ५८ ॥  
 मार्ते गांती वानिती । नाचें नटें रिझविती ।  
 तेयां देईन मागती । ते ते वस्तु ॥ ५९ ॥  
 माजिरां अन्नपाणीं । प्रमदाचां आलिंगनीं ।  
 होईन मीं त्रिभुवनीं । आनंदकर ॥ ६० ॥  
 कायि बहू सांघों ऐसे । ते आसुर प्रकृतिपीसे ।  
 तुरंबित असौसें । गगनौलेयां ॥ ६१ ॥

अनेकचित्तविभ्रान्ता मोहजालसमावृताः ॥

प्रसक्ताः कामभोगेषु पतन्ति नरकेशुचौ ॥ १६ ॥

अज्ञानें आंतलें धूलि । ह्यणौनि आशा वाहुंठली ।  
 भवंडित अंतराली । मनोरथाचां ॥ ६२ ॥  
 जराचेनि आटोपें । रोगी भलेतैसें जल्पे ।  
 चंचलित संकल्पें । जाण तैसें ॥ ६३ ॥  
 अनिम आखाडमेघ । कां समुद्रोर्मि अभंग ।  
 तैसे कामीति अनेग । अखंड हे ॥ ६४ ॥  
 मग पै कामना तिया । जिवीं जाले वेलरिया ।  
 वोरपिलीं कांटिया । कमलें जैसीं ॥ ६५ ॥  
 कां पाखाणाचां माथां । हांडी फूटली पार्था ।  
 जीविं तैसे सर्वथा । कूट जाले ॥ ६६ ॥  
 तेन्हां चडतिये रयणीं । तमाची होये पुरवणी ।  
 तैसा मोहो अंतष्करणीं । वाढों लागे ॥ ६७ ॥  
 आणि वाढे जवं मोहो । तवं तवं विषई रोहो ।  
 विषय तेथ ठावो । पातकांसि ॥ ६८ ॥

पापें आपुलेन धावें । करिति जन्ममेलावे ।  
 तव जितां चि आघवे । यंति नरका ॥ ६९ ॥  
 हणौनि गा सुमती । हे कुमनोरथ पालिति ।  
 ते आसुर जांति । तेया ठाया ॥ ७० ॥  
 जेथ असीपत्र तरुवर । खदिरांगाराचे डोंगर ।  
 तातलां तेलीं सागर । उतताति ॥ ७१ ॥  
 जेथ यातनेची श्रेणी । ये तरि जांत वैतरणी ।  
 पडति तिये दारुणी । नरकलोकीं ॥ ७२ ॥  
 ऐसे नरकाचिये सेले । भागीन जे जन्मले ।  
 ते ही देखों भूलले । जैत यागीं ॥ ७३ ॥

आत्मसंभाविता स्तब्धा धनमानमदान्विताः ॥

यजंते नाम यज्ञैस्ते दंभेनाविधिपूर्वकम् ॥ १७ ॥

यन्हविं यागादिकीं क्रिया । आहाण ते चि धनंजया ।  
 परि विपलांति आचरौनियां । नाटकी जैसे ॥ ७४ ॥  
 वालभाचिया उजरिया । आपणेयां प्रति कुस्त्रिया ।  
 जोडूनि तोखविति जैसिया । ऐहेवपणे ॥ ७५ ॥  
 तैसे आपणेयां आपण । मानितां महंतपण ।  
 फुगे असाधारण । गर्वे तेणें ॥ ७६ ॥  
 मग लवों नेणति कैसे । आटिवं लोहखांब जैसे ।  
 कां उधवली आकाशें । शिलाराशि ॥ ७७ ॥  
 तैसे आपुलिये बरवे । आपण चि रिझति जीवें ।  
 तृणाहूनि आघवें । मानिति नीच ॥ ७८ ॥  
 वरि धनाचिया मदिरा । माजौनि धनुर्द्धरा ।  
 कृत्याकृत्यविसरा । सवते केले ॥ ७९ ॥  
 जें आर्गि आइति ऐसी । तेथ यज्ञाची गोठि कायिस्ती ।  
 तन्हीं काह काह पीसी । न करिति गा ॥ ८० ॥



झणौनि कोणें येकें वेलें । मौढ्यमदाचेनि बलें ।  
 यागाचें हिं टवालें । आदरीति ॥ ८१ ॥  
 ना कुडें मंडप वेली । कां उचितसाधनसमृद्धी ।  
 आणि तेयांसी चि तवं विधि । दंद चि किर ॥ ८२ ॥  
 देवांब्राह्मणाचेनि नावें । तेउते वारेन हीं नोहावे ।  
 ऐसें तेथ देयावें । लागेल कवणां ॥ ८३ ॥  
 पै वांसुखांचा भोकसा । गायी पुढां ठेउनि जैसा ।  
 उगाणा घेंति क्षीररसा । बुद्धिमंत ॥ ८४ ॥  
 तैसें यागाचेनि नावें । जगा वाउनि हांवे ।  
 नागवीति आश्रवें । ऐहेरा वाऱ्हीं ॥ ८५ ॥  
 ऐसा काहिं आपुलिया । होमीति जे उजरिया ।  
 तेणें कामिति प्राणियां । सर्वनाशु ॥ ८६ ॥

अहंकारं बलं दर्पं कामं क्रोधं च संश्रिताः ॥

मामात्म परदेहेषु प्रद्विषंतोभ्यसूयकाः ॥ १८ ॥

मग पुढां भेरी निसाण । लाउनि तैं दीक्षितपण ।  
 जर्गीं फोकरीति आण । वायों वायों ॥ ८७ ॥  
 तेधवां महत्वे तेणें अधमां । तेयां सगरवां हिं चढे महिमा ।  
 जैसे लेवे दीधले तमा । काजलाचे ॥ ८८ ॥  
 तैसे मौढ्य घणावे । अहंकारु दुणावे ।  
 औद्धत्ये उंचावे । अहंभाउ ॥ ८९ ॥  
 मग दुजेयाची भाक । नुरावेया निःशेष ।  
 बलियेपणें आणिक । होये बल ॥ ९० ॥  
 ऐसा अहंकारा बला । जालियां एकवला ।  
 दर्पसागरु वेला । सांडुनि उते ॥ ९१ ॥  
 मग बोसंडलेनि दर्पें । कामां हिं पीत्त कुरुपे ।  
 तेया धगी सैध पल्लिपे । क्रोधाभिची ॥ ९२ ॥

तेथ उन्हाला आणि पुरा । तेलातूपाचेया घठारा ।  
 लागला आणि वारा । सूटला जैसा ॥ ९३ ॥  
 तैसा अहंकार आलाबला । दुर्पु कामक्रोधी रुढला ।  
 एयां दोहींचा मेला । जेयाचां ठांडं ॥ ९४ ॥  
 तो आपुलिया स्वैछा । मग कोणी कोणीं ठांडं हिंसा ।  
 यां प्राणियांतें वीरेषा । न सधीति गा ॥ ९५ ॥  
 पहिलें तबं धनुर्द्धरा । आपुलिया मांसा रुधिरा ।  
 वेचु करिति अभिचारा । लागौनियां ॥ ९६ ॥  
 तेथ जालितु तियें देहें । तेयां माक्षि मीं आहें ।  
 तेया आत्मेयां मज घाए । वाजति ते ॥ ९७ ॥  
 आणि अभिचारिकिं तिहीं । उपद्रवीति जेतुलें काहीं ।  
 चैतन्य मीं चि पाहिं । सीणु पावें ॥ ९८ ॥  
 ऐसें अभिचारा वेगलें । विपायें जें अवगळे ।  
 ते टाकीति एटालें । पैशून्याचिं ॥ ९९ ॥  
 सतिया संतपुरुष । दानशील याज्ञिक ।  
 तपस्वी अलौलिक । सन्यासी जे ॥ ४०० ॥  
 कां भक्त हान महात्म्ये । तियें माझीं निजधामें ।  
 निर्वाळलीं होमैं धर्मैं । श्रौतादिकीं ॥ १ ॥  
 तेया द्वेषाचेनि कालकूटें । बासटूनि तीखटें ।  
 कुबोलाचिं सदटें । सिंधिति कांडें ॥ २ ॥

तानहं द्विषतः क्रूरान्संसारेषु नराधमान् ॥

क्षिपाम्यजस्रमशुभानासुरीष्वेवयोनिषु ॥ १९ ॥

ऐसें आघवेया चि परीं । प्रवर्तले माझां वैरीं ।  
 तेयां पापियां मीं करी । तें आइक पां ॥ ३ ॥  
 तरि मनुष्यदेहाचा तागा । घेउनि रुसति जगा ।  
 ते पदवी हिरौनि पै गा । ऐसे ठेवीं ॥ ४ ॥

क्लेशगाविंचां उकरडां । भवपुरिचां पाणवाडां ।  
 ते तमोयोनि तेयां कुडां । वृत्ति मीं दे ॥ ५ ॥  
 मग आहाराचेनि नावें । तृण हीं जेथ नुगवे ।  
 ते व्याघ्र वृक अटवे । तैसियां करिं ॥ ६ ॥  
 तेथ क्षुधादुःखें बहूतें । तोडुनि खातां आपणपेयातें ।  
 मरों मरों माघौते । होंते चि असति ॥ ७ ॥  
 कां आपुलां गरलज्वालीं । जालीं तेयां आंगाचि पेंदळीं ।  
 ते सर्प चि करीं बिलीं । निरुधलां ॥ ८ ॥  
 परि घेउनि श्वासु घापे । येतुलेन हिं मापें ।  
 विसांवां तेयां लिपे । अर्जुना गा ॥ ९ ॥  
 ऐसेनि कल्पांचिया कोडी । गणितां हीं संख्या थोडी ।  
 तेतुला वेलु न कठीं । क्लेशौनि तेयां ॥ १० ॥  
 तन्हीं तेयां जेथ जाणें । तेथिचें हें पहिलें पेणें ।  
 ते पाहुनु ये दांरुणें । नव्हंति दुःखें ॥ ११ ॥

आसुरीं योनिमापन्ना मूढा जन्मनि जन्मनि ॥

मामप्राप्यैव कौंतेय ततो यांत्यधर्मां गतिम् ॥ २० ॥

हा ठाऊ वेन्हीं घरीं । संपत्ति ते आसुरी ।  
 अधोगति अवधारिं । जोडिली तिहीं ॥ १२ ॥  
 पाठि व्याघ्रादि तामसा । योनि तो अलुमालु ऐसा ।  
 देहाधाराचा उसासा । आथि जो हा ॥ १३ ॥  
 तो ही मीं वोलावा हिरे । मग तम चि होंति यकसरें ।  
 तेथ गेलें आंधारें । कालवंडिजे ॥ १४ ॥  
 जेयाचिया चिलसी । नरक घेंति विवसी ।  
 सीणु जाये मूसीं । साणे जेणें ॥ १५ ॥  
 मलु जेणें मैले । तापु जेणें पोले ।  
 जेयाचेनि नावें सले । महाभय ॥ १६ ॥

ऐसे विश्वाचेया खटेया । अधम जे धनंजया ।  
 ते ते होंति भोगावेया । तामसा योनी ॥ १७ ॥  
 आहा सांघतां वाचा रडे । आठवितां मन खिरडे ।  
 कट रे मूर्खि केवडे । जोडिलें होणें ॥ १८ ॥  
 काइसेया ते आसुर । संपत्ति जोडावी वाउर ।  
 जिया दीधलें थोर । पतन ऐसें ॥ १९ ॥  
 हणौनि तुवां धनुर्द्धरा । न व्हावें गा तिया मोहरा ।  
 जेउता वासु असुरा । संपत्तिवंतां ॥ ४२० ॥  
 त्रिविधं नरकस्येदं द्वारं नाशनमात्मनः ॥  
 कामः क्रोधस्तथा लोभस्तस्मादेतत्त्रयं त्यजेत् ॥ २१ ॥  
 आणि दंभादि दोष साई । हे संपूर्ण जेयाचां ठाई ।  
 ते त्यजावें हें चि काई । हणों किर ॥ २१ ॥  
 परि काम क्रोध लोभ । येयां तिहींचें बिंब ।  
 थावे तेथ अशुभ । प्रकाशलें जाण ॥ २२ ॥  
 सर्वदुःखा आपुलेया । दर्शन धनंजया ।  
 पाढाउ भलेया । दिधलें आधि ॥ २३ ॥  
 कां पापिया नरकभोगीं । सुवावेया लागि जर्गीं ।  
 पातकांची दाटुगी । सभा चि हे ॥ २४ ॥  
 ते रौरव गा तवं वेरि । आइकिजति गा अपटांतरीं ।  
 जवं तीन्हीं अंतरीं । उठीति नां हे ॥ २५ ॥  
 अपायें येणें आसलग । यातना इहिं सवंध ।  
 हाणि हाणि नोहे तीघ । हे चि हाणी ॥ २६ ॥  
 काइ बहू बोलों सूभटा । सांघितलेयां निक्कष्टां ।  
 नरकाचा दारवठा । त्रिसांकु हा ॥ २७ ॥  
 ययां क मक्रोधां लोभां । माजि जीवें जो होये उभा ।  
 तो निरयपुरिची सभा । पातला जाण ॥ २८ ॥



### भावार्थदीपिका

ह्यणौनि पुडुतीं किरीटी । हे कामादिदोषत्रिपुटी ।  
त्यजावी गा बोखटी । आघवां विखीं ॥ २९ ॥

एतैर्विमुक्तः कौंतेय तमोद्धारैस्त्रिभिर्नरः ॥

आचरत्यात्मानः श्रेयस्ततो याति परां गतिम् ॥ २९ ॥

धर्मादिक चहुं आतु । पुरुषार्थाची तैं चि मातु ।  
करावी जैं सांघातु । सांडील हा ॥ ४३० ॥  
हे तीन्ही जिर्वीं जागती । आणि निकेयाचि प्राप्ति ।  
हे माझे कान नाइकती । देवो ह्यणे ॥ ३१ ॥  
जें आपणपें पढिये । आत्मनाशा जो भिये ।  
ते तेणें न धरावी सोये । निश्चयेंसीं ॥ ३२ ॥  
पोटीं बांधौनि पाखाण । समुद्रिं बाहिं आंगवण ।  
कां जियावेया जेवण । कालकूटाचें ॥ ३३ ॥  
इहीं कामक्रोधलोभेंसीं । कार्यें सिद्धति तैसीं ।  
ह्यणौनि ठावो चि पूसीं । येयांचा गा ॥ ३४ ॥  
जें काहीं अवचटें । हे तिकडी सांखल फीटे ।  
तैं सुखें आपुलिये वाटे । चालों लाभे ॥ ३५ ॥  
त्रिदोषीं सांडिलें शरीर । त्रिकुटी फीटलेयां नगर ।  
त्रिदाघ निमालेयां अंतर । जैसें होए ॥ ३६ ॥  
तैसा कामादिकिं तिघीं । सांडिला सुखा पावे जगीं ।  
संगु लाहे मोक्षमार्गी । सज्जनाचां ॥ ३७ ॥  
मग सत्संगें प्रबलें । सत्शास्त्राचेनि बलें ।  
जन्ममृत्युचि निमालें । निस्तरे रानें ॥ ३८ ॥  
तेन्हां आत्मानंदें आघवे । जे सदा वसतें बरवें ।  
तें तैसें चि पाटण पावे । गुरुकृपेचें ॥ ३९ ॥  
तेथ प्रियाची पैली सीमा । ते भेटे माउली आत्मा ।  
तिये क्षेत्रीं आटं डिडिमा । संसारिक हे ॥ ४४० ॥

जो कामक्रोधलोभां । झाडि करुनि ठाके उभा ।  
तो एवढेया येया लाभा । गोसांवि होए ॥ ४१ ॥

यः शास्त्रविधिमुत्सृज्य वर्तते कामकारतः ॥  
न स सिद्धिमवाप्नोति न सुखं न परां गतिम् ॥ २३ ॥

ना हें नावडौनि काहीं । कामादिकाचां ठाईं ।  
दाटिलें जेणें डोई । आत्मचोरें ॥ ४२ ॥  
जो जर्गी समान सकृपु । हिताहितु दाविता दीपु ।  
तो अमान्यु केला बापु । वेदु जेणें ॥ ४३ ॥  
न धरी चि विधिची भीड । न करि चि आपुली चाड ।  
वाढवीतु गेला कोड । इंद्रियांचें ॥ ४४ ॥  
कामक्रोधलोभाची कास । न सोडी चि पालिली भास ।  
स्वैराचाराचें असोस । रान रिगाला ॥ ४५ ॥  
संसारबंधु जाये । हें किर तेयाचें कें आहे ।  
परि तो इहिकीं न लाहे । विषय भोगूं ॥ ४६ ॥  
ते स्रुटिकेचिया वाहाणी । मग पियों न लाहे पाणी ।  
स्वप्नीं हीं ते काहाणीं । दूरी चि तेया ॥ ४७ ॥  
तरि मांसा लागि भूलला । ब्राह्मणु पाणवाडां रिगाला ।  
किं तेव्हां चि तेथ लागला । आगि जैसा ॥ ४८ ॥  
तैसें विषयांचेनि कोडें । जेणें परत्रा केलें उबडें ।  
तव तो चि आनी कडे । मरणें नेला ॥ ४९ ॥  
एवं परत्र ना स्वर्गु । इहिक ना विषयभोगु ।  
तेथ केउता प्रसंगु । मोक्षाचा तो ॥ ४५० ॥  
ह्मणौनि कामाचेनि बलें । विषयो चरों पाहे ढालें ।  
तेया विषयो ना स्वर्गु मिले । ना उदरे तो ॥ ५१ ॥

तस्मात् शास्त्रं प्रमाणं ते कार्याकार्यव्यवस्थितौ ॥  
शास्त्रा शास्त्रं विभागोक्तं कर्म कर्तुमिहार्हम् ॥ २४ ॥

या कारणें पै बापा । जेया आपुली आधि कृपा ।  
 तेणें वेदांचेया निरोपा । आन न कीजे ॥ ५२ ॥  
 पतिचेया व्रता । अनुसरे पतिव्रता ।  
 अनायासें आत्महिता । भेटे जेवि ॥ ५३ ॥  
 नातारि श्रीगुरुवचना । दीठि देंतु जतना ।  
 शिष्यु आत्मभवना । माझि पैसे ॥ ५४ ॥  
 हें असो आपुला ठेवा । जारि हाता आधि यावा ।  
 तारि आदरें जेवि दीवा । पुढां कीजे ॥ ५५ ॥  
 तैसा अशेषां पुरुषार्थी । जो गोसांविं हों झणे पार्थी ।  
 तेणें श्रुती स्मृती माथा । बैसों घापे ॥ ५६ ॥  
 शास्त्र झणेल सांडावें । तें राज्य ही तृण मानवें ।  
 जें घेववि तें न मनावें । विष ही वीरु ॥ ५७ ॥  
 ऐसी वेदैक निष्ठा । जालेयां सूभटा ।  
 तारि कें आहे अनिष्टां । भेटणें गा ॥ ५८ ॥  
 पै अहिता पासौनि काढिती । हित देउनि वाढविती ।  
 नाहिं श्रुती परौती । माउली जर्गी ॥ ५९ ॥  
 झणौनि ब्रह्मसिं मेलवी । तव हे कोणहीं न संडावी ।  
 अगा तुझां ऐसां भजावीं । विशेषेसीं ॥ ६० ॥  
 जें आजि तूं अर्जुना एथें । करावेया शास्त्रें सार्थें ।  
 जन्मलासि बलार्थें । धर्माचेनि ॥ ६१ ॥  
 आणि धर्मा अनुज हि ऐसें । हें बोधें चि आलें पैसें ।  
 झणौनि अनारिसें । करु न ये ॥ ६२ ॥  
 कार्याकार्यविवेकीं । शास्त्रें चि करावी पारखी ।  
 अकृत्यत्व तें कुडें लोकीं । वालावें गा ॥ ६३ ॥  
 मग कृत्यपणें खरें निगे । ते तुवां आपुलेनि आंगें ।  
 आचरौनि आदरें चांगें । सारावें चि ॥ ६४ ॥

जे विश्वप्रमाणिची मुदी । आजि तूझां हातीं सुबुद्धी ।  
 लोकसंग्रहाची त्रिशुद्धी । योग्यु होंसी ॥ ६५ ॥  
 एवं आसुरवर्गु आधवा । सांघौनि तेथिचा निगावां ।  
 तो ही देवें पांडवा । निरोपिला ॥ ६६ ॥  
 या वरि तो पांडुचा । कुमरु भाउ जीवाचा ।  
 प्रसैल तें चैतन्याचां । कार्नीं आइकां ॥ ६७ ॥  
 संजयें व्यासाचेया निरोपा । तो वेलु फेडिला तेया नृपा ।  
 तैसा मी हीं निवृत्तिहृपा । सांघेन तुझां ॥ ६८ ॥  
 तुझीं संत माक्षिया कडा । दीठिचा कराल बहु वाडा ।  
 तरि तुझां मानें येवढा । होईन मीं ॥ ६९ ॥  
 ह्यणौनि निज अवधान । मज उलगे पसायदान ।  
 दीजो जी क्षमीं होईन । ज्ञानदेउ ह्यणे ॥ ७० ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां  
 योगशास्त्रे श्रीकृष्णार्जुनसंवादे दैवासुरविभागयोगो

नाम षोडशाध्यायः ।

श्रीकृष्णार्पणमस्तु ॥ छ ॥





# ज्ञानेश्वरी

## अध्याय सतरावा

श्रीगणनाथायनमः ॥

विश्वविकासिनी मुद्रा । जेया सांडे तूझी निद्रां ।  
तेया नमो जी गणेंद्रा । गुरु तुज ॥ १ ॥  
त्रिगुणत्रिपुरी वेढिला । जीवत्वदुर्गे अडिला ।  
तो आत्माशंभु सोडिला । तूझिया स्मृती ॥ २ ॥  
झणौनि शिवेंसि कांटाला । गुरुत्वे तूं चि आगला ।  
तन्हीं हृद मायाजाला । माजि तारिता ॥ ३ ॥  
जे तूझां विषीं मूढ । तेयां लागि तुं वक्रतुंडु ।  
ज्ञानियां तरि अखंडु । उजु चि अससि ॥ ४ ॥  
दैविकी दीठि पांतां सानीं । तन्हीं निमिलोन्मीलनीं ।  
जगा आदि प्रलयो दोन्हीं । लीला चि करिसी ॥ ५ ॥  
प्रवृत्तिकरणाचां चाली । उठिलीं मदाचां गंधानीलीं ।  
पूजिजसि नीलोत्पलीं । जीवभृंगाचां ॥ ६ ॥  
पाठिं निवृत्तिकर्णतालें । अहलि तें पूजा विधुले ।  
तेव्हेळें मिरविसि मोकलें । आंगाचें लेणें ॥ ७ ॥  
वामांगिचा लास्यविलासु । जो हा जगद्रूप आभासु ।  
तो तांडवमीषें कलासु । दावीसी तूं ॥ ८ ॥

हें असो विस्मो दातारा । तूं होंसि जेयांचा सोयरा ।  
 सोइरिकेचिया वेव्हारा । मूके चि तो ॥ ९ ॥  
 फेडितां बंधनाचा ठाउ । तूं जगद्रंधु ऐसा आहो ।  
 धरूं बोलगे उवाउ । तूझां चि आंगीं ॥ १० ॥  
 दूजेयाचेनि नावें तेया । देह ही नूरे चि राया ।  
 जाणों आपणपेयां । केलासि दूजा ॥ ११ ॥  
 तूतें करुनि पुढें । जे उपायें घेति दवडे ।  
 तेयां ठाकसि बहुवें पाडें । मागां चि तूं ॥ १२ ॥  
 जो ध्यानें सुये मानसीं । तेया लागि तूं नाहिं देशीं ।  
 ध्यानें चि सरे तेणेंसीं । बालभ तुज ॥ १३ ॥  
 तूतें सावध चि जो नेणे । तो नांदे सर्वज्ञपणें ।  
 वेदां हिं येवडें बोलणें । नेघसि कानीं ॥ १४ ॥  
 मौन गा तूझें राशिनावं । आतां स्तोत्रिं कें भांजे हांव ।  
 दीससि तेतुली माव । भजों कायि ॥ १५ ॥  
 दैविकें सेवक हों पाहों । तरि भेदितां द्रोहो लाहों ।  
 ह्यणौनि आतां काहिं चि नोहों । तुज लागि जी ॥ १६ ॥  
 जें सर्वथा सर्व ही नोहिजे । तैं अद्वया तूतें लागिजे ।  
 हें जाणें मीं वर्म तूझें । आराध्यलिंगा ॥ १७ ॥  
 तारि नूरौनि वेगलेपण । रसिं भजिनलें लवण ।  
 तैसे नमन माझें जाण । बहू कायि बोलों ॥ १८ ॥  
 आतां रीता समुद्रीं रिगे । तो उचंबलतु कुंभु निगे ।  
 कां दसी दीपा संगें । दीपू चि होए ॥ १९ ॥  
 तैसा तूझेया परिणती । मीं पूर्णु जालां श्रीनिवृत्ती ।  
 आतां आणीन व्यक्ती । गीतार्थु तो ॥ २० ॥  
 तरि षोडशाध्याइं शेखीं । तिये समाप्तिचां श्लोकीं ।  
 जो ऐसा निर्णयो निष्ठकीं । केला देवें ॥ २१ ॥

### भाषार्थदीपिका

जें कृत्याकृत्यव्यवस्था । अनुष्ठावेया पार्था ।  
 शास्त्र चि एक सर्वथा । प्रमाण तुज ॥ २२ ॥  
 तेथ अर्जुनु हणें मानसें । हें ऐसें कैसे ।  
 जें शास्त्रें विण नसे । सूटिका मां ॥ २३ ॥  
 तरि तक्षकाची फडे । टाकूनि कें तें माणिक काढे ।  
 कें नाकिचा केंसु जोडे । सिंहाचिये ॥ २४ ॥  
 मग तेणें तो वोविजे । तरी चि लेणें पाविजे ।  
 यन्हवि काइ असिजे । रिक्तकंठां ॥ २५ ॥  
 तैसि या शास्त्रां मोकली । इया कें वेढाली ।  
 जे येकवाक्यतेचां फलीं । पैसिजे कें ॥ २६ ॥  
 जालेयां हिं येकवाक्यता । कां लाभे वेलु अनुष्ठितां ।  
 केंचा पैसार जीविता । एतुलालेया ॥ २७ ॥  
 आणि शास्त्रें अर्थे देशें कालें । इहिं चौहिं एक जें फळे ।  
 तें बावो किं कामिलें । आघवें चि ॥ २८ ॥  
 हणौनि शास्त्राचें घडतें । नोहे प्रकारें बडुतें ।  
 तरि मूर्खां मुमुक्षां एथें । काइ गति ॥ २९ ॥  
 हा पूसावेया अभिप्राउ । अर्जुनु करील प्रस्ताउ ।  
 तो सतरावेया ठाउ । अध्याया येथ ॥ ३० ॥

अर्जुनु उवाच ॥

ये शास्त्रविधिमुत्सृज्य यजंते भक्षयाम्बिताः ॥  
 तेषां निष्ठा तु का कृष्ण सत्त्वमाहो रजस्तमः ॥ १ ॥  
 तरि सर्वविषयिं वितृष्णु । जो सकलकर्लिं सनुष्णु ।  
 कृष्णा हिं नवल कृष्णु । अर्जुनत्वे जो ॥ ३१ ॥  
 शौर्ये जोडिला आधार । जो सोमवंसिचा मृंगार ।  
 सुखादिउपचर । जेयाची झीडा ॥ ३२ ॥

जो प्रज्ञेसि प्रियोत्तमु । विद्यांचा विश्रामु ।  
 सहचरु मनोधर्मु । देवांचा जो ॥ ३३ ॥  
 तो ह्मणे गा तमालश्यामा । इंद्रियां फावलेयां ब्रह्मा ।  
 तूझा बोलु येकु आह्मां । साकांक्षु पै जी ॥ ३४ ॥  
 जे शास्त्रें वांचौनि आणिकें । प्राणियां स्वमोक्षु न देखे ।  
 ऐसें जें कैपक्षें । बोलिलें देवें ॥ ३५ ॥  
 तरि न मिले चि तो देशु । नोहे चि काला अवकाशु ।  
 जो करवि शास्त्राभ्यासु । तो ही दूरि ॥ ३६ ॥  
 अभ्यासीं विरजिया । होंति जिया सामग्रिया ।  
 तेया ही नाहिं आपैतिया । तेणें वेलें ॥ ३७ ॥  
 उजू नोहे चि प्राचीन । नेंदी चि प्रज्ञा संवाहन ।  
 ऐसें ठेलें आपादान । शास्त्रांचें जेया ॥ ३८ ॥  
 किंबहुना शास्त्रविहिं । एकि ही न लाहांती चि नाखी ।  
 ह्मणौनि उखीविखी । सांडिली जिहिं ॥ ३९ ॥  
 परि निर्द्धारुनि शास्त्रें । अर्थानुष्ठानें पवित्रें ।  
 नांदताति परत्रें । आचारें जे ॥ ४० ॥  
 तेयां ऐसें आहिं होआवें । ऐसी चाड बांधौनि जीवें ।  
 घेंति तेयाचे मागावे । आचरावेया ॥ ४१ ॥  
 धडेयांचेयां आखरा । तलिं बाल लिहे दातारा ।  
 कां पुढां सूनि काठिकारा । अक्षमु चाले ॥ ४२ ॥  
 तैसें सर्वशास्त्रनिपुण । तेयांचें जें आचरण ।  
 तें चि करीति प्रमाण । आपुलिये श्रद्धे ॥ ४३ ॥  
 मग शिवादिकें पूजनें । भूम्यादिकें महादानें ।  
 अग्निहोत्रादि यजनें । करीति जे श्रद्धा ॥ ४४ ॥  
 तरि तिया सत्वरजतमां । माजि कोणि पुरुषोत्तमा ।  
 गति होये ते आह्मां । सांघिजो जी ॥ ४५ ॥

## भाषार्थदीपिका

श्रीभगवानुवाच ॥

त्रिविधा भवति श्रद्धा देहिनां सा स्वभावजा ॥

सात्त्विकी राजसी चैव तामसी चेति तां शृणु ॥ २ ॥

जो निगमपद्माचें पराग । जो वैकुण्ठपीठिचें लिंग ।

जिये जेयाचिया जग । अंगछाया ॥ ४६ ॥

कालु सवियां चि वाडु । लोकोत्तर प्रौढ ।

अद्वितीयु गूढ । आनंदघनु ॥ ४७ ॥

इयें श्लाघ्यजती जेणें बीकें । जेयाचेनि आकाशअंग असिकें

तो श्रीकृष्ण स्वमुखें । बोलतुसे ॥ ४८ ॥

ह्मणे पार्था तूझा अतिसो । घेइं गा आर्क्षि जाणतसों ।

शास्त्रअभ्यासाचा आडसो । मानितोसि किं ॥ ४९ ॥

नसुदिया चि श्रद्धा । झोंबों पाहांसि परमपदा ।

तरि तैसें हें प्रबुद्धा । सोहपें नोहे ॥ ५० ॥

श्रद्धा ह्मणितलेया चि साठीं । पातिजों न ये किरीटी ।

कायि द्विजु अंत्यजुवृष्टी । अंत्यजु नोहे ॥ ५१ ॥

गंगोदक जन्हीं जालें । तन्हीं मद्यभांडां आलें ।

घेउं ये काहिं केलें । विचारि पां ॥ ५२ ॥

चंदनु होये शीतलु । परि अग्निसिं पावे मेलु ।

तो हार्ति धरिलेयां जालुं । न शके काई ॥ ५३ ॥

कां कीडाचिये पुटीं । पडिलें सोने किरीटी ।

घेतलेयां सोलें साठिं । नागवी नां ॥ ५४ ॥

तैसें श्रद्धेचें दळवाडे । आंगें किर चोखडें ।

परि प्राणियां चांपडे । विभागें जें ॥ ५५ ॥

आणि प्राणिये तवं स्वभावें । अनादिमायाप्रभवें ।

गुणाचे चि आववे । वलिले आथि ॥ ५६ ॥

### अध्याय १७ वा

६५

तेथ ही दोनि गुण खंचति । मग एकु धरी उन्नती ।  
 तैं तैसी चि होति वृत्ति । जीवांचिया ॥ ५७ ॥  
 वृत्ती ऐसें मनीं धरिति । मना ये ऐसी क्रिया करिति ।  
 केलेयां ऐसें वरीति । मरौनि देह ॥ ५८ ॥  
 बीज मोडे झाड होये । झाड सुकळें बिजि माये ।  
 ऐसेनि कल्पकोडी जाये । जाति न नशे ॥ ५९ ॥  
 तिया परिं इयें अपारें । होंत जांत जन्मांतरें ।  
 त्रिगुणत्व न व्यभिचरे । प्राण्यांचें ॥ ६० ॥  
 ह्यणौनि प्राण्यांचां पैकीं । पडिली श्रद्धा अवलोकिं ।  
 होये गुणा सारिखी । तिहिं येयां ॥ ६१ ॥  
 विपायें वाढे सत्व शुद्ध । जेधवां ज्ञान चि करी साध ।  
 परि येका दोनि बोखद । येर आहाति ॥ ६२ ॥  
 सत्वाचेनि आंगलर्गे । ते श्रद्धा मोक्षफला रिगे ।  
 तवं रजतम उगे । कां पां राहाति ॥ ६३ ॥  
 मोडूनि सत्वाची त्राये । रजोगुण आकाशें जाये ।  
 तेव्हां ते चि श्रद्धा होये । कर्माची सुणी ॥ ६४ ॥  
 मग तमाची उठी आगि । तेधवां ते चि श्रद्धाभंगी ।  
 हों लागे भोगा लागि । भलेतेया ॥ ६५ ॥  
 एवं सत्वरजतमां । वेगलाली श्रद्धा सुवर्मा ।  
 नाहिं भूतग्रामां । माजि येयां ॥ ६६ ॥  
 ह्यणौनि श्रद्धा स्वाभाविक । असे गुणत्रयात्मक ।  
 रज तम सात्विक । भेदिं इहिं ॥ ६७ ॥  
 जैसैं जीवन चि उदक । परि विशिं होये मारक ।  
 कां मिरियां माजि तीख । उंसिं गोड ॥ ६८ ॥  
 तैसा बहुवसें तमें । जो सदा होये निमे ।  
 तेथ श्रद्धा परिणमे । तें चि होउनि ॥ ६९ ॥

मग काजला आणि मसि । न दिसे विवंचना जैसी ।  
 ते चि श्रद्धा तामसी । सिनानी नाहिं ॥ ७० ॥  
 तैसी चि राजसी जीवि । रजोमय जाणावी ।  
 सात्विकि आववी । सत्वाचि चि ॥ ७१ ॥  
 ऐसेनि हा सकल । जगडंबरु निखलु ।  
 श्रद्धेचा चि केवलु । बोतिला असे ॥ ७२ ॥  
 परि गुणत्रयवसे । त्रिविधपणांचें लासे ।  
 श्रद्धे जें उठिलें असे । तें चि बोलख ॥ ७३ ॥  
 तारि जाणिजे झाड फूलें । मानस जाणिजे बोलें ।  
 भोगें जाणिजे केलें । पूर्वजन्मिचें ॥ ७४ ॥  
 तैसि जिहि जिहि चिन्हि । श्रद्धेचीं रूपें तिन्हीं ।  
 देखति ते वानी । अवधारि पां ॥ ७५ ॥

सत्त्वानुरूपा सर्वस्य श्रद्धा भवति भारत ॥

श्रद्धामयो यं पुरुषे यो यच्छ्रद्धः स एव सः ॥ ३ ॥

तारि सात्विकी श्रद्धा । जेयांचा होये बांधा ।  
 तेया बहू करुनु मेधा । स्वर्गिची आथि ॥ ७६ ॥

यजंते सात्विका देवान्यक्षरक्षांसि राजसाः ॥

प्रेतान्भूतगणां श्रान्ये यजंते तामसा जनाः ॥ ४ ॥

ते विद्याजात पठति । यज्ञक्रिया निवडिति ।

किंबहुना पडति । देवपैकिं ते ॥ ७७ ॥

आणि श्रद्धा राजसां । घडिजे वीरेशा ।

ते भजति राक्षसां । खेचरां हान ॥ ७८ ॥

जीववधें साधूनि बलि । भूतप्रेतकुलें मौली ।

श्मशानीं संध्याकालीं । पूजिति जे ॥ ७९ ॥

ते तमोगुणाचें सार । काढूनि निर्मिले नर ।

जाण तामसियेचें घर । श्रद्धेचें तिये ॥ ८० ॥

ऐसा इहिं तिहिं लिगिं । त्रिविध श्रद्धा जगिं ।  
 पै हें इं यया लागि । सांघतसें ॥ ८१ ॥  
 जे हे सात्विक श्रद्धा । जतना धरावी प्रबुद्धा ।  
 येरी दोन्हीं विरुद्धा । सांडाविया ॥ ८२ ॥  
 हे सात्विकी श्रद्धा जेया । निर्वाहाती होये धनंजया ।  
 बागुल नाहिं तेया । कैवल्य तें ॥ ८३ ॥  
 तो न पढो कां ब्रह्मसूत्र । नालोडू सर्वशास्त्र ।  
 सिद्धांतु नव्हंतु सतंत । तेयाचां हातीं ॥ ८४ ॥  
 पारि श्रुतिस्मृतिचे अर्थ । जे आपण होउनि मूर्ख ।  
 अनुष्ठानें जगा देंत । बडिल जे गा ॥ ८५ ॥  
 तेयांचि आंचरतिं पाउलें । पाहुनि सात्विक श्रद्धा चाले ।  
 तो तें चि फल ठाविलें । ऐसें पावे ॥ ८६ ॥  
 पै येकुं दीपुं लावी सायासें । आणिकु फांकावेया तेथ बैसे ।  
 तरि काइ प्रकाशें । बंचिजे गा ॥ ८७ ॥  
 कां येकें मोल अपार । वेचुनु बांधलें ढबलार ।  
 तो सुरवाडु वस्तिकर । न भोगि काइ ॥ ८८ ॥  
 हें असो जो तलें करी । तेयाची चि तृषा हरी ।  
 तें सर्वा आन करी । हें विचारि पां ॥ ८९ ॥  
 हें बहू काइ बोलों पै गा । एका गौतमासी चि गंगा ।  
 एरां समस्तां काइ गा । वोहल जाली ॥ ९० ॥  
 ह्यणौनि आपुलिया परी । शास्त्र अनुष्ठिति कुसरी ।  
 तेयातें श्रद्धालु जो वरी । तो मूर्खु ही तरे ॥ ९१ ॥

अशास्त्रविहितं घोरं तप्यन्ते ये तपो जनाः ॥

दंभाहंकारसंयुक्ताः कामरागबलान्विताः ॥ ५ ॥

ना शास्त्राचेन किर नावें । खांकरुं हिं न ये थावें ।

परि शास्त्राहा हिं सीवे । ठेकें नेंदी ॥ ९२ ॥



वडिलांचिया क्रिया । छांदसत्वे वांकुलिया ।  
 दावीति डाकुलिया । वाजवीति ॥ ९३ ॥  
 आपुलेनी चि आटोपें । धनत्वाचेनि दर्पें ।  
 साचाचि खंडित तपें । आदरिलीं ॥ ९४ ॥  
 आपुलिया पुढिलाचेया । आंगा घादनि कातिया ।  
 रक्ता मांसा प्राणितिया । भरूं भरूं देंती ॥ ९५ ॥  
 रिचवीति जलतां कुंडीं । लावीति चेडेयाचां तोंडीं ।  
 नवसिये देंत उंडी । बालकांची ॥ ९६ ॥  
 आग्रहाचिया उजिरिया । क्षुद्रदेवतां वन्हीयां ।  
 अन्नत्यागें सातरिया । टाकिति एक ॥ ९७ ॥  
 आगा आत्मपरपीडा । बीज तमक्षेत्रीं सुहाडा ।  
 पेरीति मग पुढां । तें चि पीके ॥ ९८ ॥  
 बाहिं नाहिं जोडि आपुलेया । आंगें न्हवती चि धनंजया ।  
 मग चिंति तें तेयां । होये कां ऐसे ॥ ९९ ॥  
 वेद्यातें करीति साला । रसु घाली पांउखला ।  
 तो रोगिया विव्हला । सोवता होये ॥ १०० ॥  
 नाना पढिकराचेनि सलें । काढी आपुले डोले ।  
 ते वोणवां चाले आंधलें । जैसैं ठाके ॥ १ ॥  
 तैसैं तेयां तामसां होये । जें निंदूनि शास्त्रांची सोये ।  
 सैघ धांवति मोहें । आडाइले ॥ २ ॥  
 कामु करवी तें करिति । क्रोधु मारवी तें मारीति ।  
 किबहुना मातें दुखविति । दुःखाचां गुंडां ॥ ३ ॥  
 कर्षयंतः शरीरस्थं भूतग्राममचेतसः ॥  
 मां चैवांतःशरीरस्थं तान्विध्यासुरनिश्चयान् ॥ ६ ॥  
 आपुलां परावां देहीं । जें वीरुं करिति काहिं ।  
 तें मज आम्हेयां पाहिं । होये सीणु ॥ ४ ॥

पैं बाचेचेनि पालवें । पापिया तेयां नातलावें ।  
 परि पडिलें सांघावें । लज्यावेया ॥ ५ ॥  
 प्रेत बाहिरें घालिजे । कां अंत्यु जैसा भखलिजे ।  
 हें असो हातें क्षालिजे । कष्मलातें ॥ ६ ॥  
 तेथ शुद्धिचेया आशा । तो लेपु न मनावा जैसा ।  
 तेयातें सांडावेया तैसा । अनुवादु हा ॥ ७ ॥  
 परि अर्जुना तूं तेयातें । देखसी तैं स्मर हो मातें ।  
 जें आन प्रायश्चित्त येथें । मानैल ना ॥ ८ ॥

आहारस्त्वपि सर्वस्य त्रिविधो भवति प्रियः ॥

यज्ञस्तपस्तथा दानं तेषां भेदमिमं शृणु ॥ ७ ॥

क्षणौनि श्रद्धा जे सात्विकी । पुढुतिं तिये चि पैं एकी ।  
 जतन करावी नीकी । सर्वा परी ॥ ९ ॥  
 धरावा तैसा संगु । जेणें पोखे सात्विक लागु ।  
 सत्ववृद्धिचा भागु । आहार घेपे ॥ ११० ॥  
 यन्हविं तन्हीं पाहिं । स्वभावो वृद्धिचां ठांड ।  
 आहार वांचौनि नाहिं । बलि हेतु ॥ ११ ॥  
 प्रत्यक्ष पाहे पां बीरा । जो सावधु घे मदिरा ।  
 तो होउनि ठाके माजिरा । तिये चि क्षणीं ॥ १२ ॥  
 कां जो सर्वान्नरस सेवी । तो व्यापिजे वायुस्वभाविं ।  
 दाहक जाली निववी । पथ्यादिक ॥ १३ ॥  
 नातारि अमृत जेया परी । घेतलें अमरां करी ।  
 कां आपुलेया ऐसें करी । सेविलें विष ॥ १४ ॥  
 तेवि घेपे जैसा आहार । धातू तैसा चि होये आकार ।  
 धातू ऐसा अंतर । भावो पोखे ॥ १५ ॥  
 जैसें भांडेयाचेनि तापें । आंतुल उदक तापे ।  
 तैसी धातुवसें आटोपे । चित्तवृत्ती ॥ १६ ॥

ह्यणौनि सात्त्विकु रसु सेविजे । तै सत्त्वाची बाढि पाविजे ।  
 राजसां तामसां होइजे । येरि रसि ॥ १७ ॥  
 तरि सात्त्विकु कोणु आहार । राजसां तामसां काइ आकार ।  
 हें सांघों करी आदर । आकर्णनीं ॥ १८ ॥  
 आणि येकसरेया आहारा । कैसेनि तिनि मोहरा ।  
 जालिया तें हिं वीरा । रोकडें दाउं ॥ १९ ॥  
 तरि जेव्हणाराचिया रुची । निष्पत्ति कीं बोनेयांची ।  
 आणि जेवितां तवं गुणाची । दासि होये ॥ २० ॥  
 जो जीउ कर्त्ता भोक्ता । तो गुणा तव स्वभावता ।  
 पावौनियां त्रिविधता । चेष्टे त्रिधा ॥ २१ ॥  
 ह्यणौनि त्रिविध आहार । यज्ञ हिं किर त्रिप्रकार ।  
 देणें हाम व्यापार । त्रिविध चि तें ॥ २२ ॥

आयुःसत्त्वबलारोग्यसुखप्रीतिविवर्धनाः ॥

रस्याः स्निग्धाः स्थिरा हृद्या आहाराः सात्त्विकप्रियाः ॥ ८ ॥

परि आहारलक्षण पहिलें । सांघों जें ह्यणितलें ।  
 तें आइक भलें । रूप करुं ॥ २३ ॥  
 तरि सत्वगुणा कडे । जें दैवें भोक्ता पडे ।  
 तें मधुरिं रसिं घडे । मेचु तेया ॥ २४ ॥  
 आंगें चि द्रव्यें सुरसें । जें आंगें चि पदार्थ गोडिसे ।  
 आंगें चि स्नेह बहुवसें । सुपकें जियें ॥ २५ ॥  
 आकारें नव्हंति डगलें । स्पर्शि अति मौबालें ।  
 जीभे लागलीं स्नेहालें । स्वादीं जियें ॥ २६ ॥  
 रसें गाढिं वरि ढिलीं । द्रव भावें आथिलीं ।  
 ठायें ठाऊं सांडिलीं । अग्नितापें ॥ २७ ॥  
 आंगां सानें परिणामें थोर । जैसें गुरुमुखिचें अक्षर ।  
 तैसे अल्पें जन्हीं आहार । तृप्ति राहे ॥ २८ ॥

आणि मुखि जैसिं गोडें । तैसीं देहा आंतुली कडे ।  
 तिहिं अनीं प्रीति वाढे । सात्विकाची ॥ २९ ॥  
 एवंगुणलक्षण । सात्विक भोग्य जाण ।  
 आयुष्याचें त्राण । नीच नवें ॥ १३० ॥  
 येणें सात्विकें रसें । जवें देहिं मेहो वरिसे ।  
 तवें आयुष्यनदी उससे । देहाची देहा ॥ ३१ ॥  
 सत्वाची किर पाळती । करणें हें चि सुमती ।  
 दिवसाचिये उन्नती । भानु जैसा ॥ ३२ ॥  
 कां शरीरा आणि मनसा । बलाचा पैकु वांसा ।  
 हा आहार तें दशा । कैची रोगां ॥ ३३ ॥  
 हा सात्विकु होये भोग्य । तें भोगावें आरोग्य ।  
 शरीरा भाग्य । उदैलें जाणों ॥ ३४ ॥  
 आणि सुखाचें घेणेंदेणें । नीकें उवायाये येणें ।  
 हें असो वाढे साजणें । आनंदेंसीं ॥ ३५ ॥  
 ऐसा सात्विकु आहार । परिणमला थोर ।  
 करी उपकार । सबाह्यासि ॥ ३६ ॥

कट्वम्ललवणात्युष्ण तीक्ष्णरूक्षविदाहिनः ॥

आहारा राजसस्येष्टा दुःखशोकामयप्रदाः ॥ ९ ॥

आतां राजसासि प्रीति । जिहिं रसिं आथि ।  
 करुं तेया ही व्यक्ती । प्रसंगें गा ॥ ३७ ॥  
 तारि मारें उणें कालकूट । तेणें मानें कडुवट ।  
 कां चूनेयाहुनु दासट । अम्लीं हान ॥ ३८ ॥  
 कणिकेतें जैसें पाणी । तैसें मीठ बांधेयातें आणीं ।  
 तेतुली चि मेलवणी । रसांतराची ॥ ३९ ॥  
 ऐसें खार अपाडें । राजसा तेया आवडे ।  
 उन्हाचेन मीळें तोंडें । अग्नी चि रिगो पां ॥ १४० ॥

बाफेभिये सीगे । वाति ही लागे ।  
 तैसें उन्ह मागे । राजसु तो ॥ ४१ ॥  
 वावंदणें पाडुनु पाए । सबलु डाहारला ठाये ।  
 तैसें तिखट खाये । जें घायें विण लागे ॥ ४२ ॥  
 आणि राखेहूनु कोरडें । आंतु बाहिर पांकि जे पोपडे ।  
 तो जिन्हाडसु आवडे । बहू तेया ॥ ४३ ॥  
 परस्परें दांतां । आडलु होये खातां ।  
 तो गा तोंडिं घेंतां । तोखों लागे ॥ ४४ ॥  
 आधिं चि द्रव्यें चुरुमुरीं । वरि परिवंडिलीं मडुरीं ।  
 जिये घेंतां होये धुवारी । नाकतोंडाची ॥ ४५ ॥  
 हें असो उगें आगितें । ह्मणे तैसें राइतें ।  
 पढिये प्राणा परौतें । राजसासि गा ॥ ४६ ॥  
 ऐसा न पुरौनि तोंडा । जीभा केला वेडा ।  
 अन्नमीखें भडभडां । आगी चि खाए ॥ ४७ ॥  
 तैसा चि लवंगा सूटे । मग भुयिं ना सेजे सांटे ।  
 पाणियांचें न फिटे । तोंडूनि पात्र ॥ ४८ ॥  
 ते आहार नव्हंति घेतले । व्याधिव्याल सुतले ।  
 ते चेषवावेया घातले । पोटा माझि ॥ ४९ ॥  
 तैसें येकमेकां सलें । रोग उठिति एकें वेलें ।  
 ऐसा राजसु फले । केवल दुःखें ॥ १५० ॥  
 एवं राजसा आहारा । रूप केलें धनुर्द्धरा ।  
 परिणामाचा ही विसुरा । सांघितला ॥ ५१ ॥

यातयामं गतरस्सं पूतिपर्युषितं च यत् ॥

उच्छिष्टमपि चामेध्यं भोजनं तामसप्रियम् ॥ १० ॥

आतां तेया तामसा । आवडि आहारिं परियसां ।  
 तें हिं सांघों चिलसा । ज्ञनें तुह्मीं ॥ ५२ ॥

तरि कुहिलें उसिटें खातां । न मनी काहिं अनहिता ।  
 कां साजुका नासका । हेंसि जैसी ॥ ५३ ॥  
 निफजलें अन्न तैसें । दुपाहारी कां दिवसें ।  
 अतिकरें तैं तामसें । घेइजे तें ॥ ५४ ॥  
 नातरि अधोकढीं ठेलें । कां निन्हां करपौनि गेलें ।  
 तैसि हिं खाये चूकले । रसा जें येवों ॥ ५५ ॥  
 जेया कां आधि निष्पत्ति । जेथ रसु धरी व्यक्ती ।  
 तें अन्न ऐसें प्रतीती । तामसा नाहिं ॥ ५६ ॥  
 ऐसेन काहिं विपायें । सदन्ना वरिपडा होये ।  
 तरि घाणि सूटे तवं रोहे । व्याघ्रु जैसा ॥ ५७ ॥  
 किं बौद्धविं दिसिं वोलांडिलें । सुरसपणें सांडिलें ।  
 शुष्क अथवा सडिलें । गाभिणें हिं हो ॥ ५८ ॥  
 तें हिं बालांचे हात वेन्हीं । चिवडिली जैसी घारी ।  
 कां सर्वे बैसौनि नारी । आघेलें करी ॥ ५९ ॥  
 ऐसेनि कश्मलें जें खाए । तें तेया जेविलें ऐसें होये ।  
 परि एणें हिं न धाए । पापिया तो ॥ ६० ॥  
 मग चमतिकारु देखां । निपेधाचा आंबुखा ।  
 जेया कां सदोषा । कुद्रव्यांसि ॥ ६१ ॥  
 तेयां अपेयाचां पानीं । अखाद्याचां भोजनीं ।  
 वाढविजे उत्तान्ही । तामसें तेणें ॥ ६२ ॥  
 एवं तामसा जेव्हणारा । ऐसी चि मेचु वीरा ।  
 याचें फल दुसरां । क्षणि नाहिं ॥ ६३ ॥  
 जें जेव्हां चि अपवित्र । सेवी तेयाचें वक्त्र ।  
 तेव्हां चि पापा पात्र । जाला किं तो ॥ ६४ ॥  
 एया परौतें जेवी । ते जेविती वोज न ह्मणावी ।  
 पोटीं भरती जाणावी । यातना ते ॥ ६५ ॥

शिरछेदें काइ होये । कां आगी रिघतां कैसैं आहे ।  
 हें जाणावें काइ पाहे । वरि साहातु असे जो ॥ ६६ ॥  
 झणौनि तामसा अन्ना । परिणामु गा सिना ।  
 न संघों चि गा अर्जुना । देवो ह्मणे ॥ ६७ ॥

अफलाकांक्षिभिर्यज्ञो विधिदृष्टो य इज्यते ॥  
 यष्टव्यमेवेति मनः समाधाय स सात्विकः ॥ ११ ॥

आतां एया वरि । आहाराचिया परी ।  
 यज्ञु हिं अवधारिं । त्रिधा असे ॥ ६८ ॥  
 परि तिं माजि प्रथम । सात्विक यज्ञाचें वर्म ।  
 आइक पां सुवर्म । शिरोमणी ॥ ६९ ॥  
 तारि येकु प्रियोत्तमु । वांचुनु वाढों नेंदी कामु ।  
 जैसा कां मनोधर्मु । पतिव्रतंचा ॥ १७० ॥  
 ना सिंधुतें टाकुनि गंगा । पुढां न करी चि निगा ।  
 कां आत्मा देखौनि उगा । वेदु ठेला ॥ ७१ ॥  
 तैसें जें आपुला विहिति । वेचौनियां चित्तवृत्ती ।  
 नुरती चि अहंकृती । फला लागि ॥ ७२ ॥  
 पांतलेयां झांडांचें मूल । माघौतें सरो नेणिजे चि जल ।  
 जिरालें चि कां केवल । तेयाचां आंगीं ॥ ७३ ॥  
 तैसें देह मनं दोहीं । निश्चयाचां ठांड ।  
 हारपौनि जें काहिं । इच्छाति ना ॥ ७४ ॥  
 तें हिं फलवांछायागीं । स्वधर्मु वांचौनि विरागीं ।  
 कीजे जो यज्ञु सर्वांगीं । अलंकृतु ॥ ७५ ॥  
 परि आरिसा आपणपें । डोलां जें घेपे ।  
 कां तलहातिचेनि दीपें । रत्न पाहिजे ॥ ७६ ॥  
 नाना उदितें दिवाकरें । गमावा मार्गु दीठी भरें ।  
 तैसा बेदनिर्दरें । देखौनियां ॥ ७७ ॥

तियें कुंडमंडपवेदी । आणिक ही संभारसमृद्धी ।  
 ते मेलवणी जैसी विधी । आपण केली ॥ ७८ ॥  
 सकलअवयवउचितें । लेणिं पातळिं जैसीं आंगातें ।  
 तैसै पदार्थ जेथिचा तेथें । विनियोगुनि ॥ ७९ ॥  
 काइ वानूं बहुतिं बोलिं । जैसी सर्वाभरणीं भरली ।  
 यज्ञविद्या चि रूपा आली । यजनमीसें ॥ १८० ॥  
 ऐसा सांगोपांगु । निफजे जो यागु ।  
 नुरौनियां लागु । महत्वाचा ॥ ८१ ॥  
 प्रतिपालु तरि याचा । चौपाटी कीजे तुलसिचा ।  
 परि फलफूलछायेचा । आश्रयो नाहिं ॥ ८२ ॥  
 किंबहुना फलाशें विण । ऐसिया निगुतिया निर्माण ।  
 होये तो यज्ञ जाण । सात्विकु गा ॥ ८३ ॥

अभिसंधाय तु फलं दम्भार्थमपि चैव यत् ॥

इज्यते भरतश्रेष्ठ तं यज्ञं विद्धि राजसम् ॥ १२ ॥

आतां यज्ञ कीर वीरेशा । करी या चि ऐसा ।  
 परि श्रद्धा लागि जैसा । आवंतिला राउ ॥ ८४ ॥  
 जें राजा जरि घरासि ए । तरि बहुतु उपेगु होये ।  
 आणि कीर्ति ही होए । श्रद्धा न ठके ॥ ८५ ॥  
 तैसा धरुनि आवांका । झणे स्वर्गु जोडेल असिका ।  
 दीक्षितु होईन नीका । घडेल यागु ॥ ८६ ॥  
 ऐसी केवल फला लागि । महत्व फोकरावेया जर्गी ।  
 पार्था निफज चि जे यागीं । राजस पै ते ॥ ८७ ॥

विधिहीनमसृष्टां मंत्रहीनमदाक्षिणं ॥

अद्याविरहितं यज्ञं तामसं परिचक्षते ॥ १३ ॥

आणि पशुपक्षीं विवाहीं । जोईस कामा परौता नाहिं ।  
 तैसा तामसा यज्ञा पाहिं । आग्रहो चि मूल ॥ ८८ ॥



वारेया ऐसा अवाटु होये । कां मरणा मुहूर्त्त पाहे ।  
 कां निषिद्धासि न भिये । आगि जैसी ॥ ८९ ॥  
 तरि तामसांचेया आचारा । विधिचा आधि वोढा वारा ।  
 ह्यगौनि तो धनुर्द्धरा । उत्संकु खलु ॥ ९० ॥  
 नाहिं वेदाची चाडा । नैये मंत्रादिक तेया कडा ।  
 अन्न तें न सुटे तोंडा । मासियेचेया ॥ ९१ ॥  
 वैराचा बोधु ब्राह्मणां । तेथ कें रिघेल दक्षिणा ।  
 संतु जाला वाउधणा । वरिपडा जैसा ॥ ९२ ॥  
 तैसें वायां चि सर्व ही वेचे । मुख नेदखतां श्रद्धेवें ।  
 नागविलें निपुत्रिकाचें । जैसें घर ॥ ९३ ॥  
 ऐसा जो यज्ञभासु । जेया नावं यागु तामसु ।  
 आइकैं ह्यणे निवासु । श्रियेचा तो ॥ ९४ ॥

देवद्विजगुरुप्राज्ञपूजनं शौचमार्जवं ॥

ब्रह्मचर्यमहिंसा च शारीरं तप उच्यते ॥ १४ ॥

आतां गंगेचे एक पाणीं । परि नेलें आनानीं वर्णीं ।  
 एक मैली एक आणी । शुद्धत्व जैसें ॥ ९५ ॥  
 तैसें तिहिं गुणिं तप । दूध जालें असे त्रिरूप ।  
 तें एक दे पाप । उद्धरी एक ॥ ९६ ॥  
 तरि तें चि तिहिं भेदीं । कैसेनि पां ह्यणो सुबुद्धी ।  
 जाणों पाहांसि तरि आदीं । तप चि जाण ॥ ९७ ॥  
 एथ तप ह्यणिपे तें काइ । तें स्वरूप दाउं पाहीं ।  
 मग भेदिलें गुणिं तिहिं । तें पाठि बोलों ॥ ९८ ॥  
 तरि तप जें कां समैक । तें हिं त्रिविध आइक ।  
 शारीर मानसीक । शास्त्रीक गा ॥ ९९ ॥  
 आतां यां तिहिं माझारि । शारीर तवं अवधारिं ।  
 तरि शंभु कां श्रीहरी । पढियंतें होए ॥ २०० ॥

तेया प्रिया देवतालया । यात्रादिकें करावेया ।  
 आठ पाहारिं एयां पायां । उलिंग घापे ॥ १ ॥  
 प्रांगण मिरवणियां । आंगोपचार पुरवणियां ।  
 करावेया ह्मणियां । शोभति हात ॥ २ ॥  
 लिंग कां प्रतिमा दीठी । देखत खेउ आंगपुष्टी ।  
 लुंठवीत काठी । पडिली जैसी ॥ ३ ॥  
 आणि विद्याविनयादिकि । गुणिं जे वडिल लोकि ।  
 तेयां ब्रह्मणांची नीकी । पाइकें कीजे ॥ ४ ॥  
 अथवा प्रवासें कां पीडां । सीणलें जें सांकडां ।  
 ते जीव सुरवाडा । आणिजति ॥ ५ ॥  
 सकलां तीर्थांचिये धूरे । जियें कां मातापितरें ।  
 तियें सेवे किर शरीरें । लोण कीजे ॥ ६ ॥  
 आणि संसारा ऐसा दारुण । जो भेटलेयां हरे सीण ।  
 तो ज्ञानदानिं सकरुण । भजिजे गुरु ॥ ७ ॥  
 आणि स्वधर्माचां आगिठां । देह जाड्याचिया कीटा ।  
 आवृत्तिपुटीं सुभटा । झाडि कीजे ॥ ८ ॥  
 देह भूतमात्रीं नमिजे । परोपकारिं व्यामिजे ।  
 स्त्रीविधि नेमिजे । नावां नावां ॥ ९ ॥  
 जाततेन प्रसंगें । स्त्रीदेह सिवणें आंगें ।  
 तेथौनि देह आवघें । अबोटी कीजे ॥ १० ॥  
 भूतमात्राचेनि नावें । तृण हिं नासुडावें ।  
 किंबहुना सांडावे । छेदभेद ॥ ११ ॥  
 ऐसीसी जे शरीरीं । राहाटिची पडे उजिरी ।  
 तें शारीरतप घुमरी । आलें जाण ॥ १२ ॥  
 पार्था समस्त ही हें करणें । देहाचेनि प्रधानपणें ।  
 क्षणौनि मीं एयातें क्षणें । शारीर तप ॥ १३ ॥

अनुद्वेगकरं वाक्यं सत्यं प्रियहितं च यत् ॥

स्वाध्यायाभ्यासनं चैव वाङ्मयं तप उच्यते ॥ १५ ॥

येवं शरीर जे तप । तेयाचें दाविलें रूप ।

आतां आइक निष्पाप । वाङ्मय तें ॥ १४ ॥

तरि लोहें आंगतुंक । न तोडितां चि कनक ।

केलें जैसें देख । परिसें तेणें ॥ १५ ॥

तैसें न दुखवितें जें । जवलिलां मुख निफजे ।

ऐसें साधुत्व देखिजे । बोलणां जिये ॥ १६ ॥

पाणी मुदला झाडा जाए । तृण तें प्रसंगें जीहे ।

तैसें येकां बोलिलें होये । सर्वा हीं हित ॥ १७ ॥

जोडे अमृताची सुसरी । ते प्राणातें अमरां करी ।

स्नानें पापताप निवारी । गोडी ही दे ॥ १८ ॥

तैसा अविवेकु ही फीटे । आपुलें अनादित्व भेटे ।

परि आइकतां रुचि न विटे । पीयूषि जैसी ॥ १९ ॥

जरी कोणहीं करी पूसणें । तरि ऐसें होआवें बोलणें ।

नातरि आवर्तणें । निगमाचलीं ॥ २२० ॥

रुग्वेदादि तीन्हीं । प्रतिष्ठिजति वाग्भुवनीं ।

केली जैसी वदनीं । ब्रह्मशाला ॥ २१ ॥

नातरि येकार्धें नावें । तें चि शैव कां वैष्णव ।

वाचे वसतें वाग्भव । तप जाणावें ॥ २२ ॥

मनः प्रसादःसौम्यत्वं मौनमात्मविनिग्रहः ।

भावसंशुद्धिरित्येतत्तपो मानसमुच्यते ॥ १६ ॥

आतां तप जे मानसीक । तें हीं सांघों आइक ।

ह्मणे लोकनायक—। नायकु तो ॥ २३ ॥

तरि सरोवर तरंगीं । सांडिलें आकाश मेघीं ।

कां चंदनार्चें उरगीं । उद्यान जैसें ॥ २२४ ॥

नाना कलावैषम्ये चंद्र । कां साडिला आधी नरेंद्रु ।  
 नातरि क्षीरसमुद्र । मंदराचलें ॥ २५ ॥  
 ऐसें नानाविकल्पजाल । सांडूनु गेलेयां सकल ।  
 मन राहे केवल । स्वरूपीं जें ॥ २६ ॥  
 तपनें विण प्रकाशु । जाड्यें विण रसु ।  
 पोकली विण आशाश । होये जैसें ॥ २७ ॥  
 तैसी आपुली सोये देखे । आणि आपुलेया स्वभावा मूके ।  
 होंवली जैसी अंगिकें । हिंवों नेंदी ॥ २८ ॥  
 मग नवल तें कलंकें विण । शाशिविब जैसें पार्वण ।  
 तैसें चोखिसि थारपण । मनाचें जें ॥ २९ ॥  
 बुडालें वैराग्याचें तप । जिराली मनाचीं धाप ।  
 तेथ कां होईल वाप । येरीं वृत्तीं ॥ ३० ॥  
 ह्यणौनि विचारावेया शास्त्र । राहाटवावें जें वक्त्र ।  
 तें वाचेचें हीं सूत्र । हातीं न धरी ॥ ३१ ॥  
 तें स्वभावे लोभलेपणें । मनपण हिं वरु नेणें ।  
 सीतलें जैसें लवणें । आपुलें निज ॥ ३२ ॥  
 तेथ कें उठिति ते भाव । जिहि इंद्रियमार्गि धांव ।  
 घेउनि टाकावेया गांव । विषयांचें गा ॥ ३३ ॥  
 ह्यणौनि तिये मानसिं । भावशुद्धी चि असे आपैसी ।  
 रोमशुद्धि जैसी । तलहातासि ॥ ३४ ॥  
 काइ बहू बोलों अर्जुना । जें हे दशा ये मना ।  
 तें मनो तपाभिधाना । पात्र होए ॥ ३५ ॥  
 परि तें असो हें जाण । मानसतपाचें लक्षण ।  
 देवो ह्यणे संपूर्ण । सांगितलें ॥ ३६ ॥  
 एव देहें वाचा चित्तें । जें पातले त्रिविधत्वातें ।  
 तें साम्यतप तूतें । परिसविलें गा ॥ ३७ ॥

श्रद्धया परया तप्तं तपस्तत्रिविधैर्नरैः ।।

अफलाकांक्षिभिर्युक्तैः सात्त्विकं परिचक्षते ॥ १७ ॥

आतां गुणत्रयसंगं । हैं चि विशेष त्रिविध्य रिगे ।

तैं हीं आइक चांगें । प्रज्ञाबलें ॥ ३८ ॥

तरि हैं चि तप पै त्रिविध । जें दाविलें तुज विषद ।

तैं चि करीं प्रसिद्ध । सांडूनि फलीं ॥ ३९ ॥

जें पुरतिया सत्वशुद्धी । आचरिजे आस्तिकबुद्धी ।

तेयातें चि गा प्रबुद्धीं । सात्त्विक ह्यणिपे ॥ २४० ॥

नां तपियेपणां लागि । दूजी त्राये जोडुनु जर्गी ।

महत्वादिकिचां शृंगीं । बैसावेया ॥ ४१ ॥

सत्कारमानपूजार्थं तपो दंभेन चैव यत् ॥

क्रियते तदिह प्रोक्तं राजसं चलमधुवम् ॥ १८ ॥

त्रिभुवनिचेया सन्माना । न वचावेया ठाया आनां ।

धूरेचिया आसनां । भोजना लागी ॥ ४२ ॥

विश्विचेया स्तोत्रा । आपण होआवें पात्रां ।

विश्व आपुलिया यात्रा । करावेया ॥ ४३ ॥

लोकाचिया विविधा पूजा । आश्रयो धरावेया दूजा ।

भोग भोगावेया वोजा । महत्वाचिया ॥ ४४ ॥

आंगा बोल माखुनु तपें । विकावेया आपणपें ।

अंगना हीन पडपें । जिया परीं ॥ ४५ ॥

हें असो धनमानीं आश । बांधौनि तपें कीजे सायास ।

तैं तैं चि तप राजस । बोलिजे गा ॥ ४६ ॥

परि पडुरणीं जें दुहिले । तैं गोरुं न दुभे वियालें ।

कां उभें सेत चारिलें । पीकावेया नुरे ॥ ४७ ॥

तैसैं फोंकरितां तप । कीजे जें साक्षेप ।

तैं फलिं तवं सोफ । निःहां जाये ॥ ४८ ॥

ऐसें निष्फल देखौनि करितां । माझारि सांडी पांडुसुता ।  
 झणौनि नाहिं स्थिरता । तपा तेया ॥ ४९ ॥  
 यन्हविं तर्हि आकाशमांडिं । जो गाजौनि ब्रह्मांड फोडी ।  
 तो अकालमेघु काइ घडी । राहांतु असे ॥ २५० ॥  
 तैसें राजस तप जें होए । तें फलीं किर बांझ जाये ।  
 परि आचरणीं हीं नोहे । निर्वाहो तेया ॥ ५१ ॥

मूढग्राहेणात्मनो यत्पीडया क्रियते तपः ॥

परस्योत्सादनार्थं वा तत्तामासमुदाहृतम् ॥ १९ ॥

आतां तें चि तप पुडुतीं । तामसैयेचिया रींती ।  
 तें परत्रा आणि कीर्ती । रुसौनि कीजे ॥ ५२ ॥  
 केवल मूर्खपणाचा वारा । जीविं घेउनि धनुर्द्धरा ।  
 नावं ठेविजे शरीरा । वैरियांचें ॥ ५३ ॥  
 पंचाग्निचिं हडगीं । खोलविजति शरीरा लागि ।  
 किं इंधन कीजे आगि । आंतुल चि ॥ ५४ ॥  
 माथां जालिति गुगुलु । आंगीं बालिजति गलु ।  
 बांधि लांबिजति जालु । आपणपां चि ॥ ५५ ॥  
 दवडौनि श्वसोश्वास । कीजति वायां चि उपवास ।  
 कां घेइजति धूमाचे घांस । अधोमुखें ॥ ५६ ॥  
 हिमोदकें आकटें । खडकिलां सेविजति तटें ।  
 जितिया मासाचे चिमुटे । तोडिति जेथ ॥ ५७ ॥  
 ऐसे नाना परीं हे काया । घाये सूति धनंजया ।  
 तप कीजे नाशावेया । पुढैलांतें ॥ ५८ ॥  
 आंगभारें सूटला ढोंडा । आपा नूकौनियां खांडा ।  
 वरिपडिलेयां रगडा । करी जैसा ॥ ५९ ॥  
 किंबहुना हे वोखटी । घेउनि क्लेशाची हातवटी ।  
 तप निफजे किरीटी । तामस होए ॥ २६० ॥

तेवि आपुलिया आटाणियां । सुखें असतिया प्राणियां ।  
 जियाविया ही सिराणियां । करिति गा ॥ ६१ ॥  
 एवं सत्वादिकाचां आंगीं । पडिलें तपभागीं ।  
 जालें तें तुज चांगी । दाविले व्यक्ती ॥ ६२ ॥  
 दातव्यमिति यद्दानं दीयते नुपकारिणे ॥  
 देशे काले च पात्रे च तद्दानं सात्त्विकं स्मृतं ॥ २० ॥  
 आतां बोलतां प्रसंगा । आलें हणौनि पै गा ।  
 करुं रूप दानलिंगा । त्रिविधा तेया ॥ ६३ ॥  
 तेथ गुणाचेनि बोलें । दान हिं त्रिविध असे जालें ।  
 तें चि आइक पहिलें । सात्त्विक ऐसें ॥ ६४ ॥  
 तरि स्वधर्मा आंतौतें । जें मीले आपणपेयांतें ।  
 तें देइजे बहुतें । संमानयोगें ॥  
 जालेयां सुबीजप्रसंगु । पडे क्षेत्रा वापेचा पांगु ।  
 तैसा चि दानाचा हा लागु । देखतसों ॥ ६६ ॥  
 अनर्घ्य रत्न हातु चढे । तैं भांगाराची वोढि पडे ।  
 दोन्हीं जालीं तरि न जोडे । लेतें आंग ॥ ६७ ॥  
 परि सणु सुद्धदु संपति । यें तिन्हि येकें मिलति ।  
 जें भाग्य धरी उन्नती । आपुलां विधिं ॥ ६८ ॥  
 तैसें निफजवावेया दान । जें सत्व सुये संवाहन ।  
 तें देशु काल भाजन । द्रव्य ही मिले ॥ ६९ ॥  
 तर्हि आधिं तवं प्रयत्नेसिं । होआवें कुरुक्षेत्र कां कासी ।  
 नातरि तूके जो इहिंसिं । तो ही देशु हो ॥ ७० ॥  
 तेथ रवि-चंद्रा राहु-मेलु । होता पाहावा पुण्यकालु ।  
 कां तेया सारिखा निर्मलु । आणिकु ही हो ॥ ७१ ॥  
 तैसां कालिं तिये दिसिं । होआवी पात्रसंपति ऐसी ।  
 मूर्ति धरिली आहे जैसी । शुचित्वें चि कां ॥ ७२ ॥

आचाराचें मूलपीठ । वेदाची उत्तरवेंठ ।  
 तैसें द्विजरत्न चोखट । पाहुनियां ॥ ७३ ॥  
 मा तेयाचां ठांडं चिंता । निवर्तावी स्वसत्ता ।  
 परि प्रिया पुढें कांता । रिगे तैसेनि ॥ ७४ ॥  
 कां जेयाचें ठेविलें तेया । देउनि हांइजे उतरायियां ।  
 नाना हडपें विडा राया । दीधला जैसा ॥ ७५ ॥  
 तैसेनि निष्कामें जीवें । भृत्यादिभावें ।  
 किंबहुना हांवे । नेदावें उठूं ॥ ७६ ॥  
 आणि दान जेया देयावें । तेयातें ऐसेयां पावें ।  
 जें घेतलेयां नुमचवे । काइसेन हीं ॥ ७७ ॥  
 सादु घातलेयां आकाशा । देंदी प्रतिशदु जैसा ।  
 कां पाहिला आरिसा । येरीकडे ॥ ७८ ॥  
 उदकाचिये भूमिके । आफलिलेन कुंदुकें ।  
 उफलौनि माघौतें । नैयैजे हाता ॥ ७९ ॥  
 नाना वसोवा घातला चारु । माथां तुरंबिला बूरु ।  
 न करी प्रत्योपकारु । जेया परी ॥ ८० ॥  
 तैसें दीधळें दान तेयाचें । जें कोणही आंगें नुमुचे ।  
 अर्पिलेयां श्लाघ्य तेयाचें । कीजे पै गा ॥ ८१ ॥  
 ऐसिया सामग्रिया । दान निफजे वीरराया ।  
 तें सात्विक दानवरिया । सर्वां हि जाण ॥ ८२ ॥

यत्तु प्रत्युपकारार्थं फलमुद्दिश्य वा पुनः ॥

दीयते च परिक्लिष्टं तद्राजसमुदाहृतम् ॥ २१ ।

आणि तो चि देशु कालु । घडे तैसा चि पात्रमेलु ।  
 दानभागु ही निर्मलु । न्यायगतु ॥ ८३ ॥  
 परि मनीं धरुनि दुभतें । चारीजे जेवि गाइतें ।  
 कां पैवं करुनि आइतें । पेरुं जाइजे ॥ ८४ ॥



नाना दीठि घाल्नि ऐहेरा । आवंतुं जाइजे सोइरा ।  
 वाण धाडिजे घरा । वोउसेयाचेया ॥ ८५ ॥  
 पै कलांतरा गांठि बांधिजे । मग पुढिलाचें काज कीजे ।  
 पूजा घेउनि रसु दीजे । पीडितासि ॥ ८६ ॥  
 तैसें जेया जें दान देणें । तो तेणें चि गा जीवणें ।  
 भुजावा भावें येणें । दीजे जें गा ॥ ८७ ॥  
 अथवा कोण्हीं एकु वाटे जाता । घेतलें उमचों न सकतां ।  
 मीले जारे पांडुसुता । द्विजोत्तमु ॥ ८८ ॥  
 तरि कवडेया एका साठि । अशेष गोत्राचें किरीटी ।  
 सर्व प्रायश्चित्त सुवे मुठी । तेयाचिये ॥ ८९ ॥  
 तेवि चि पारलौकिकें । फलें वांछिजति अनेकें ।  
 नांदिजे तें भूके । एक ही नोहे ॥ ९० ॥  
 तें हिं ब्राह्मण नेवों सरे । शेशीं हाणिचेनि सीणे झांसुरे ।  
 सर्वस्व जैसें चोरें । नागवुनि नेलें ॥ ९१ ॥  
 कायि बहू सांघों सुमती । जें दीजे या मनोवृत्ती ।  
 तें दान गा त्रिजगती । राजस पै ॥ ९२ ॥

अदेशकाले यद्दानमपात्रेभ्यश्च दीयते ॥

असत्कृतमवज्ञातं तत्तामसमुदाहृतम् ॥ २२ ॥

मग म्लेंछांचें वसैठे । दांगाणें हान कैकटें ।  
 कां सिंहवीरें चौहटे । नगरिचें तें ॥ ९३ ॥  
 तिहीं तिहिं ठाईं मीलनीं । समो सांजवेल कां रजनी ।  
 तेव्हलिं उदारां होणें घनीं । चोरियेचां ॥ ९४ ॥  
 पात्रें भाट नागारी । सामान्या स्त्रिया जुवारी ।  
 जियें मूर्तिवतें भुरुरीं । भूलावेया ॥ ९५ ॥  
 रूपनृत्याची पुरवणी । तेयां पुढें डोलेभारणीं ।  
 गीत भाटीवं श्रवणीं । कर्णजपु ॥ ९६ ॥

तेया ही वरि अलुमालु । घे फूलागंधाचा परिमलु ।  
 तवं भ्रमांचा तो वेतालु । अवतरे चि ॥ ९७ ॥  
 येयां ऐसेन जें जें देणें । तें तामस दान मीं ह्मणें ।  
 आणि घडे दैवगुणें । आणिक ही एक ॥ ९८ ॥  
 विपायें धुणाक्षर उमडे । टालिये काउला सांपडे ।  
 तैसें तामसा पर्व पडे । पुण्यदेशीं ॥ ९९ ॥  
 तेथ देखौनि तो आधिला । योग्यु मागों हीं आला ।  
 तो ही द्रव्या चाडैला । भाले जरि ॥ ३०० ॥  
 तरि श्रद्धा न करी जीवि । तेया माथा न खलवी ।  
 स्वयं न करी ना करवी । अर्घ्यादीक ॥ १ ॥  
 आलेयां न घली बैसों । तेथ गंधाक्षतांचा अतिसो ।  
 हा प्रसंगु किर असो । तामसिये नरीं ॥ २ ॥  
 पै बोलाविजे रिणायितु । तैसा झांकवी तेयाचा हातु ।  
 तूकरण्यांचा ब्रह्मतु । प्रयोगु तेथ ॥ ३ ॥  
 आणि जेया जें दे किरीटी । तेयातें उमार्णीं तेया साठि ।  
 मग कुबोलें कां लोटी । अवज्ञेचां ॥ ४ ॥  
 हें असो इया परीं । मोल वेचणें जें अवधारिं ।  
 तेया नावं चराचारिं । तामस दान ॥ ५ ॥  
 एथ मिं जाणतसे । विपायें तूं गा ऐसें ।  
 न कल्पीसि मानसें । विचक्षणां ॥ ६ ॥  
 ऐसिं आपुलां चिन्हीं । अलंकृतें तीन्हीं ।  
 दानें दाविलिं अवधानिं । राजतनया ॥ ७ ॥  
 जें भयबंधमोचक । एकलें कर्म सात्विक ।  
 तरि कां वेखासें सदोष । येर बोलों ॥ ८ ॥  
 परि नुसंतितां विवसी । भेटि नाहिं निविसिं ।  
 कां धू न सांतां जैसी । वाति न लगे ॥ ९ ॥

तैसैं सुधा सत्वा आड । आहे रजतमाचें कवाड ।  
 त्रिभुवनीं तें कीड । क्षणावें गा ॥ ३१० ॥  
 आह्मी श्रद्धादिदानांत । जें समस्त ही क्रियाजात ।  
 सांधितलें गा व्यक्त । तिहिं गुणीं ॥ ११ ॥  
 तेथ भरवसेन तीन्हीं । न संघों चि ऐसें मानीं ।  
 सत्व दावावेया दोन्हीं । बोलिलों येरें ॥ १२ ॥  
 जें दोहिं माजि तीजें असे । तें दोन्हिं सांडितां चि दीसे ।  
 अहोरात्र्यार्गे जैसैं । संध्यारूप ॥ १३ ॥  
 तैसैं रजतमविनाशें । तीजें जें उरत दीसे ।  
 तें सत्व हें आपैसैं । फावासि ये ॥ १४ ॥  
 एवं दावावेया सत्व तुज । निरोपिलें तमरज ।  
 तें सांडूनि सत्वे काज । साधीं आपुलें ॥ १५ ॥  
 सत्वे चि येणें चोखालें । करिं यज्ञादिकें सकलें ।  
 पावसी तें करतलें । आपुलें निज ॥ १६ ॥  
 सूर्ये दाखविलें सातें । काइ एक न दिसे एथें ।  
 तेवि सत्वे केलें फलातें । काइ नेंदी ॥ १७ ॥

ॐ तत्सदितिनिर्देशो ब्रह्मणस्त्रिविधः स्मृतः ॥

ब्राह्मणास्तेन वेदाश्च यज्ञाश्च विहिताः पुरा ॥ २३ ॥

हें किर आवडतां विधिं । रीति सत्वीं आथि नीकी ।  
 परि मोक्षेंसीं एकीं । आथि मिलणें ॥ १८ ॥  
 तें येक अगाध चि आहे । तेयाचा सावाउ जें लाहे ।  
 तें मोक्षाचां ही होये । गावीं सरतां ॥ १९ ॥  
 पै भांगार जन्हीं पन्हरें । तन्हीं राजबलिचि आखरें ।  
 लाहे तें सरे । जिया परीं ॥ २० ॥  
 स्वछें शीतलें सुगंधें । जलें होति सुखपदें ।  
 परि पवित्र तें संबधें । तीर्थांचेनि ॥ २१ ॥

न यों कां भलेतैसी थोरी । परि गंगा जैसी तैसी तिये सागरी ।  
 विश्वाते उद्धरी । दर्शनमात्रे ॥ २२ ॥  
 तैसें सात्विका कर्मा किरीटी । यंतां मोक्षाचिये भेटी ।  
 न पडे आडकाठी । त्रिशुद्धी गा ॥ २३ ॥  
 हा बोलु आयिकत खेवीं । अर्जुना आधी न माये जीवि ।  
 हणगे देवें कृपा करावी । सांघावें तें ॥ २४ ॥  
 तेथ कृपालु चक्रवर्ती । हणगे आयिक तेयाची व्यक्ति ।  
 जे सात्विक शुक्ति । रत्नीं पघले ॥ २५ ॥  
 तरि अनादि परब्रह्म । जें जगदादिकंदाचें धाम ।  
 तेयाचें एक नाम । त्रिधा पै असे ॥ २६ ॥  
 तें किर अनाम अजाति । परि अविद्यागर्वाचिये राती ।  
 माजि बोलखावेया श्रुती । खुण केली ॥ २७ ॥  
 कटले संसारसीणें । जें देवों एंति गान्धारणें ।  
 तेयां वो दे नामें जेणें । तो संकेतु हा ॥ २८ ॥  
 ब्रह्माचा अबोला फीटावा । अद्वैतु द्वैतत्वे भेटावा ।  
 ऐसा मंत्र देखिला कणवा । वेदें बापें ॥ २९ ॥  
 मग दाविलेनि जेणें एके । ब्रह्म आलविलें कवतिकें ।  
 मागां असतां ठाकें । पुढां उभें ॥ ३० ॥  
 परि निगमाचलशिखरीं । उपनिषदार्थनगरीं ।  
 आहाति ब्रह्माचां जे एकहारीं । तेयांसी चि ॥ ३१ ॥  
 हें इ असो प्रजापति । शक्ति जे सृष्टि कारिति ।  
 तें जेया एका आवृत्ती । नावांचिया ॥ ३२ ॥  
 पै सृष्टिचेया उपक्रमा । पूर्वे गा धीरोत्तमा ।  
 वेडा ऐसा ब्रह्मा । एकला होता ॥ ३३ ॥  
 मग ईश्वराते नेदखे । ना सृष्टि करु न शके ।  
 तो एकु थोरु केला एके । नावें जेणें ॥ ३४ ॥

जेयाच्चा अर्धु जीविं ध्यातां । जें वर्णत्रय जपतां ।  
 विश्वसृजना योग्यता । आली तेया ॥ ३५ ॥  
 तेधवां रचिले ब्रह्मजन । तेयां वेद दीधले सासान ।  
 यज्ञा ऐसें वर्त्तन । जीवें केलें ॥ ३६ ॥  
 पाठिं नेणों केती एर । मीनले लोक अपार ।  
 जालें ब्रह्मदत्त अग्रार । त्रिभुवन ॥ ३७ ॥  
 ऐसें नाममात्रें जेणें । धात्रेया अढंच करणें ।  
 तेयाचें रूप आधिक हणें । श्रीकांतु तो ॥ ३८ ॥  
 तरि सर्व मंत्रांचा राजा । तो प्रणउ आदिवर्णु बुद्धा ।  
 तत्कारु दूजा । तीजा सत्कारु ॥ ३९ ॥  
 एवं ॐ तत्सदाकार । ब्रह्मनाम तें त्रिप्रकार ।  
 हें फूल तुरंबी सुंदर । उपनिषदातें ॥ ४० ॥  
 येणेंसिं होउनि येक । जें निर्बाललें कर्म सात्विक ।  
 तें कैवल्यातें पाइक । घरिचें करी ॥ ४१ ॥  
 यन्हविं कापुराचें थलिवं । आणुनि दइजैल दैवं ।  
 घेउं जाणणें चि अडवं । तेथ असे बाण ॥ ४२ ॥  
 तैसें आदरिजैल सत्कर्म । उच्चरिजैल हिं ब्रह्म नाम ।  
 परि नेणिजे जरि वर्म । विनियोगाचें ॥ ४३ ॥  
 तरि महंतांचिया कोडी । घरा आणिलेयां हिं वोढि ।  
 मानु नेणती परिवडी । मुदल तूटे ॥ ४४ ॥  
 कां लेयावेया चोखट । टीक मांगार एकवट ।  
 घाल्लु बांधली मोट । गलां जेवि ॥ ४५ ॥  
 तैसें तोंडिं ब्रह्मनाम । हातिं तें सात्विक कर्म ।  
 विनियोगें विण काम । निष्फल होए ॥ ४६ ॥  
 आगा अन्न आणि भूख । पासिं असे पारि देख ।  
 जेउं नेणतां बालक । लंघे चि तें ॥ ४७ ॥

कीं स्नेहा सूत्रा वैश्वानरा । जालेयां जन्हीं सबसारा ।  
हातवटी नेणतां धीरा । प्रकाशु नोहे ॥ ४८ ॥  
तैसें वेळे कृत्य पावे । तेथिचा मंत्रु ही आठवे ।  
परि वेर्थ तें आघवें । विनियोगें विण ॥ ४९ ॥  
ह्यगौनि वर्णत्रयात्मक । जें हें ब्रह्मनाम एक ।  
विनियोगु तूं आयिक । येयाचा आतां ॥ ३५० ॥

तस्मादोमित्युदाहृत्य यज्ञदानतपःक्रियाः ॥

प्रवर्त्तते विधानोक्ताः सततं ब्रह्मवादिनां ॥ २४ ॥

तरि नांमिं चि आखरें तीन्हीं । कर्मा आदि मध्ये निदानीं ।  
प्रयुंजाविं पै स्थानीं । इहिं तीन्हीं ॥ ५१ ॥  
हे चि एकी हातवटी । घडिली लोकिं किरीटी ।  
आले ब्रह्मविद भेटी । ब्रह्माचिये ॥ ५२ ॥  
ब्रह्मासिं होआवेया येकिं । ते वेचति यज्ञादिकिं ।  
जे चावलले वोलखी । शास्त्रांचिया ॥ ५३ ॥  
तें आदि तव उंकारु । ध्यानें करिति गोचरु ।  
पाठिं आणिति उच्चरु । वाचे ही तो ॥ ५४ ॥  
तेणें ध्यानें प्रकटें । प्रणवोच्चारें स्पष्टें ।  
लागति मग वाटे । क्रियांचिये ॥ ५५ ॥  
आंधारिं अभंगु दिवा । अडविं समर्थु बोलावा ।  
तैसा प्रणवु जाणावा । कर्मरिंभी ॥ ५६ ॥  
उचितदेवउद्देशें । सुद्रव्यें धर्म्यें बहुवसें ।  
द्विजद्वारा हवन हुताशें । त्याजिति पै ते ॥ ५७ ॥  
आहवनीयआदि वन्ही । निक्षेपरूपहवनिं ।  
वेचिति पै निधानीं । फुडे होउनि ॥ ५८ ॥  
किंबहुना नाना याग । निष्पत्तिचें घेउनि आंग ।  
करिति नावडतेयां त्याग । उपाधिचे ॥ ५९ ॥

कां न्यायें जोडला पवित्रि । भूमादिकिं स्वतंत्री ।  
 देशकालशुद्धपार्ति । दैति दानें ॥ ६० ॥  
 अथवा एकांतरा कृच्छी । चांद्रायणें मासोपवासि ।  
 शोखुनु गा धातुराशी । करीति तपें ॥ ६१ ॥  
 येवं यज्ञदानतपें । जियें गाजंति बंधरूपें ।  
 तैं तें चि होये सोहपें । मोक्षाचें तेयां ॥ ६२ ॥  
 स्थलिं नावा जिया दाटिजे । जलिं तिया चि जेविं तरिजे ।  
 तेवि बंधाकिं कर्मीं सूटिजे । नावें येणें ॥ ६३ ॥  
 पारि हें असो ऐसिया । यज्ञदानादिक्रिया ।  
 उंकारें सावाइलिया । प्रवर्त्तती ॥ ६४ ॥

तदित्यनभिसंधाय फलं यज्ञतपःक्रियाः ॥

दानक्रियाश्च विविधाः क्रियन्ते मोक्षकांक्षिभिः ॥ २५ ।

तिया मोटकिया जेथ फलिं । रिगों पांति जिये कालिं ।  
 प्रयुंजीति तिये कालीं । तत्तद्धु हा ॥ ६५ ॥  
 जें सर्व ही जगा परौतें । जें एक सर्व ही देखतें ।  
 जें तत्तद्धु बोलिजे तें । पैल वस्तु ॥ ६६ ॥  
 तें सर्वादिकत्वे चित्तीं । तद्रूप ध्याउनि सुमती ।  
 उच्चारें हिं व्यक्ती । आणीति पुढुतीं ॥ ६७ ॥  
 ह्मणति तद्रूप ब्रह्मा तिया । फलिं येति क्रिया ।  
 होंतु आह्मां भोगावेया । काहिं चि नुरो ॥ ६८ ॥  
 ऐसें तदात्मक ब्रह्म । तेथ उगाणूनु कर्म ।  
 आंग झाडीति न मम । एणें बोलें ॥ ६९ ॥  
 आतां उंकारें आदारिलें । तत्कारें समर्पिले ।  
 इया रीतिं जेया आलें । ब्रह्मत्व कर्मीं ॥ ७० ॥  
 तें कर्म किर ब्रह्माकारें । जालें तेणें हिं न सरे ।  
 जें करितेनसिं दुसरें । आहे ह्मणौनि ॥ ७१ ॥

मीठ आंगें जळि विरे । परि क्षारता वेगली उरे ।  
 तैसें कर्म ब्रह्माकारें । जाण तें द्वैत ॥ ७२ ॥  
 आणि दुजें जवं घडे । तवं संसारभय जोडे ।  
 हें देऊ आपुलेन तोंडें । बोलति वेदें ॥ ७३ ॥  
 ह्मणौनि परतत्वे ब्रह्म असे । तें आत्मत्वे परिवसे ।  
 सच्छद्दु रिणा दोसें । ठेविला देवें ॥ ७४ ॥  
 तरि उंकारु तत्कारी । जें जालें ब्रह्मकर्म शरीरी ।  
 जें प्रशस्तादि बोल वरी । वाखाणिले ॥ ७५ ॥

सद्भावे साधुभावे च सदित्येतत्प्रयुज्यते ॥

प्रशस्ते कर्मणि तथा सच्छद्दुः पार्थ युज्यते ॥ २६ ॥

प्रशस्ते कर्मि तिये । सच्छद्दु विनियोगु आहे ।  
 तो चि आइकां होये । तैसा सांघों ॥ ७६ ॥  
 तरि सच्छद्दु एणें । आटूनि असंताचें नाणें ।  
 दाविजे अव्यंगवाणें । सत्तेचें रूप ॥ ७७ ॥  
 जें सत्तेचें कालें देशें । हों नेणे चि अनारिसें ।  
 आपणपां आपण असे । अखंडीत ॥ ७८ ॥  
 हें दीसत जेतुलें आहे । तें असंतपणें जें नोहे ।  
 देखतां रूपिं सोये । लाभे जेयाची ॥ ७९ ॥  
 तेणेंसि प्रशस्त तें कर्म । जें जालें सर्वात्मक ब्रह्म ।  
 देखिजे करुनि सम । ऐक्यबोधें ॥ ८० ॥  
 तेथ उंकारु तत्कारें । जें कर्म दाविलें ब्रह्माकारें ।  
 तें गीळुनु होइजे एकसरें । चिन्मात्र चि ॥ ८१ ॥  
 ऐसा हा अंतरंगु । सच्छब्दाचा विनियोगु ।  
 जाण ह्मणे श्रीरंगु । मी न ह्मणें हो ॥ ८२ ॥  
 ना मी चि जरि ह्मणें । तरि श्रीरंगिं दूजें हें उणें ।  
 ह्मणौनि हें बोलणें । देवाचें चि ॥ ८३ ॥



यश्चे तपसि दाने च स्थितिः सदिति चोच्यते ॥

कर्म चैव तदर्थाय सदित्येवाभिधीयते ॥ २७ ॥

आतां आणिकी ही परी । सछद्दु हा अवधारी ।  
 सात्विका कर्मा करी । उपकार जो ॥ ८४ ॥  
 तरि संतें चि कर्में चांगें । चालिलें अधिकारबगें ।  
 पारि एकाधेनि अंगें । हीणावति जैं ॥ ८५ ॥  
 तैं उणें एक अवेवें । शरीर ठाके आघवें ।  
 कां अनेग हान भावे । राभस्याची गती ॥ ८६ ॥  
 तैसैं एकें चि गुणें विण । संत चि परि असंतपण ।  
 कर्म करि गा जाण । जिये वेळे ॥ ८७ ॥  
 तेधवां अंकारु तत्कारी । सावायिला चांगी परी ।  
 सछद्दु कर्मा करी । जीर्णोद्धार ॥ ८८ ॥  
 तें असंतपण फेडी । आणि सद्वाचाचिये रूढी ।  
 निज सत्वाचिया प्रौढी । सछद्दु हा ॥ ८९ ॥  
 बोध जैसैं रोगिया । कां सावाअ ये भंगलेया ।  
 सछद्दु कर्मा वेगलेयां । तैसा जाण ॥ ९० ॥  
 अथवा काहिं प्रमादें । कर्म आपुलिये मर्यादे ।  
 चूकौनि पडे निषिद्धे । वाटे हान ॥ ९१ ॥  
 चालतेया मार्गु सांडे । पारखियासि अखरें पडे ।  
 राहाटी माजि न घडे । काइ काइ ॥ ९२ ॥  
 झणौनि तैसी कर्मा । राभस्यें सांडे सीमा ।  
 असाधुत्वाचेया दुर्नामा । येवों पाहे जैं ॥ ९३ ॥  
 तेथ हा गा सछद्दु । येरिं दो प्रबुद्ध ।  
 प्रयुंजिला करी साधु । कर्मतें तेया ॥ ९४ ॥  
 लोहापरिसाची घृष्टि । बोहलागंगेची भेटि ।  
 मृत्या जैसी वृष्टि । पीयुषाची ॥ ९५ ॥

## अध्याय १७ वां

६२६

पै असाधु कर्मां तैसा । सछद्दु वीरषा ।  
 हें असो गौरवु चि ऐसा । नामाचा येया ॥ ९६ ॥  
 घेउनि येथिचें वर्म । जें विचारीसि हें नाम ।  
 तें केवल हें चि ब्रह्म । जाणसी तूं ॥ ९७ ॥  
 पाहे पां अंतत्सत् ऐसें । हें बोलणें तेथ नेत असे ।  
 जेथौनि कां प्रकाशे । दृश्यजात ॥ ९८ ॥  
 तें तवं निर्विशिष्ट । परब्रह्म चोखट ।  
 तेयाचें हें आंतुवट । व्यंजक नाम ॥ ९९ ॥  
 परि तो आश्रयो आकाशा । आकाश चि कां जैसा ।  
 येया नामा नामियां तैसा । अभेदु असे ॥ १०० ॥  
 उदैला आकाशीं । रवी चि रवीतें प्रकाशी ।  
 हे नामव्यक्ति तैसी । ब्रह्मा करी ॥ १ ॥  
 ह्मणौनि व्यक्षर हें नाम । नव्हे जाण केवल ब्रह्म ।  
 या ही लागि कर्म । जें जें कीजे ॥ २ ॥  
 ते याग अथवा दानें । तपादिकें हिं गहनें ।  
 तिर्यें निफजति कां न्यूनें । होउनि ठांतु ॥ ३ ॥  
 परिसाचां वोरकलीं । नाहिं चोखाकीडाची बोली ।  
 तैसिं ब्रह्मिं अर्पितां केलीं । ब्रह्म चि होंति ॥ ४ ॥  
 उणेयापुरेयाचिया परी । नुरतीं चि तेथ अवधारिं ।  
 निवडूं न यंति सागरीं । जैसिया नदी ॥ ५ ॥  
 एवं पार्था तुज प्रति । ब्रह्मनामाची हे शक्ति ।  
 सांधितली उपपत्ती । डोलसा गा ॥ ६ ॥  
 आणि एका एका ही आखरा । वेगलवेगला वीरा ।  
 विनियोगु नागरा । बोलिलों रीती ॥ ७ ॥  
 आतां एवं सुमहिम । ह्मणौनि हें ब्रह्मनाम ।  
 जाणितलें किं सुवर्म । राया तुवां ॥ ८ ॥

तरि येथौनि याची श्रद्धा । उपलविली हो सर्वदा ।

जेयाचें जालें बंधा । उरों नेंदी ॥ ९ ॥

जिये कर्म हा प्रयोग । अनुष्ठिजे सविनियोग ।

तेथ अनुष्ठिला होये सांगु । वेदु चि तो ॥ ४१० ॥

अश्रद्धया हुतं दत्तं तपस्तप्तं कृतं च यत् ॥

असदित्युच्यते पार्थ न च तत्प्रेत्य नो इह ॥ २८ ॥

सांडूनि हे सोए । मोडूनि श्रद्धेची बाहे ।

दुराग्रहाची चि त्राये । वाढउनियां ॥ ११ ॥

मग अश्रमेधां कोडी कीजे । रत्ना भरुनि पृथिवी दीजे ।

एकांगुष्टि हीं तपिजे । तपसहस्तीं ॥ १२ ॥

जलाशयाचेन नावें । समुद्र ही कीजतु नवे ।

परि किंबहुना आघवे । वृथा चि तें ॥ १३ ॥

पाषाणा वरि वर्षलें । जैसैं भस्मीं हवन केलें ।

कां खेवं दीधलें । साउलिये ॥ १४ ॥

नातरि जैसैं चडकणां । गगन हाणितलें अर्जुना ।

तैसा सामारंभु सुना । गेला चि तो ॥ १५ ॥

घाणा गालिले खडे । तेल ना पेंडि जोडे ।

तैसैं दलिद्र तेवडें । ठेलें चि आंगि ॥ १६ ॥

गांठि बांधली खापरी । एथ अथवा पैली तीरीं ।

न सरौनि जैसी मारी । उपवासिं गा ॥ १७ ॥

तैसैं कर्मजातें तेणें । नाहिं इहिकिचें भोगणें ।

तेथ परत्र कें कवणें । आक्षेपावें ॥ १८ ॥

हणौनि ब्रह्मनामश्रद्धा । सांडूनि कीजे तो धांधा ।

हें असो सीनु नसुदा । दृष्टादृष्टीं ॥ १९ ॥

ऐसैं कलुषकरीकिसरी । त्रितापतिमिरतमोरी ।

श्रीवीरवरनरहरी । बोलिलें तेणें ॥ ४२० ॥